

ဒေးဝန်းအောင်ကျော်ရွှီ၏ကိုယ်တို့ရခိုင်ပြည်သိမ်းတိုက်ပွဲမှတ်တမ်း

(ပင်းဝါ၊ မြောက်ဦးသိမ်းတိုက်ပွဲ)

ဇေယျန္တ။ ။ ဗောဓိမည်ရာ၊ မုနိန္ဒသည်လောကသျှင်၊ သောင်းရပ်ခွင်ဤလူမြို့၊ ပွင့်လာဘိသည်၊
 မုနိသမ္မဒေ၏။ သီဒါဝယ်သဲလုံးရှိ၊ ဒွေးပါဒတော်၊ စုံနှစ်ဖော်ကို၊ ကျွန်သာလက်ဦးပီး၍၊
 ကြောင်းဦးလျှောက်တင်ပါမည်၊ သောင်းဇေယျဝယ်၊ သျှင်လူရွှီနားတည်လော့။
 မိစ္ဆိမည်နောက်ရပ်သာ၊ အနိယတိုင်းပြည်မသည်၊ ထက်မှာနတ်ဘုံသာသို့၊ မြစ်ဂင်္ဂါသီတာလည်း၊
 သမုဒ္ဒရာ၊ လေးမျက်နှာသည်၊ ပတ်ကာဝန်းလျှက်နီ၏။ ဘိလပ်ပြည်မြို့စကြာ၊ အိမ်ရာစီသည်၊
 ပဆာမင်းတုံသော်ကား၊ ထက်ဒေဝါဟန်မပြား၊ လေးယောက်မောင်ပင်၊ ဝေဟန်သျှင်သည်၊
 ဘုံခွင်မိုမ်းသကြားသို့၊ သျှင်မင်းများထံတော်ဝယ်၊ တရာတစင်း၊ ထီးဆောင်းမင်းရှိ၊
 မကြွင်းခရိုသေလျက်၊ ဘဏ္ဍာငွေခန့်ဇနာ၊ အဖူးလက်ဆောင်၊ များမြှောင်ဆက်သွင်းပါ၏၊
 မင်းမြတ်စွာအဏာနှင့်၊ ကုလီကတ္တာ၊ ရွှီမြို့တော်ဝယ်၊ ဗော်ရော်လာသတ်ကလည်း၊
 နှုတ်သံမြအမိန်တော်၊ ငါစိုးအုပ်သည်၊ အရှိတောင်ဖက်ဝယ်၊ ခေါ်တွင်ကာစစ်တကောင်း၊
 မြို့ဝန်အရာ၊ ခန့်အပ်ပါသည်၊ ဝါနော်သပ်ဖလောင်းရှိ၊ လျှင်ကြောင်းစီလွတ်ခါ၊ ဝါနော်သပ်လည်း၊
 မင်းမြတ်၏အဏာနှင့်၊ ချီကြွလှာတုံပေငြား၊ ဆိုက်ရောက်ပါသော်၊ မြို့မှာမူးမတ်များနှင့်၊
 မျိုးလေးပါးသူတကာ၊ မိမ္မယောက်ျား၊ တိုင်းပြည်သားမှာ၊ မိဘရောက်ပြန်လာသို့၊
 အုပ်ချုပ်ကာစီရင်ငြား၊ မရမာသည်၊ ဘာသာစပ်တခြားနှင့်၊ လိမ္မငြားတတ်ပွန်သူ၊ အမီးပုစ္ဆာ၊
 ပြဿနာကို၊ ကျီအောင်ဖြေမည့်လူဟု၊ တွေးဆယူရှာသောအခါ၊ ပွင့်သစ်ပန်းသွင်၊
 မေ့ထိပ်တင်သည်၊ သခင်ကိုတွေးမြော်၏။ ခေါ်တွင်ကာလူအများ၊ မောင်သော်တလီ၊
 အောင်ကျော်ရွှီသည်၊ သက်ဝီမေ့ထိပ်ထားကို၊ မြော်မြင်ငြားလူတကာ၊ ရင်၌မိုးသည်၊
 သားကြီးဟန်ပမာသို့၊ မြို့ဝန်သာ ဝေါနော်သတ်၊ မေ့ချစ်မောင်ကို၊ စိတ်တွင်လောဘကပ်လျက်၊
 မပြတ်ငါထံမှာ၊ တိုင်းပြည်ကိစ္စ၊ ဟူသမျှသည်၊ တခုမကျန်ပါအောင်၊ ဆောင်ရွက်ကာနီရမည်၊
 စားစရိပ်မှာ၊ တလငွေနှစ်ဆယ်ကို၊ မပြတ်စိပီးမည်သာ၊ အာဏာချသည်၊ ရှိကတောင်းဆုပါ၍၊
 သက္ကရာဇ်မှာထောင်ဖြစ်၊ တရာသျှစ်ဆယ်၊ စွန်းဝယ်နှစ်ခုနှစ်ဝယ်၊ အချစ်မေ့သခင်၊
 စစ်တကောင်းသည်၊ ဖလောင်းမင်းရင်ပြင်၌၊ တိုင်းပြည်တွင်မှုကိစ္စ၊ ပေါ်ထွက်ရာကို၊
 ဖြီဖျော်မိုးမစကာ၊ ယင်းမှာနီသူရှိမှာ၊ ရီခမိုးကို၊ ချမ်းချမ်းဖက်နီပါသို့၊ ပျော်ပါးကာအသွယ်သွယ်၊
 ချမ်းငြိမ်းလှသည်၊ ထက်မနတ်ဘုံပြည်သို့၊ ရွှင်စမ္မိယနီကြ၍၊ မေ့ချစ်မောင်ကို၊
 နတ်လူသထာ၏လေး။

နတ်လူသထာ၊ နီလျှင်းပါသည်ယင်းခါတွင်၊ ထောင်ကျော်လျှင်သက္ကရာဇ်၊ တရာသျှစ်ဆယ်၊
 စွန်းဝယ်ငါးခုနှစ်ဝယ်၊ ခေါ်တွင်လိုက်သျှင်မဖြူ၊ ထိုကျွန်းငယ်မှာ၊ စောင့်နီရဲမက်လူကို၊
 အောက်သားမူသျှမ်းရှိသာ၊ ဆိတ်ဖာအိပ်ကို၊ ခေါ်၍သတ်ဖြတ်လာလျက်၊ အပိုင်သာခံလိုငြား၊
 ရန်စရာသည်၊ ယင်းမှာသျှမ်းအောက်သာရှိ၊ ပြုကျင့်ငြားထိုခြင်းရာ၊ (ဆက်) လာသတ်မင်း၏၊
 မယွင်းရွှီနားတော်ဝယ်၊ ကြားလီသောထိုခါ၌၊ ကတ်တင်ခေါ်မှတ်၊ ဘေးကာသတ်နှင့်၊
 ဝီသတ်ကိုစေလွှတ်ကာ၊ လွတ်လွတ်ထွက်ချီကြွလာ၊ စစ်တကောင်းမှာ၊ လျှင်ပြင်းရောက်တုံပါက၊
 ရခိုင်မှာမူးမတ်သား၊ အောင်ကျော်ပန်းရွှီ၊ သော်တလီသည်၊ ပြည်ဆီမူရီးများကို၊

သိကျွမ်းငြားဆောင်ရွက်သူ၊ ဝါနော်သတ်သည်၊ လွတ်လွတ်ပီးအပ်တုံက၊ ကာနယ်မှာသုပီလုင်၊
ဗဲကာသတ်နှင့်၊ ဝိသတ်ကတ်တင်လည်း၊ ဝမ်းသာရွှင်အားကြီးရ၊ မေ့ချစ်မောင်ကို၊
ယူဆောင်ချီကြွလားလျက်၊ ကာသတ်ကပြုစုရာ၊ ဖလောင်းချိတ်မှာ၊ လျှင်စောရောက်လီပါက၊
ဗဲကတ်သာလူသူများ၊ တထောင်ကျော်ကို၊ ထိုခါစုဆောင်းကြားလျက်၊ ခေါ်ယူလားချီလီခါ၊
သျှင်မဖြူနှင့်၊ ငတ်မော်ဆိုက်ရောက်ပါက၊ တပ်တောင်တာစွဲကိုင်ငြား၊ မေ့သက်သျှင်သည်၊
ယင်းတွင်ခြင်သေ့လားသို့၊ တသောသောနီကြခါ၊ တလိုင်းအောက်သား၊ သျှမ်းအများသည်၊
ပြီးလားခြုံထဲမှာ၌၊ ပုန်းယောင်ကာနီလီငြား၊ တုမပြိုင်ဘဲ၊ ရိုင်ရိုင်နောက်ဆုတ်လား၍၊
သျှင်မင်းဖျားလာလတ်မည်၊ မြို့ဝန်ဟူမှတ်၊ ဝေါ်နော်သတ်ကို၊ လွတ်လပ်ခေါ်တွင်ပေလျက်၊
ကိုယ့်တိုင်းပြည်အထဲမှာ၊ လိမ္မာသော်က၊ တတ်စွမ်းလှသည်၊ ရှိကလောင်းမဟော်သို့၊
ရဲစွမ်းရာဇန္ဒလ၊ တူသောသူသည်၊ ပြည်တွင်မှူးမတ်ကလည်း၊ ခေါ်တွင်ကြလူတကာ၊
ရာပသိန်သတ်၊ တုလွတ်ဖက်မဲ့သာတည်း၊ အမတ်တော်ချီလားလီ၊ ရန်ဟိရာကို၊
စင်အောင်ထိုးထွင်းလီလော့၊ ရခိုင်ပြည်တရိုးမှာ၊ သျှမ်းအောက်သားသည်၊ ကျားရဲဟန်ပမာသို့၊
စွဲလန်းကာမို့နှောက်စား၊ လူ့မိစ္ဆာကို၊ ပါယ်ခွာနှင့်ထုတ်ငြား၍၊ အင်းဝစားသျှင်ဘုရင်၊
လက်ဝင်ပိုင်ထား၊ တိုင်းပြည်များကို၊ သိမ်းငြားယူခီကျင်လျက်၊ ငါ့ထံတွင်ဆက်ရမည်၊ ချတော်ပြု၍၊
ယင်းကစေခန့်ပေသည်၊ တိုင်းပြည်ရခိုင်သို့လေး။

ရခိုင်တိုင်းပြည်၊ ချီလားမည်အမှန်သာ၊ ဇော်နေခေါ်ဟရီသျှိန်ဗိုလ်ချုပ်ကြီးမှာ၊ ရဲမတ်တော်ကို၊
ညီစွာစုရုံးပြီးမှ၊ အမြောက်ကျိဗုံးစကြာ၊ မီးကျည်တန်းကို၊ လျှင်မြန်ဆောင်ခဲ့ပါ၍၊
ငါ့နောက်တော်လိုက်ရမည်၊ ရာပသိမ်သတ်၊ မင်းမြတ်နှုတ်တော်ဝယ်နှင့်၊ ချခေါ်ပေတုံသောခါ၊
လေးပါးစစ်အင်၊ မွန်းဖျင်ပြည့်မျှပါလျက်၊ ချီကြွလာတသောသော၊ စစ်တကောင်းမှာ၊
လျှင်ကြောင်းရောက်လာငြားက၊ ဗိုလ်လူများထားခပါ၊ ရာပသိမ်သတ်၊ မင်းမြတ်ချီကြွလာလျက်၊
ငတ်မြစ်မော်သျှင်မဖြူ၊ ကျွန်းတွင်တည်ငြား၊ တပ်အုံများကို၊ မင်းဖျားရှုတော်မူ၍၊
စံပျော်တုံနီသောခါ၊ အောက်သားတမန်၊ နားခံမောင်လုံးလာလျက်၊ စကားသာပြန်တတ်ငြား၊
အသနာလီကဒီ၊ ထိုကုလားနှင့်၊ အောက်သားများလာ၍သာ၊ သည်တခါကို၊
ကျွန်တော်တို့မိုက်ပါ၏၊ စောင့်ရာနီသူရို့ကို၊ သတ်ဖြတ်ရာဝယ်၊ ချမ်းသာပီးခဆိုလျက်၊
တပ်တော်ကိုနှုတ်ပါလီ၊ သျှင်မဖြူကို၊ ကျွန်တော်တို့ပိုင်သည်ဟု၊ ခါရံဝယ်တဆိုက်သာ၊
မြန်မာမျိုးသည်၊ ကူး၍မလားပါတည်း။ အမှားသာခံတုံငြား၊ လျှောက်ခြင်းရာကို၊
သခင်နားတော်ကြားက၊ ထင်မှတ်ငြားကယ်ကောင်းသာ၊ ရာပသိမ်သတ်၊ မင်းမြတ်ရွှီနှုတ်ဝါနှင့်၊
တပ်တောင်တာအလုံးကို၊ နှုတ်သိမ်းယူ၍၊ လွယ်ကာချီတက်ဆိုက၊ ကောင်လောင်ဗိုလ်သုပီလုင်၊
ဗိုလ်လုံးသားသည်၊ သောသောပြန်တက်ကျင်၍၊ ပင်းဝါခွင်ဖလောင်းချိတ်၊ ရောက်ကြလာသည်၊
ကမ္ဘာမြီလုံးထိန်မျှ၊ စုရုံးပြီးနီကြခါ၊ (ဆက်) ရခိုင်သားသည်၊ တခြားဇာတ်ဘာသာကို၊
သူရဲတော်သွင်းရမည်၊ ပွင့်သစ်ပန်းသွင်၊ မေ့သက်သျှင်ကို၊ ယင်းတွင်ဆင့်ဆိုပေလျက်၊
ကတ်တင်ဝယ်ပိန်းကော်သတ်၊ နှစ်ယောက်စုံသည်၊ တိုင်ပင်စုဆောင်းကြပ်၍၊
ခန့်အပ်ဘိထား၍ပေ၊ ရာပသိမ်သတ်၊ မင်းမြတ်တက်လားလီ၏။ ရခိုင်ပြည်လူရို့ကို၊
မေ့သခင်သည်၊ ယင်းတွင်ပြောဟောဆိုလျက်၊ ကုလားလိုစဖာအိပ်၊ ငါးရာကျော်ကို၊
ထိုခါစုဆောင်းပီးက၊ (----)၊ သေနတ်ခြင်းကို၊ မကြွင်းမကျန်ပါအောင်၊ ပြသကာသင်၍ပေ၊
ကတ်တင်ခေါ်မှတ်၊ ပိန်းကောသတ်လည်း၊ လှည့်ပတ်ကဇာတ်နီသည်၊ ရပ်မြီပင်းဝါကလေး။

ရပ်မြီပင်းဝါ၊ ကဇာတ်ပါ၍နီခါလျှင်၊ ရခိုင်တွင်စောင့်နီငြား၊ အတွင်းဝန်သည်၊
ဧကန်သျှမ်းအောက်သားကား၊ ငယ်နာမမောင်စံသာ၊ အခွန်ဝန်သည်၊ ငအောင်မာန်ခပါနှင့်၊
ရခိုင်မှာဝန်ပြုသူ၊ မောင်စံပျော်လည်း၊ သည်ခါကောင်းမည်ဟူ၏။ နားခံတော်မောင်လုံးခေါ်၊
စွန်းလွန်းငိုလ်နှင့်၊ နားခံထားလီသတည်း။ စာရွှီးတော်ငိုဝိုက်ကေ၊ တလိုင်းအောက်သား၊
သျှမ်းကုလားရို့၊ အများစုဆောင်းပေလျက်၊ ပင်းဝါမြီအရပ်မှာ၊ တိုက်ခိုက်ရသော်၊ ငါတို့နိုင်ရပါအံ့၊
အရှိမှာသျှင်ဘုရင်၊ ကြားလီငြားသော်၊ သူကောင်းပြုမည်ထင်၏။ တိုင်ပင်ကျင်ပြောဟောငြား၊
နောက်မမြင်သည်၊ လူပင်သျှမ်းအောက်သားရို့၊ အမှားမှားသူယုတ်မှာ၊ ဗိုလ်တပ်များနှင့်၊
ကြွလားချီ၍လာက၊ ပုရိန်ရွာကုလားပေ၊ ဗိုလ်ငဖြူလည်း၊ သည်ခါရပါမည်ဟု၊
ကျွန်းအုပ်ဝယ်ရခိုင်သား၊ ငပြီကြီးလည်း၊ လောဘစိတ်ဟိပါများ၍၊ အမ်းစားသားသာကျော်ဝေ၊
ရွှီငွေဒီဂါး၊ ကျွဲနွားကျွန်ရမည်ဟု၊ မှတ်၍ပေသုံးယောက်သား၊ ချိတ်ချိတ်ရယ်ကာ၊
ယင်းခါဝမ်းကြီးသာ၍၊ ကခုန်ကာပြီး၍ပေ၊ အောက်သားနောက်သို့၊
ကပ်လျှက်လိုက်လတ်သတည်း။ ပုန်းလျှိုးထွေလာလတ်မြောက်၊ ဝေလာတောင်မှာ၊
မှန်စွာတပ်ရပ်ရောက်က၊ ပါယ်လွန်မြောက်လားကြခါ၊ ရုတ္တနာသည်၊ ပလ္လင်တပ်ဦးမှာ၌၊
စောင့်နီရာလုထွင်သတ်၊ ကထွင်ငယ်ကို၊ ယင်းတွင် တိုက်ခွတ်ဖြတ်က၊ ညဉ့်လတ်သန်းခေါင်မှာ၊
ဘက်မမျှ၍၊ ဆုတ်လျှက်လာကြပါ၏။ ပင်းဝါမှာပိန်းကောသတ်၊ တပ်ဟိရာမှာ၊
ပေါင်းကာနီလျှင်းကြပ်က၊ အောက်သားသွတ်တလိုင်းမှာ၊ ကတ်တင်ခေါ်မှတ်၊ ပိန်းကောသတ်ကို၊
လိုက်၍တိုက်ပြန်လာလျက်၊ (-----)၊ ဟိရာရာကို၊ ဖွေရှာဖမ်းဆီးထား၍၊ သတ်ဖြတ်ငြားအလီလီ၊
မီးထင်းတိုက်လောင်၊ ကုန်အောင်ညက်ညက်မို့၏။ ပင်းဝါမြီဇရပ်တွင်၊ ရာဇဖက်မှာ၊
တပ်မစွဲလုပ်ကျင်လျက်၊ နီခါလျှင်တုံကပေ၊ ဟာလဘင်းပင်းဝါ၊ စုတ္တရာနှင့်၊ ငတ်မော်အရပ်မြို့၌၊
ဟိပါသည်လူသူများ၊ ချင်းနှင့်ကယင်၊ မြဲလျှင်ဒိုင်းနက်စသား၊ နှမ်းရွေးသားခွင့်မပီးပေ၊
လင်းကဲပေါင်းစုံ၊ သက်မူသျှမ်းစုသည်တည်း၊ တောင်မြို့ငယ်အရိုင်းများ၊ ကုလားမရမာ၊
ပြီး၍လာသည်၊ ကိုယ့်မှာသားမယားနှင့်၊ တသောသောလာကြရာ၊ စစ်တကောင်းသည်၊
ဖလောင်းမင်းနီရာသို့၊ ရောက်ကြလာတုံပြီးမှ၊ ခမ်းငြိမ်းသာယာ၊ ဟိကြပါသည်၊ ထိုခါတဲအံ့ချ၍၊
ဆိုင်းသော်နီကြခါဝယ်၊ ဝန်တင်ကျွဲနှင့်၊ တိုက်ကျွဲတောင်းလတ်ပါက၊ စုဆောင်းကာရှာလျက်ပေ၊
လိုသည့်ဝန်ကို၊ ယင်းမှာပီးဆက်သည်တည်း။ စံရီဖွေကျွန်းအုပ်ကား၊ ဖလောင်းသျှေသာ၊
ကျီစိုးအရာစား၍၊ ငှုဝီငြားပီးလျက်ပင်၊ ဝန်တင်လှည်းကို၊ အုပ်ချုပ်၍စီရင်၏။
ဗိုလ်ချုပ်လျှင်မာရသျှိန်၊ ဝမ်းကြီးသာ၍၊ ယင်းခါချီမွမ်းပီးလျက်၊ ရင်၌မွီးသားပမာ၊ လုံးလှပွတ်တန်၊
မေ့သက်နှံကို၊ အမှန်ချစ်နှစ်ပါ၏။ (အဆက်ပြတ်)

ရာပသိမ်သတ်၊ မင်းမြတ်နှုတ်ရွှီစာနှင့်၊ ရခိုင်မှာမှူးမတ်ကား၊ အောင်ကျော်ပန်းရွှီ၊ သော်တလီသည်၊
ငါ့ဆီရောက်စီသောဟု၊ ခေါ်ယူငြားလီသောခါ၊ ပွင့်သစ်ပန်းသွင်၊ မေ့သက်သျှင်သည်၊
သခင်ရောက်လီပါက၊ ဝမ်းပန်းသာအားကြီးရ၊ ရင်၌မွီးသည်၊ သားကြီးပင်မကတည်း။
ချစ်မြတ်လှဆိုလျက်ပေ၊ ခုနှစ်ဆက်သည်၊ ကောင်းမှုဟိဖူးလီ၍၊ တို့ကြိုသည်မှန်တည့်တည့်၊
ပွင့်လောင်းလျှာသည်၊ သခင်ဘုန်းကြောင့်တည်းလေး။

ဘုန်းကြောင်ဧကန်၊ တို့ကြိုပြန်သည်အမှန်သာ၊ မင်းမြတ်စွာနှုတ်တော်က၊ ကုမ္ဘာဏီသည်၊
အသျှင်ရိုးကိစ္စ၏၊ လိုသမျှအကုန်ပေ၊ ကြိုးစားဆောင်ကြံလျက်၊ မှန်မှန်ထမ်းရွက်ပေက၊
ရခိုင်ပြည်ရကာလ၊ စိတ်ဟိရာကို၊ ထိုခါကြံတွေးဆလျက်၊ လိုသမျှအကုန်ပေ၊ ငါမစ၍၊
သူကောင်းပြုခမည်ဟု၊ ဟမြွက်ထွေဆိုသောခါ၊ မေ့သခင်သည်၊ ယင်းတွင်ဝမ်းကြီးသာလျက်၊
နောက်ကိုသာမျှော်ထောက်ထား၊ အခမေးနာ၊ သူကားငွေတပြားမျှ၊ မစားမယူပါ၊ လိုသရိကို၊
ထမ်းပိုးရွက်ဆောင်ပါ၍၊ အရှိမှာရန်ငှမ်ဝယ်၊ ငါးရာလူကို၊ လျှင်လျှင်လွတ်ချင်သည်ဟု၊
ဟမြွက်ထွေဆိုလတ်ခါ၊ ကောင်းရာလူကို၊ လွယ်ကူရွှီးချယ်ပါလျက်၊ ငါးရာသာရခိုင်သား၊
မေ့သက်သျှင်သည်၊ ယင်းတွင်ပီးတုံငြားက၊ လှီသဘောနှစ်စင်းမှာ၊ တင်ယူဆောင်၍၊
လျှင်အောင်လားလီပါ၏၊ ပညာခေါ်လမ်းထွင်သား၊ ငါးရာလူကို၊ လွယ်ကူတောင်းလတ်ငြားလည်း၊
ရခိုင်သားလူငါးရာ၊ ဖောင်သာရှိကို၊ အကြီးခန့်အပ်ပါ၍၊ ဣသျှိကာကာတင်သတ်၊ ဣရာဇီကို၊
အကျွန်လက်တည့်အပ်က၊ လွန်ချစ်မြတ်ဝမ်းကြီးသာ၊ ရခိုင်သားသည်၊
ဘေးကပ်ငါးထောင်ကျော်နှင့်၊ သူရဲတော်ရို့စီးနင်းရန်၊ လှီများအားလုံးစွာကို၊
စုဆောင်းကာရှာ၍ပေ၊ ပွင့်သစ်ပန်းဟန်၊ မေ့သက်နံ့သည်၊ လျှင်မြန်ပီးအပ်သည်တည့်။
ရခိုင်ပြည်လားဖူးသူ၊ ကုန်းကြောင်းလမ်းနှင့်၊ ရီကြောင်းလမ်းနှစ်ပါးစုံကို၊ ပြနိုင်သူပီးရမည်၊
ရခိုင်ပြည်ခြင်း၊ နိပုံခင်း၍၊ လျှင်ပြင်းခုပြပေလော့၊ ဟမြွက်ထွေဆိုလတ်ခါ၊ နိပုံခင်း၍၊
ချက်ချင်းပြသပါလျက်၊ လမ်းသိမှာထွန်းပေါ်ဝေ၊ ဖသက်နံ့နှင့်၊ ချီးခံသတိုးဝေကို၊
ခေါ်ယူထွေတုံပြီးခါ၊ ကတ်တင်ဟူမှတ်၊ ဒေါင်ရောင်မော်သတ်ကို၊ လွတ်လွတ်ပီးအပ်ပါက၊
ဝမ်းကြီးသာအားပါးရ၊ သျှင်မင်းကြီးကို၊ ယင်းတွင်ချီမွမ်းကြ၏၊ ခုပြီးမှငါလားမည်၊ ရဲဗိုလ်ပါလည်း၊
မကြာခုစုံစီဟု၊ ဟမြွက်ထွေဆိုသောခါ၊ သိန်းသန်းကုဋီ၊ ဗိုလ်ခြံအများလာလျက်၊ ခြံရင်းတွင်စုရုံး၍၊
များဗိုလ်ပါသည်၊ မကြာရောက်လာ၏လေး။

ရောက်၍ဧကန်၊ ချီတက်ပြန်မည်အမှန်သာ၊ မင်းမြတ်စွာနှုတ်တော်က၊ ရောင်ဇနောင်ကို၊
ယင်းတွင်အဏာချ၍၊ သဘောနှင့်လိုရို့မှာ၊ သူရဲပျံသည်၊ အမှန်ရဲမက်တော်လည်း၊
ဂုရာသာစီးရမည်၊ ပြောင်းကြီးဇဝါ၊ ဗုံးစကြာကို၊ ယင်းမှာတင်ယူပေလော့၊
ကုန်းကြောင်းဝယ်တစလား၊ ရထားမြင်းဆင်၊ လှည်းငင်ဝန်တိုက်နွားနှင့်၊
ရဲမက်များထောင်သောင်းကို၊ ရခိုင်ဗိုလ်မှတ်၊ ဒေးသျှိန်သတ်သည်၊ မပြတ်တပ်ဦးချီလော့၊
နောက်ရပ်မြီသူရဲဖော်၊ စပါအိတ်သည်၊ ဟိန္ဒူတ်သားနီသာတည်း။ (-----)၊
မြင်းစီးမှာမောင်းဝွတ်က၊ မီးကျည်တန်ခေါ်၊ လက်နက်တော်ကို၊ လျှင်စွာယူဆောင်ခလော့၊
သေနပ်နှင့်လှဲကမံ၊ လက်နက်များကို၊ ပီးအပ်နံ့၍၊ ကြီးစည်သံဗောမူတ်ကာ၊ ခရာထွက်သည်၊
တိမ်ထွတ်ထက်အာကာမှ၊ တီးမူတ်လာဟန်မပြား၊ သောင်းဇမ္ဗူဝယ်၊ ထိန်ဆူကျော်နံ့ကြားမျှ၊
တသောသောချီကြခါ၊ ရာပသိန်သတ်၊ မင်းမြတ်၏နောက်တော်ဝယ်၊ ပွင့်လောင်းလျှာမေ့ကြင်စ၊
ကပ်၍ပါသည်၊ ဆံမြွာမယွင်းခွတည်း။ မှူးမတ်ကားအထဲမှာ၊ ဖွဲ့ဒါကြီးသည်၊
အသောင်းအဒုလာနှင့်၊ အဟောဒါမာတဒိန်၊ အစီရင်ထွေ၊ တိုးအောင်ကြွယ်သည်၊
အကယ်ပါလျှင်းလီ၏၊ တိုင်းရပ်မြီရခိုင်မှာ၊ ဒါးပိုင်ကြီးသည်၊ ရှိကအမတ်တော်၏၊
ရင်တွင်းမျှော်ကျူး၍ဖွား၊ ထိန်ထိန်ဆူသည်၊ ဇမ္ဗူကျွန်းလုံးကြား၏၊ သားကြီးကားအမ်းစားသာ၊
မေ့သက်သျှင်လည်း၊ ယင်းခါနောက်တွင်ပါလျက်၊ ခေါ်တွင်ကာတိမ်ကြားဗိုလ်၊ မာလုံသတ်သည်၊
ရီကြောင်းချီလီဆိုက၊ နောက်တော်ကိုပါလီငြား၊ သိန်းသန်းဗိုလ်ခြံ၊ အသံချီသည်၊

မြီဝယ်မွန်းမျှလား၏။ ချီတက်ငြားလားလီခါ။ စစ်တကောင်းသည်။ မြစ်မကိုကူးပါလျက်။ တက်လီသော်လက်ဝဲနား။ ဘောင်းဒွတ်တောင်ကို။ ပါယ်ယောင်လွန်ကျော်လားက။ လက်ယာနားပြင်ကြီးသာ။ ဖောက်ကျီစိုးကို။ လွန်၍လားလီပါလျက်။ ကန်ရှည်မှာဆိုက်မနား။ ဟာလဘင်းခေါ်။ စုက္ကရာကို။ လျှင်စွာချီတက်လားသော်။ ရီကင်းနားဆည်ကြီးသာ။ ပတ္တလီကို။ ထိုခါဆိုက်ရောက်ပါ၍။ ပင်းဝါရွာမရောက်ခင်။ ရခိုင်ဝန်သာ။ မောင်စံပျော်သည်။ ယင်းမှာကြားလီကျင်၏။ သားမောင်ပင်ငိုက်ကေ။ ငါရို့သက်သည်။ အခုသီရမည်ဟု။ ဖက်ယပင်းငိုကြခါ။ အတွင်းဝန်သည်။ မှန်မှန်ကြားလီပါ၍။ ကြောက်ဝှန်ကာတုန်လှုပ်ငြား။ မိုးဦးခါသည်။ ဖားသော်မြည်သောလားသို့။ တသောသောငိုလျက်သာ။ တပ်လုံးသားသည်။ ထွက်လားပြီးလီပါက။ ဖမ်းဆီးကာရှာမရ။ တစစ်အောင်သည်။ ငရို့အသျှင်ဘုန်းကြောင့်နှင့်တည်း။ ချီတက်ကြွလိုက်လီခါ။ ဖလောင်းချိတ်မှာ။ လျှင်စွာရောက်တုံပါလည်း။ တောင်ကိုသာမျှောင်ကာလား။ ရဲစုချောင်းလွန်။ ချီတက်ပြန်သော်။ အမှန်မတန်မနားတည်း။ ပန်းမော်ကားလက်ဝဲသာ။ သင်းပေါင်းချောင်းကို။ ပါယ်၍လွန်ခပါလျက်။ မြင်းမျက်နှာတောင်အနား။ လားလီပါသော်။ ငတ်မော်ဆိုက်ရောက်ငြားက။ ရဲမက်များသိန်းဗိုလ်ပါ။ ညောင်းညာဖြီလျက်။ ဆိုင်းငုံနီရပါသည်။ မောင်တောတပ်မှာတည်းလေး။

မောင်တောတပ်မှာ။ ဆိုက်ရောက်ပါသည်ယင်းခါတွင်။ ဉာဏလျှင်မြို့စာရွီး။ လက်ဝဲဖက်မှာ။ တပ်မတော်ကို။ ဖြိုကာထွက်၍ပြီးလျက်။ ကြောက်ဝှန်ကြီးတုန်လှုပ်ကာ။ အောက်သားပျက်သည်။ လျှို့ဝှက်နီလီပါက။ ယင်းသောခါငရို့သခင်။ အနောက်ငယ်ကို။ လက်ဝယ်သိမ်းယူကျင်၍။ အစလျှင်ပဌမ။ နှောင်းဖော်ရွီကို။ ကျွန်းအုပ်ခန့်ပီးခလျက်။ ချီတက်ကြွလားကြခါ။ အလယ်ညာ။ ကုလားရွာမှာ။ လျှင်စွာရောက်လီပါက။ ယင်းတွင်သာဆိုက်မနား။ ကျောက်ပန်းစွယ်ကို။ လက်ယာပါယ်ယောင်ထားလျက်။ တသောသောချီကြခါ။ ပြည်ထိပ်မှတ်သည်။ မယူနတ်ကြီးမော်သို့။ ဆိုက်ရောက်ခါတုံပြီးမှ။ များဗိုလ်ပါသည်။ ယင်းတွင်တပ်ကြီးချ၍။ တန်ရပ်ကြနီသောခါ။ (-----)။ သင့်ရာသားနှင့်။ မိမ္မသားသူငယ်များ။ ဥပမာသည်။ သားလင်ရောက်လာငြားသို့။ ရွှင်ပျော်ပါးဝမ်းကြီးသာ။ (ဆက်) အဖူးလက်ဆောင်။ များမြှောင်ပို့ဆက်လာ၏။ ချီတက်ကာတသောသော။ ဦးရာဇ်တောင်သည်။ သျှင်ပင်ခါတ်ရောက်ငြားက။ အထွတ်ဖျားစေတီမှာ။ တင်းခွန်ကုက္ကား။ မုလေးပွားကို။ လျှင်ငြားပူဇော်ပါလျက်။ လားလီကတုံခါပေ။ ကုလားပုံးကို။ လက်ဝဲထားခသည်တည့်။ ဆင်ခံဝယ်ဆိုက်ရောက်က။ ငရို့သခင်သည်။ ယင်းတွင်တပ်ဦးချလျက်။ ကုလားကအဟောဒါ။ မာတဒိန်ကို။ စာနှင့်စီလွတ်ပါ၏။ ချောင်းဖလာတပ်ထဲဝယ်။ တလိုင်းအောက်သား။ သျှမ်းအများကို။ လျှင်လျှားထွက်လားစေဟု။ ကြိကာပေနီသောခါ။ နင်ရို့များသည်။ ကျင်းကျင်းအကုန်စွာကို။ ရဲမက်တော်ဂူရာက။ သတ်ဖြတ်မည်ဟု။ အကယ်တည့်တည့်ပြော၍။ ခုလျှင်လျှားတုတ်နှောင်မည်။ တမန်လွတ်လျက်။ ခေါ်ပတ်ပြောတုံပေလည်း။ နားမလည်အောက်သားမှာ။ ကောင်းမည်ထင်ဗျာ။ ယင်းတွင်တွင်းတူးပါလျက်။ ကြွက်ဟန်သာနီတုံငြား။ စာရွီးကြီးသည်။ ငဝိုက်ကေနှင့်။ နားခံမောင်လုံးများရို့။ အမှားမှားနီကြခါ။ ငရို့သခင်သည်။ ယင်းတွင်မာန်ကြီးပါ၍။ ဂေါ်မိတော်မော်သတ်နှင့်။ မောဇော်ကတ်တင်။ သောက်သတ်လျှင်လည်း။ ခုပင်ချီလားကြဟု။ နှုတ်သံမြချခါဝယ်။ ရီဗိုလ်ချုပ်သည်။ လျှင်စောချီတက်လီ၍။ တိုက်ကြပြီးတုံသောခါ။ သျှမ်းအောက်သားသည်။ ပြီးငြားမလွတ်ပါတည်း။ နားခံတော်မောင်လုံးမှာ။ လက်ဝါးပေါက်လျက်။

ပုန်းရှောက်ထွက်ပြီးလီ၏။ ငဝိုက်ကေစာရွှီးမှု၊ အောက်သားများသည်၊ သဲဖျားကြွလှုပ်တုန်မှု၊ အငတ်မှုမစစ်သာ၊ လင်းကဲအသွင်၊ တောထဲဝင်၍၊ ယင်းတွင်ပြီးလီပါက၊ ချောင်းဖလာတပ်ကြီးကို၊ ဘုန်းတော်အားနှင့်၊ လျှင်လျှားတိုက်ခိုက်ဖြိုသည်၊ ပြီးသို့စကားကြောင့်လေး။

ပြုံးသို့မှန်စွာ၊ တိုက်ကြပါသည်ယင်းခါတွင်၊ အုန်းတပင်တပ်မမှာ၊ မိုးကောင်းဗိုလ်နှင့်၊ ငချေးကြားလီပါက၊ ကြောက်ဝုန်ကာတုံလှုပ်ငြား၊ တပ်လုံးသူသည်၊ ဆောင်းတွင်ချုပ်ထားငါးသို့၊ သီမိမောအသွယ်သွယ်၊ ကြောက်ဝုန်ကြီး၍၊ ထွက်ပြီးကြလီ၏။ ချီတက်ပေငရို့သခင်၊ ကျွဲခြံတောင်မှာ၊ လျှင်စွာဆိုက်ရောက်ကျင်က၊ များလူသျှင်ရဲမက်တော်၊ ကျွဲနွားတောင်းလတ်ပါသည်၊ ပွင့်လောင်းလျာမေ့သခင်၊ ရခိုင်ပြည်ဝယ်၊ ဟိသည်လူမွန်းဖျင်ကို၊ စုလုံးကျင်ခေါ်သောခါ၊ သလွန်တောင်ကို၊ စီရင်အုပ်ထိန်းပါလျက်၊ ကျွန်းအုပ်သာငရှောက်ဖွေ၊ တောင်ဖက်ကျွန်းကို၊ ထိမ်းသိမ်းစီရင်ပေ၍၊ ဖော်ရီသည်ကျွန်းအုပ်ကား၊ ဝမ်းကြီးသာ၍၊ လျှင်စွာရောက်လာငြားတည့်။ မူဇဲကကျွန်းအုပ်သာ၊ ငကြောင်ပြိန်းတော၊ လျှင်စောပေါက်ချလာလျက်၊ စစ်တွေမှာကောင်းစံရွှီ၊ တောင်ရင်းကျွန်းနီ၊ ပေါ်ထွန်းဝီနှင့်၊ ပြသျှေဝင်းကျွန်းနီ၏၊ ပြားကျွန်းဆီအသက်နံ၊ ကျိန်းရိုနောက်မှာ၊ ကျွန်းအုပ်မောင်သာကြံလျှင်၊ လာကြပြန်တုံသောခါ၊ ပြည်လုံးသားသည်၊ သောသောရုရုဆာ၍၊ ဆိုက်ရောက်လာတုံပေက၊ မေ့ချစ်မောင်သည်၊ ယင်းတွင်အားကြီးရ၏၊ လိုသမျှကျွဲနွားပေ၊ ဆန်ရီစပါး၊ ဆီပျားထောပတ်များကို၊ ယူဆောင်လာဆက်ပီးခါ၊ ချီကြရာတသောသော၊ ပါးတော်တောင်မှာ၊ လျှင်စွာဆိုက်ရောက်ငြားက၊ တောင်ထိပ်ဖျားအထက်မှာ၊ အောက်သားများကို၊ လွတ်လပ်မျှော်ခီပါက၊ ရခိုင်သားစဖာအိပ်၊ တပ်မင်းမြဖော်၊ သုဗတာနှင့်၊ ဂူရာနစ်ပါး၊ ဖိလျက်တိုက်သတ်ပြီးတုံလီခါ၊ ပုခန်းဗိုလ်သည်၊ နေမျိုးသူရိန်သာတည်း၊ မက္ကရာမြို့သူကြီး၊ မျက်စိပြောင်းပြန်၊ ထိပ်ဆံအသက်ပြီးလျက်၊ ဟစ်ကြော်ကျီးမြည်၍သာ၊ စိုက်စိုက်မတ်မတ်၊ တန်းလျက်ပြီးလီပါသည်၊ ကိုယ့်ရွာရောက်အောင်တည့်လေး။

ရောက်အောင်ကိုယ့်ရွာ၊ မက္ကရာသို့ပြီးခါတွင်၊ ချီတက်ကျင်လိုက်လီခါ၊ ဇီးဇာပြင်မှာ၊ လျှင်စွာဆိုက်ရောက်ပါက၊ ထိုဖက်မှာမဟာထီး၊ ငါးရကောက်ခေါ်၊ ချောင်းနားမော်ဝယ်၊ ဟိသည်တပ်မကြီးကို၊ မြင်ကတ်ပြီးတုံသောခါ၊ ဗိုလ်ချုပ်မင်းသည်၊ လျှင်ပြင်းချီလားပါ၍၊ သူရဲတော်ဂူရာများ၊ တောင်းလောင်ကျီကို၊ အညီစိုင်းသင့်ထားလျက်၊ လက်ယာနားမြင်းစီးသာ၊ ဟိန္ဒုတ်သာနီ၊ နီသည်လက်ဝဲမှာတည်း။ ရခိုင်သာတပ်ဦးက၊ ကြီးစည်တီးကာ၊ ဗောမူတ်ပါသည်၊ သံဝါခြိမ်းမောင်းငြာလျက်၊ ချီလားကြတိုက်လီခါ၊ မဟာထီးမှာ၊ တပ်များကုန်အောင်စွာကို၊ ဖြိုဖျက်ကာလွင့်လီက၊ ဇေတဗိုလ်သည်၊ ကြိရာရှာမရတည်း။ ပုခန်းကဗိုလ်မင်းသာ၊ သူရဲကြီးမှု၊ တပ်လုံစိုးအုပ်ပါလျက်၊ ငိုကြရာတသောသော၊ ကျားကိုမြင်သော်၊ သမင်မြိုင်ချောင်တောက၊ ကြောက်ဝုန်ငြားတုန်လှုပ်ကာ၊ အောက်သားများသည်၊ မပြားယင်းပမာသို့၊ ထွက်လားကာအသွယ်သွယ်၊ တောတောင်ဦးဖျား၊ ပြီးငြားပုန်းယှောင်လီ၏။ ချီကြပြီးလားလီခါ၊ ပေါင်းတုတ်ပြင်မှာ၊ သခင်ဆိုက်ရောက်ပါက၊ ဆိုင်းရပ်ကာဗိုလ်လူများ၊ တပ်တောင်တာကို၊ ထိုခါကြည့်ရှုငြားက၊ မြို့အနားတောင်ရို့မှာ၊ အောက်သားများသည်၊ မည်းမည်းပြုတ်ပြုတ်ဆာလျက်၊ ကွန်းစီးခေါ်ပေါင်းဝဝယ်၊ ရခိုင်ဝန်သာ၊ မောင်စံပျော်နှင့်၊ နားခံငကျွတ်ကေတည်း။ ငဝိုက်ကေစာရွှီးတော်၊ မြို့သူကြီးကား၊ ကြီးကြပ်အုပ်ပြုပါ၏။

ပန်းဒလေဝန်ဟောင်းသာ၊ ပေါင်းကာစု၍၊ သောသောရုရုဆာလျက်၊ တပ်စွဲရာမြီကတုတ်၊
တောင်ထိပ်ထက်တွင်၊ တောမျောက်သွင်သို့၊ ပေါင်လျှင်မဲပုတ်ပုတ်နှင့်၊ ဆန္ဒီရုပ်ကြောက်ရွံ့ဖွယ်၊
အသားမည်းမည်း၊ သွားကြဲကြဲသည်၊ ဂေါင်းလည်းစုတ်ချွန်းသွယ်တည်း။
ခွတ်သတ်မည်အဟန်ယောင်၊ စာရွီးကြီးထွေ၊ ငဝိုက်ကေလည်း၊ လက်ခုပ်တဖောင်ဖောင်နှင့်၊
ပုဏ္ဏားတောင်အထိပ်မှာ၊ ခေါ်တွင်ကြသည်၊ ညာဏအောက်သားသော်ကား၊ တပ်နှင့်သာစီး၍ပေ၊
လီသာတောင်သည်၊ မြင့်ခေါင်အထိပ်ဝယ်၌၊ ဗိုလ်လုပ်သည့်မြို့အုပ်သာ၊ မောင်ဗျဲဟူငြား၊
သျှမ်းအောက်သားနှင့်၊ ငပွင့်တပ်ဟိပါလျက်၊ ကခုန်ကာတသောသော၊ သတ်မည်ယောင်သည်၊
ဟန်ဆောင်တကားကားနှင့်၊ ဗိုလ်ချုပ်ကားအတွင်းဝန်၊ ငမောင်စသည်၊ နောက်ကပုန်းနီပြန်၏။
ကြောက်ခြင်းဟန်ပြင်မထုတ်၊ ဝသဲဖက်မှာ၊ ပုန်းယောင်ပါ၍၊ ထိုခါဥပါယ်ပြုလျက်၊ စစ်မှုစီရင်၊
ကြောက်ဟန်ကြီး၍၊ ကြောင်းလမ်းခုတ်ထွင်ပြန်၏။ ငကျော်ဇံမုဆိတ်ရှည်၊ ပြည်လုံးသားကို၊
မို့လျက်ဝုံးတိုက်သည်ကား၊ သတ်ရမည်ရခိုင်ကို၊ နိမပျက်သာ၊ တိုးတိုးချပ်ချပ်ဆိုလျက်၊
မျက်နှာလိုခံ၍ပေ၊ မြို့ဝင်းထဲတွင်၊ ပုန်းလျက်ဝင်ကာနီသည်၊ မှန်မှန်ပြီးလို၍လေး။

ပြီးမည်ကေန်၊ နီကြပြန်သည်အမှန်သာ၊ ယင်းသောခါငရို့သခင်၊ ရာပသိန်သတ်၊
မင်းမြတ်နှုတ်ရွှီစင်နှင့်၊ တောင်ထိပ်တွင်တပ်များကို၊ ခဏချင်းနှင့်၊ လျှင်စောတိုက်ကြဆိုလျက်၊
အာဏာကိုပီးသောခါ၊ ဇော်နော်ဟူပြီ၊ မာရိသျှိန်သည်၊ ခြိမ်းမဲတိုက်မောင်းကြော်၍၊
ဝမ်းကြီးသာအားကြီးရ၊ ရဲမက်တော်ကို၊ စိုင်ကာအသင့်ချလျက်၊ တီးမှုတ်ကြအသွယ်သွယ်၊
ပုလိစောင်းညှင်း၊ ကြီးနင်းစည်ပုတ်ကေနှင့်၊ ခရာသည်နှံသံကောက်၊ စည်ကြီးတီးကာ၊
ဗောမှုတ်ပါသည်၊ ပြည်ရွာထိန်လန်ချောက်မျှ၊ တယောက်တစစီ၊ အောက်သားတပ်ကို၊
နင်း၍တိုက်သတ်လီ၏။ လက်နက်ဝယ်ဗုံးစကြာ၊ တချက်ပစ်သော်၊ ထွတ်ဖျားထက်အာဏာသို့၊
တက်လီပါတိုပြီးမှ၊ သက်လတ်ပါသည်၊ အာကာမိုးပေါက်ကျသို့၊ ဆင်မြင်းကလူသူမှာ၊ မှန်သရီကို၊
ထုံးပုံ၏ဟန်ပမာသို့၊ ကြိမ္မကာသီဆုံးပျောက်၊ မီးကျည်တန်းသည်၊ အမှန်ထိုလက်နက်ကို၊
တချက်ပစ်လွတ်သောခါ၊ တိမ်ကိုခွဲ၍၊ ဝဲလျက်တက်လီပါ၏။ ထက်အာကာမိုးကြီးသံ၊
သက်လာကျ၍၊ မို့လျက်သတ်ခြင်းဟန်ကား၊ ခုန်လွှားပျံဝဲကာကာ၊ ချောက်မြောင်တောင်ကြား၊
ပုန်းလျှိုးငြားလည်း၊ ပြီးလားမလွတ်ပါတည်း။ သုံးရက်သာဝီဝင်းဝင်း၊ တိုက်ကြပါသည်၊
တောတောင်မြိုလုံးလင်းမျှ၊ တိုင်ပင်ငြားတနည်းမှာ၊ လီသာတောင်ကို၊ ဦးအောင်နင်းကြပါဟု၊
ချလတ်ခါတိုပေက၊ ဇော်နော်ခေါ်မှတ်၊ ဇီရီသတ်သာ၊ လွတ်လွတ်ချီလျှင်းပါလျက်၊
ဂူရာသည်ရိုဦးတပ်၊ တောင်လောင်ကျီလည်း၊ ယင်းခါနောက်ထပ်ကပ်၍၊
ညဉ့်တလပ်သန်းခေါင်တွင်၊ လီသာတောင်ကို၊ လျှင်အောင်တက်တိုက်ကျင်က၊
မျက်တောင်ပင်မခတ်မှီ၊ မြို့အုပ်ခေါ်ထွေ၊ ငမောင်ဗျေသည်၊ လွယ်လွယ်ပြီးလားလီ၏။
ပုဏ္ဏားဆီတောင်ထိပ်မှာ၊ ခေါ်တွင်ကြသည်၊ ညာဏအောက်သားသော်ကား၊
ကြောက်ဝုန်ကာတုန်လှုပ်ငြား၊ ပြီးလားလီသည်၊ အိမ်မှာသားမယားကို၊ စောင်းလှည့်ငြားမကြည့်ခင်၊
ကိုယ့်အသက်ကို၊ လွတ်ကြောင်းပြီးလီကျင်၏။ ကွန်းစီးလျှင်ပေါင်းဝမှာ၊ တပ်တွင်ဟိငြား၊
သျှမ်းအောက်သားသည်၊ သောသောရုရုဆာလျက်၊ ပြီးလီခါတိုကပေ၊ မောင်စံပျော်နှင့်၊
နားခံကျက်ကေတည်း။ ငဝိုက်ကေမောင်ရဲသာ၊ လေးယောက်စုံသည်၊ ပူးတုံဖက်ကြပါလျက်၊
ငိုကြရာတသူတ်သူတ်၊ ကြက်သိမ်းဝုန်သည်၊ လိပ်ပြာထွက်လုတ်လုတ်တည်း။
ဆန္ဒီစုတ်မျောက်ရီငန်၊ သူငယ်သားကို၊ ဖမ်းစားသည့်ဟန်သို့၊ မျက်ဆန်သာခပြူးပြူး၊ ဆံပင်ဖားရား၊

ဝမ်းဖားဖားသည်၊ ခြံကိုကားရားပြုလျက်၊ ဖားပြုတ်အသွင်၊ သျှမ်းအောက်သားရို့၊
ပြီးငြားကျင်သည်၊ ငွေတောင်ပေါက်ဝကလေး။

ငွေတောင်ပေါက်က၊ ပြီးလားကြသည်ယင်းမှသာ၊ ဗိုလ်ချုပ်ခေါ်တွင်၊ ဝန်ငမင်သည်၊
သဲဖျားကြသိမ်းဝှမ်း၍၊ အကြံကိုရှာမရ၊ ပြီးလားကြသည်၊ ဘီလူးမတန်းခါးမှတည့်။
ပန်းစီးမြောင်းကိုလွန်၊ မိုးကြိုးဂျိုင်ကို၊ စိုင်ကာလားလီပါလျက်၊ ဝက်ချောင်းသာပယ်လွန်ငြား၊
တက်လီပါသော်၊ ချင်းရွာတောင်ခြံနားက၊ ပုန်းလျှိုးငြားကုတ်ရှုတ်ကာ၊ ဗိုလ်ချုပ်ဧကန်၊
အတွင်းဝန်သည်၊ အမှန်ပြီးလီပါက၊ ရှာကြရာတသောသော၊ ဂျီဒရယ်သည်၊
ဆတ်ငယ်ကိုယ်အလားသို့၊ လမ်းစပ်ကြားခြံထဲမှာ၊ မြို့သူကြီးကို၊ အလျင်ဖမ်းမိပါ၏၊
သက္ကရာဇ်မှာတထောင်ဖြစ်၊ တရာသျှစ်ဆယ်၊ စွန်းဝယ်သျှစ်ခုနှစ်က၊ တန်းခူး၏လဆန်းမှာ၊
ဆယ့်လေးရက်သည်၊ သောက်ကြာနိတွင်သာတည်း။ တပိုင်ကျော်နီထွက်ဝယ်၊ ရန်ခပ်သိမ်းကို၊
ပျောက်ငြိမ်းအောင်မြင်ပေက၊ ဝမ်းသာထွေအားရကျင်၊ ခညဝတီ၊ ရခိုင်ပြည်ကြီးတွင်၌၊
ပုရိန်ပြင်အထဲမှာ၊ မြသွင်နတ်ကို၊ ပသပူဇော်ပါလျက်၊ ကောင်းသည့်ခါနီရက်ဝယ်၊ ရဲမက်ဗိုလ်ပါ၊
လူတကာကို၊ ယင်းမှာစုရုံးစီ၍၊ ရခိုင်ပြည်မြို့ထဲမှာ၊ ဘာသာလျှောက်၊ ပြောင်းမီးပေါက်သို့၊
ပစ်မြောက်ပူဇော်ပါလျက်၊ အောက်သားသာပိုင်ကာလ၊ သျှင်ဘုရင်မှာ၊ နန်းသက်ဖော်၍၊
ရွှေဂူစေတီမဟု၊ ခေါ်တွင်ထလူတကာ၊ တိုက်ဝန်မင်းသည်၊ တည်ရင်းစေတီတော်ကို၊
ဖြိုဖျက်ကာပစ်လျက်ပေ၊ ယင်းတောင်ထိပ်မှာ၊ အိမ်ကြီးဆောက်လုပ်စီ၏၊
ငရိုးပြည်ဝယ်သျှင်မင်းကြီး၊ ကောလိယရာဇာ၊ တည်လုပ်ပါသည်၊ သျှင်တော်မဟာထီးကို၊
ချိုးဖဲ့ပြီးလွင့်ပစ်ကာ၊ စောမွန်တည်ပြု၊ မင်းဗာလုပ်သည်၊ တံတိုင်းမြို့ဝင်းတော်ကို၊
ဖြိုဖျက်ကာပစ်၍ပေ၊ သိုက်စာထွက်ကို၊ သျှမ်းအောက်သားသည်၊ လိုက်လျှင်းပြုကြသည်တည်း။
နောင်ခါဝယ်တုံပြီးမှ၊ မေ့သက်သျှင်ကို၊ ယင်းတွင်အာဏာချလျက်၊ ဂူရာနှင့်မြင်းစီးသာ၊
စဖာအိတ်သည်၊ နီဖို့လှိုင်းအိမ်တော်ကို၊ ဆောက်လုပ်ကာပီးရမည်၊ တောင်းလတ်ပါသော်၊
လွတ်လပ်ခန့်ခွဲပေလျက်၊ ဝါးသက်ကေကြိမ်သစ်ပင်၊ ဗဲကပ်သားနှင့်၊ လျှင်စောဆောက်လုပ်ကျင်၏။
ရာထောင်ပင်အိမ်မက၊ လုပ်ရပါသည်၊ ယင်းခါတဌာနတည်း။ ခေါ်တွင်ကြလူတကာ၊
ရာပသိန်သတ်၊ မင်းမြတ်နှုတ်ရွှေဝါနှင့်၊ ဟမြွက်ကာချလတ်သည်၊ ရမ်းပြည့်မြို့နှင့်၊
သံတွဲမာန်အောင်ဝယ်၌၊ ဟိနီသည့်အောက်သားကို၊ ဇော်နေဟုမှတ်၊ မယ်ကာရီသတ်သည်၊
လွတ်လပ်တိုက်ခီဆိုက၊ ကတ်တင်ဗိုလ်မေဇော်သတ်၊ သင်္ဘောစီးကာ၊ ချီကြပါသည်၊
မြစ်မှာစင်းချင်းစပ်မျှ၊ လွတ်လပ်သာချီလား၍၊ မာန်အောင်မြို့မှာ၊ လျှင်စောရောက်လီ၏လေး။

ရောက်ကြဧကန်၊ တိုက်ကြပြန်သည်အမှန်သာ၊ ယင်းသောခါမြို့ဝန်ကား၊ ရဲစက်ကေသည်၊
ထိုဝယ်သျှမ်းအောက်သားလည်း၊ ကြောက်ဝှန်ငြားမကြံသာ၊ ကိုယ့်မယားကို၊
လက်ဖျားဆွဲကိုင်ကျင်လျက်၊ များတကာဖော်မရ၊ နှစ်ယောက်တည်းပင်၊ တောထဲဝင်၍၊
ခြံတွင်ပုန်းလျှိုးကြလျက်၊ တခဏနီသောခါ၊ ဇော်နော်ခေါ်မှတ်၊ မယ်ကာရီသတ်သည်၊
ဝန်းပတ်ထားလျှင်းပါ၏၊ ဖမ်းဆီးကာယူ၍ပေ၊ နှစ်ယောက်စုံကို၊ လွယ်ကူရလီသည်တည့်။
သင်္ဘောတွင်ဆောင်ပြီးခါ၊ ကုလီကတ္တာ၊ ရွှေမြို့တော်မှာ၊ လျှင်စွာပို့လီပါ၏၊ ရမ်းပြည့်မှာဝန်ပြုသူ၊
မောင်ယံကလည်း၊ အကယ်ကြားလီတုံက၊ မောင်ဗျဲမှုအခွန်ဝန်၊ နှစ်ယောက်လူသည်၊
တိုင်ပင်ပြုကြပြန်၏၊ အသတ်ခံနီးသောခါ၊ ငါတို့သက်သည်၊ ဆုံးပျက်မည်ခန္ဓာတည်း။

သူရို့သာမရောက်ခင်၊ မြို့ကြီးကိုလွတ်ကျင်လျက်၊ ထွက်၍ပြီးကြကျင်အံ့။ ပြောတိုင်ပင်ပြုပြီးခါ၊ အောက်သားမိုက်သည်။ ထွက်လားပြီလီပါ၏။ သံတွဲမှာတဌာန၊ မြို့သူကြီးဟန်၊ ငပန်းစံကို၊ လျှင်မြန်ခွတ်ထစ်ကြ၏။ မြို့ဝန်ကားရွှေမန်းသာ၊ အောက်သားများသည်။ သောသောရုရုဆာလျက်၊ တောင်ရိုးသာစီး၍ပေ၊ ပြီးလားငြားသည်။ အရှိနိုင်ငံပြည်သို့၊ ဖမ်းဆီးဖွေရာမရ၊ သုံးမြို့စုံကို၊ လက်ဝယ်သိမ်းရုံးရ၏။ ပိုးလောက်မျှတကောင်ပင်၊ သျှမ်းအောက်သားကို၊ ငေါက်ငေါက်ထောင်၍မမြင်တည်း။ ရခိုင်တွင်မြို့ကြီးမှာ၊ ရာပသိမ်သတ်၊ မင်းမြတ်နှုတ်ရွှီဝါနှင့်၊ ငရို့ပြည်ရွာကျွန်းများဝယ်၊ တန်သည့်သူကို၊ အရာခန့်အပ်မည်ဟု၊ ဟမြွက်ထွေဆိုပြီးခါ၊ အသီးသီးသည်။ ကိုင်းချောင်းကျွန်းများစွာကို၊ ကျွန်းအုပ်သာချောင်းစားခန့်၊ ပရနဝါ၊ ထိုခါပီးဆင့်အပ်၏။ နောက်တထပ်အမိန့်တော်၊ ရခိုင်သားသည်၊ အများမြို့ကျွန်းရွာ၌၊ ဟိနိုကျင်လူရို့မှာ၊ အောင်ကျော်ပန်းရွှီ၊ သော်တလီကို၊ နှိုင်းယှဉ်ဖက်မဲ့သာတည်း။ ငါ့ထံမှာမြဲခစား၊ အကျိုးတော်ကို၊ ပြီးအောင်ဆောင်ရွက်ငြား၏။ ပိကျွန်းနှင့်ယိုးကျွန်းပေ၊ ဦးရစ်တောင်လည်း၊ ယင်းတွင်ပါလီစီလော့။ ပီချောင်းဝယ်လေးမြို့သာ၊ ယိုးချောင်းနယ်လည်း၊ ထိုခါထည့်လိုက်ပါ၍၊ ကျွန်းအုပ်သာခန့်၍ပေ၊ သားစိုင်မြီးဆက်၊ မပျက်စားရလီအံ့၊ ဟမြွက်ထွေဆိုသောခါ၊ ဖွဲဒါးကြီးသည်၊ လျှင်စောရွီးတုံပါလျက်၊ ပရနဝါဆပ်ကြီးခတ်၊ ငါးရွက်စာကို၊ ထိုခါချက်ချင်းအပ်ကာ၊ မေ့သက်မှတ်ပွင့်လောင်းလျှာ၊ ကျွန်းချောင်းဖျားကို၊ သိမ်းငြားပြုစုပါ၍၊ သင့်ရာရာအလုံးကို၊ ချမ်းငြိမ်းသာယာ၊ မစပါသည်။ ကိုယ့်မှာသားရင်းပမာသို့၊ ရှိပြုကျိုးကုသိုလ်ကံ၊ မိဘရပ်မြီရခိုင်ပြည်မှာ၊ လွယ်လွယ်ရောက်လာပြန်၍၊ ပျော်စံပါးတသောသော၊ မွီးမိခင်သည်၊ နို့သျှင်ချွေးမများကို၊ မခြားဆံတမျှင်၊ နံသည်သက်ကို၊ တရက်မကွာချင်ဘဲ၊ နွဲ့ပျော်ရွှင်နီကြ၏။ ရှိသင်္သာသည်၊ ကြမ္မာဘုန်းကြောင့်တည့်လေး။

ဘုန်းကြောင်းဧကန်၊ နီကြပြန်သည်အမှန်သာ၊ ယင်းသောခါငရို့သခင်၊ ရာပသိန်သတ်၊ မင်းမြတ်နှုတ်ရွှီစင်နှင့်၊ ဟမြွက်ကျင်ပြောလတ်သည်၊ ရခိုင်ပြည်တွင်၊ ဇင်ပထွင်ကို၊ မြို့ဝန်ခန့်အပ်မည်တည်း။ ရမ်းပြည့်ဝယ်ငါလားခါ၊ ဖွဲဒါးကြီးလည်း၊ မပြတ်နောက်တော်မှာ၌၊ ချီလားရာပါရမည်၊ အောင်ကျော်ပန်းရွှီ၊ သော်တလီသည်၊ ငါ့ဆီလိုက်ရမည်ဟု၊ ဟမြွက်ထွေဆိုပြီးခါ၊ ပထွင်သတ်ကို၊ မြို့တွင်ထားလတ်ပါ၍၊ မိုးယမ်းပွဲသော်နောက်ခါဝယ်၊ စစ်တွေကျွန်းကို၊ မြို့ကြီးတည်လုပ်ပေဟု၊ ပြောဆိုထွေယင်းနောက်မှာ၊ သင်္ဘောလို့တွင်၊ ဝန်ဆန်ပျင်၍၊ အလျှင်ချီကြွကာ၊ မေ့ချစ်စယင်းသောခါ၊ မနီရသည်၊ မင်းကြီး၏အာဏာကြောင့်၊ မွီးမေတော်ရွှီနို့သျှင်၊ အလျှင်မွီးသည်၊ သမီးလှပန်းသွင်နှင့်၊ သားဦးလျှင်ထွန်းအောင်ကျော်၊ ထွန်းပမည်ကို၊ ဖခင်အောက်မိကာနှင့်၊ နောက်တော်လားပါလီရာ၊ လားလျှင်းပါသော်၊ ထိုမှဝံဘိုဝံ၌၊ ဆိုက်ရောက်ကြလီသောအခါ၊ လီသင်းခုန်းသည်၊ မုန်တိုင်းဟန်ပမာသို့၊ ထလတ်ရာတုံပေငြား၊ ရှီနို့သျှင်သည်၊ မိခင်ချွေးမများကို၊ အောက်မိငြားတကာကာ၊ တဆတ်ဆတ်သည်၊ မပြတ်လားလီပါ၍၊ ရမ်းပြည့်သည်မြို့ဝယ်သာ၊ အများမကြာ၊ ယင်းတွင်ဆိုက်ရောက်ပါကာ၊ မာန်အောင်နှင့်သံတွဲမှာ၊ ဟိသမျှသည်၊ လူကြီးလူငယ်သော်ကား၊ ဝမ်းကြီးသာအားပါးရ၊ လာကြပါသည်၊ သင်္ကြန်ပွဲမကတည်း။ ရှိတုတ်ကွအသွယ်သွယ်၊ ငရို့သခင်သည်၊ အသျှင်ထံတော်ဝယ်၌၊ ခယထွေနီကြခါ၊ တန်သည်သူကို၊ ယင်းတွင်ရွီးစီပါလျက်၊ ကျွန်းချောင်းမှာအသိသီး၊ သူကြီးအရာ၊ ခန့်အပ်ပါသည်၊ ယင်းမှာဆတ်ခပ်ပြီးလျှင်၊ လွန်ချမ်းငြိမ်းသာယာစွာ၊ လေးမြို့စုံကို၊ ညီအောင်ပြုလျှင်းပါ၍၊ အရှိမှာအင်းဝပြည်၊

သျှင်ဘုရင်ကို၊ ငါပင်တိုက်ချီမည်ဟု၊ နောက်တော်ဝယ်မြဲမကွာ၊ အောင်ကျော်ရွှီနှင့်၊
ဖွဲ့ဒါးလိုက်ရပါအံ့၊ ဟမြွက်ကာဆို၍ပေ၊ သုံးပင်တိုင်သည်၊ လှီယာဉ်သင်္ဘောဝယ်၌၊
လက်နက်ထွေပြောင်းဝေ၊ သေနပ်များနှင့်၊ ခဲယမ်းဗုံးစကြာကို၊ စုံအောင်သာယူ၍ပေ၊
မိင့်သတ်သည်၊ ယင်းခါပါလျှင်းလီ၏။ အေသျှိမ်သော်ရာသတ်၊ သျှင်ဘုရင်မှာ၊
မြတ်ရာစီခန့်လွတ်သည်၊ ဗေတင်တတ်ပုဏ္ဏားတော်၊ နံဒရင်နှင့်၊ အမှာတော်ရွှီးသားသာတည်း၊
နားခံမှာငအုတ်ကေ၊ သားမယားနှင့်၊ မကြွင်းယူလီသည်တည်း၊ ချီတက်မည်တုံသောအခါ၊
မေ့ချစ်စသည်၊ နွမ်းလျစိတ်ဗျာပါနှင့်၊ မွီးမည်တော်ရွှီနို့သျှင်၊ အိုယိုမစွမ်းနှင့်၊ သားကိုတရုကျင်၍၊
လွမ်းပူပင်တလျှက်ပေ၊ ရောဂါစီး၍၊ မချီဟိလတ်မည်ကို၊ စိတ်တွင်ဝယ်တွက်လျှက်သာ၊ မွီးမိခင်ကို၊
မမြင်ခရပါ၍၊ စီးဖြိုင်ကာမျက်ရည်ကျ၊ စိတ်ဆာဝီသည်၊ လီပွိုမုန်တိုင်းထသို့၊
တမ်းရုတအောင့်မိကာ၊ လှီသင်္ဘောတွင်၊ ကျွန်ရို့နောက်တွင်ပါ၏၊ ချီလားရာယင်းကပင်၊
သီတာမြစ်ကို၊ လွင့်ငြားတက်လားလီသည်၊ ရန်ငုမ်မြို့ရွာသို့လေး။

ရန်ငုမ်မြို့ရွာ၊ ထွက်လားပါသည်ယင်းခါတွင်၊ ကမ်းမမြင်သီတာမှာ၊ လိပ်ကျောက်ငါးမန်း၊
ပြွန်းပြွန်းပေါပြန်လာက၊ ငါးဆင်သာရောက်လတ်မှာ၊ ငါးတောက်သူလည်း၊ ရီတွင်ဖြိုထိုးကြ၏၊
လင်းသျှူကပေါ်ကာကာ၊ ရီမီးကျောင်းလည်း၊ ကိုက်မည်ချည်းသာရှာလျက်၊ ပြင်သာမှာတဌာန၊
ပတ်ကာဝန်းကာ၊ ရစ်ကြပါသည်။ ထိုမှာလိပ်ငါးမန်းကို၊ ဆောင်းရှားကားပုံရုပ်ဟန်၊ ငါးဒရည်မှာ၊
ရီတွင်ခုန်လွှားပြန်လျက်၊ ကဇတ်ဟန်သူ့ဘာသာ၊ ငါးသဘင်ကို၊ ယင်းတွင်မြင်ရပါ၏၊
ဝေဘူမှာစိုက်ကာမျော၊ တင်းကျိန်ငယ်လည်း၊ ရီတွင်ငုတ်ကာစားလျက်၊ ဇင်ယော်ကနားပင်းသာ၊
မြစ်လယ်ကြောဝယ်၊ သောသောပျံဝဲကာနှင့်၊ ကြိုးကြာမှာတဌာန၊ အခြီစင်းစင်း၊
လိုင်ကြင်းကြင်းနှင့်၊ ခုန်ဆင်းခုန်ဆင်း၏၊ ရီငှက်မဟသာမှာ၊ မောင်နံနံနှစ်ပါး၊ တူစုံလား၍၊
တောင်ဖျားယှက်ခြံကာနှင့်၊ အစာသာခွန်ကြလျက်၊ လိုင်ချင်းယှက်တင်၊ မြူးပျော်ရွှင်သည်၊
ရီတွင်သဘင်ငှက်ရို့ကို၊ မေ့ချစ်သက်မြင်သောခါ၊ သားဦမိခင်၊ ငယ်ကျွမ်းဝင်သည်၊
ယင်းတွင်မမြင်လာတည်း။ မြစ်သီတာလွင့်ကာလား၊ ဖီးဖီးစိုင်လာ၊ ရံခါမရောက်ငြားဘဲ၊
တလိုင်းများတိုင်းပြည်သာ၊ ရန်ကုန်မြို့တွင်၊ လျှင်စွာရောက်လီပါက၊ သူ့ပြည်ရွာဌာနဝယ်၊
ရီလည်းမတူ၊ စားမှုရွံ့ရှာဖွယ်ကြောင့်၊ ကျွန်နောက်ဝယ်ပါသူများ၊ စာကိုင်ခေါ်ထွေ၊
နားပေါက်ကယ်နှင့်၊ ဖောင်ရွှီမှာခိုင်းစသာ၊ တိုက်စိုးကားတိုးအောင်ကြွယ်၊ အိုးဖောက်ကယ်သာ၊
စံရီဖော်နှင့်၊ တွင်ခေါ်ငကြွင်းယေတည်း၊ ကုလားဝယ်မုန်သီးသာ၊ ဖွဲ့ဒါကြီးမှာ၊
ယောက်ဖတော်တုံပါလျက်၊ ကာလနာလိုက်၍ပေ၊ တနိတည်းမှာ၊ ကျင်းကျင်းစုတေ့သီ၏၊
အစံယေပျာဒါကား၊ လမ်းလားရာမှာ၊ ခန္ဓာစုတေ့ငြားလျက်၊ ခေါ်တွင်ထားလူတကာ၊
ကျီးပင်းရှည်မှာ၊ အကယ်ကျွန်းအုပ်သော်ကား၊ (-----)၊ ဒလဖက်မှာ၊ ဟိသည်တလိုင်းစုဝယ်၊
ရွှင်ပျော်မြူးစားကာကာ၊ လင်နှင့်မယား၊ သမီးသားသည်၊ ပျော်ပါးနီခြင်းရာကို၊
မျှော်ချေမိတုံကာဝယ်၊ ပန်းသွင်မိခင်၊ ငယ်ကျွန်းဝင်နှင့်၊ နို့သျှင်ချွေးမငယ်ကို၊
အောင့်မိချေတုံသောခါ၊ ကိုယ်တွင်အသက်၊ ထိပ်သို့တက်၍၊ ဇောသွီးပြန်လတ်ပါလျက်၊
ကာလနာယှဉ်း၍ပေ၊ အသက်လိပ်ပြာ၊ သူ့ခန္ဓာသည်၊ ယင်းခါထွက်လုဖွယ်တည်း၊
ဖြစ်လတ်ပေတုံသောအခါ၊ အနိစ္စနှင့် ဘုရားသာမပါဟု၊ တိုင်တန်းကာကိုးကွယ်မှု၊
ဖီးခပ်သိမ်းသည်၊ ပျောက်ငြိမ်းချင်းချင်းကုန်က၊ မြို့ရန်ငုမ်ရပ်ကိုဝယ်၊ ပါယ်ယောင်ခ၍၊
ချီတက်လားကြလီသည်၊ အင်းဝမြို့တော်သို့လေး။

အင်းဝမြို့တော်၊ တက်လားပါသည်ယင်းခါလျှင်၊ လက်ဝဲတွင်ဒလပေ၊ သရက်တပင်၊ ထိပ်ဝတွင်၌၊
လျှင်လျှင်ဆိုက်ရောက်လီက၊ ကြွချီတက်လီသောခါ၊ လက်ယာနားမှာ၊ ရန်ကင်းစံရာသာတည်း၊
ခေါ်တွင်ကာနေဖြူ၊ ပါယ်ယောင်၍ချီကြွလားလီမူကား၊ လက်ဝဲတွင်ဟင်္သာတ၊ ထို့နောက်ယုံအောင်၊
ပါယ်ယောင်ဆန်တက်လား၍၊ လက်ယာနားကမ်းဝဝယ်၊ ညောင်ဇရဲဟန်၊ နာမရန်နှင့်၊
ရွှေတောင်မြို့ရောက်လီ၍၊ လက်ဝဲနီမြစ်နားမှာ၊ ပုတောင်းမြို့ကို၊ လျှင်စောရောက်လီပါက၊
တလိုင်းသာသျှမ်းအောက်သား၊ ကုတ်ကာရှုတ်ကာ၊ ပုန်း၍လာသည်၊ ညဉ့်ခါသူခိုးလားသို့၊
လမ်းစပ်ကြားခရီးမှာ၊ ခိုးလျှက်သတ်မည်၊ ဒရပ်လာတုံပါက၊ ချောင်းမြောင်းတောင်ကြား၊
သီပောက်များသည်၊ ရွံ့ငြားမရပါတည်း၊ ထွက်၍လျှင်ပြီးလီခါ၊ ငရို့သခင်သည်၊
လျှင်လျှင်ချီတက်လာလျက်၊ ပြည်မြို့သာရောက်လီက၊ ကိုးသောင်းဗိုလ်နှင့်၊ ယင်းတွင်တို့ကုန်ကြ၏၊
ခေါ်တွင်ထလူတကာ၊ ကြက်တောင်ဗိုလ်ဟု၊ နာမဟိုးဟိုးကျော်လျက်၊ ဇော်နေသာကမိရိသတ်၊
ဗိုလ်ချုပ်ကြီးနှင့်၊ တိုင်ပင်ပြောဟောကြပ်လျက်၊ နှုတ်ကွမ်းဆက်နီသောခါ၊ မျက်မှန်ဗိုလ်ဟု၊
နာမည်ကျော်ဇောပါ၏၊ မေဇော်သာဇောသျှိန်သတ်၊ တပ်ဦးဗိုလ်လည်း၊
ယင်းတွင်ရောက်ပြန်လတ်က၊ စားသောက်ကြအလီလီ၊ ပျော်မှုဆင်၍၊ ယင်းမှာနီကြပေသည်၊
ပြည်မြို့ရပ်ဝယ်တည့်လေး။

ပြည်မြို့ရပ်မှာ၊ နီကြပါသည်ယင်းခါတွင်၊ တလိုင်းလျှင်သျှမ်းအောက်သား၊ မိမ္မဗိုလ်သည်၊
ယင်းတွင်ရောက်လာငြား၍၊ ပြည်မြို့ပါးအနီးမှာ၊ ရသေ့မြို့တွင်၊ တပ်မူစွဲငြားလာလျက်၊
လက်ဝဲမှာနဝင်းတပ်၊ ဝက်ထီးကန်ဝယ်၊ မှန်စွာတပ်ကြီးရပ်၏၊ ကမ်းပါးစပ်မြစ်နားမှာ၊
ဖိုးဦးတောင်သည်၊ မြင့်ခေါင်အထွတ်ချာ၌၊ တပ်တောင်တာစွဲကာပေ၊ မြေထဲမြို့မှာ၊
တတပ်တည်လျက်နီ၏၊ ကခုန်သည်တသောသော၊ ဟစ်မောင်းကြော်၍၊ သံဝါခြံမဲ့သဲအော်လျက်၊
အမှားမှားအောက်သားမှာ၊ ကောင်းမည်ထင်လျက်၊ ယင်းတွင်နီကြပါသည်၊
ကိုးသောင်းသာဗိုလ်ချုပ်ကြီး၊ တပ်ဦးဗိုလ်ကို၊ ယင်းတွင်အာဏာပီး၏၊ မြို့အနီးသျှမ်းတပ်ကို၊
လက်ဝဲကြောင်းသာ၊ တပ်ဦးချီလီဆိုလျက်၊ လက်ယာကိုငါတက်မည်၊ မြင်းစီးများမှာ၊
တောကပုန်း၍နီလော့၊ ပြောကြပြီးတုံသောခါ၊ ရဲမက်များနှင့်၊ လျှင်စောချီတက်ပါ၍၊
တပိုကျော်နီထွက်ဝယ်၊ သျှမ်းတပ်ကြီးကို၊ နင်းလျှက်တိုက်ကြလီက၊ ဂူရာသည်စာဖာအိတ်၊
မြင်းစီးများသာ၊ ခွတ်ကြပါသည်၊ လယ်မှာစပါးရိတ်သို့၊ သျှမ်းမကြီးဗိုလ်လုပ်သူ၊ မိသျှင်သဲသည်၊
နိစ္စခန္ဓာကုန်၏၊ နီဝင်မူတပ်ရို့မှာ၊ အောက်သားမိုက်သည်၊ ပြီး၍မလွတ်ပါတည်း။
ရဲမက်တော်ဂူရာများ၊ အသွယ်သွယ်သည်၊ ရှာဖွေတိုက်သတ်ငြားက၊ ဝက်ထီးနားတပ်ထဲနီ၊
အောက်သားမိုက်သည်၊ ကျင်းကျင်းမြုတ်လျက်သီ၏၊ မိုးဦးဝယ်တောင်ထိပ်မှာ၊ ဗုံးစကြာကို၊
ဆင့်ကာလွတ်လိုက်ပါက၊ ပြီးယောင်ကာပုန်းမလွတ်၊ တောင်ကြားချောက်မြောင်၊
နှမ့်အောင်ဖြန့်လျက်သတ်၏၊ မြေထဲရပ်တပ်ကိုပေ၊ ဂူရာများသည်၊ ပြီးလွှားတိုက်သတ်လီက၊
ကြောက်ဝှန်သည်မခံချီ၊ တပ်လုံးသူသည်၊ အလျှင်ထွက်ပျာပြီး၏၊ ရန်တစ်မပေါ်လာ၊
တပ်အများကို၊ လျှင်စောနိုင်နင်းပါသည်၊ ဘုန်းတော်အကြောင်းနှင့်လေး။

အကြောင်းဘုန်းတော်၊ နိုင်နင်းပါသည်ယင်းခါလျှင်၊ ပြည်မြို့တွင်စေတီကြီး၊ ရွှေဆံတော်ကို၊
ယင်းမှာပူဇော်ပြီးမှာ၊ အသီးသီးချီကြခါ၊ မီးသင်္ဘောသည်၊ ရီကြောင်းဆန်တက်ပါ၏။

ကုန်းကြောင်းမှာတစ်လား၊ နဲ့ပြီခရာ၊ ဗောဓုတပါသည်။ ပတ်သာအငြိမ်းများနှင့်၊ ဆင်မြင်းကားရထားသာ၊ အနန္တသည်၊ ရွှေတွက်မရပါတည်း။ သူရဲတော်သိန်းကုဋီ၊ လေးပါးစစ်အင်၊ မွန်းဖျင်ပြည်ထဲချီ၏။ လားကြလီတုံသောခါ၊ ကာမမြို့ကို၊ လက်ဝဲထားခပါလျက်၊ လက်ယာမှာဆင်ပေါင်ဝဲ၊ သရက်မြို့သာ၊ လက်ဝဲမှာကို၊ ပါယ်ခွာယောင်ထားခလျက်၊ တသဲသဲချီတက်ခါ၊ ပဌနဂို၊ တွင်ဆိုမြို့ရောက်ပါက၊ ဆိုင်းရပ်ကာတပ်ကြီးချ၊ များဗိုလ်ပါသည်၊ ယင်းမှာစုရုံးကြ၏။ နောက်ဖက်ကမြစ်နားမှာ၊ မလွန်မြို့ဝယ်၊ အောက်သားတပ်ဟိပါလျက်၊ ပခင်းသာမင်းမြတ်ဖူး၊ ပသချင်လျှင်၊ သျှင်ဘုရင်မှာ၊ ညီတော်အထီးဆုံးတည်း၊ ဗိုလ်မှူးကြီးယင်းတပ်မှာ၊ ကျီဝန်မင်းကို၊ အကြီးပြုပါလျက်၊ ကောလင်းသာမင်းကြီးပေ၊ တပ်မှူးရာကို၊ ယင်းတွင်ပြုလုပ်သည်တည်း။ အာသံဝယ်တိုက်ချီသူ၊ သီလဝသည်၊ စစ်ကဲပြုရတုံလျက်၊ နားခံမှုယင်းသောခါ၊ ဇေတဗိုလ်သည်၊ မှန်မှန်ပြုလုပ်ပါ၏။ စကားသာပြန်တတ်ငြား၊ ဒါဝိုက်ကေကို၊ အမှန်တည့်တည့်ထားလျက်၊ သူရဲကားယင်းတွင်သာ၊ တပ်သုံးတပ်မှာ၊ ငါးသောင်းလောက်ဟိပါ၏။ နီကြခါတုံပေ၊ မလွန်တပ်ကို၊ နင်း၍တိုက်ယူမည်ဟု၊ ကြံကြသည်တခါတွင်၊ မင်းမြတ်ဖူးက၊ တမန်စီလွတ်ကျင်၏။ တပ်ကိုလျှင်ဆိုင်းရပ်ပါ၊ အမီးပုစ္ဆာ၊ ပြဿနာကို၊ ပြီးအောင်ဖြေကြပါအံ့။ ပြောတုံလာသောခါပေ၊ မြစ်လယ်ကြောတွင်၊ လှီဖောင်ဖွဲ့လုပ်နီ၏။ အောက်သားဝယ်ကျီဝန်ကြီး၊ ကောလင်းမင်းသား၊ လျှင်စောလာတုံငြားက၊ ဗိုလ်ချုပ်ကြီးကြက်တောင်ဖန်၊ ရာပသိန်သတ်၊ မင်းမြတ်လားမည်ကြံက၊ ကြည့်မျက်မှန်တပ်ဦးကို၊ ဇောသျှိန်းသတ်သည်၊ နောက်ထပ်လိုက်မည်ဆို၍၊ သုံးပါးဗိုလ်ပေါင်းပြီးခါ၊ မြစ်လယ်ဖောင်မှာ၊ လျှင်အောင်လားလီပါလျက်၊ နှစ်ဖက်သာမင်းစပ်ကြား၊ ဒါဝိုက်ကေသည်၊ ထိုဝယ်ပြန်၍ပြော၏။ မြန်မာများကူး၍ပေ၊ ငတ်မော်ရပ်က၊ အထက်ဖမ်းယူလီသည်၊ ရဲမက်ငယ်စဖာအိတ်၊ အမိရိကာ၊ ထိုမှာအင်္ဂလိပ်ကို၊ ယူဆောင်ပြီးပီးပါမည်၊ ဆယ့်ငါးရက်နှင့်၊ လိုသည်စရစ်ကို၊ ပြေလည်အောင်ပီးဆက်က၊ ရန်ကုန်မြို့သို့လျှင်၊ လျှင်စောဆုတ်လားကြလော့၊ ကျုပ်တို့ကားနှောင်တခါ၊ ခိုက်ရန်များမပြုလုပ်ပါဟု၊ ပြောဆိုရာနှစ်ဖက်သား၊ လက်ဝါးရိုက်ကာ၊ စာချုပ်ပါလျက်၊ မှန်စွာကတိထား၍၊ ပုဏ္ဏားကားဆရာတော်၊ နံဒရင်မှာ၊ အမှာတော်ရွီးသာတည်း။ နားခံမှာအုပ်ကေ၊ အကုန်သူကို၊ ယင်းတွင်လွတ်လိုက်ပေလျက်၊ များဗိုလ်ခြံရဲမက်တော်၊ ဆယ့်ငါးရက်ကို၊ ဆိုင်းဝဲစောင့်နီပါသည်၊ ဥစ္စာကတိနှင့်လေး။

ကတိသစ္စာ၊ စောင့်နီပါသည်ယင်းခါတွင်၊ (ပီပျောက်)

ဆင်မြင်းသာလူသူက၊ တချက်မှန်သော်၊ ဧကန်မရဏတည်း၊ မီးကျည်ကားလက်နက်တော်၊ တချက်ပစ်သော်၊ ထွတ်ဖျားထက်အာကာသို့၊ ပျံဝဲကာတက်လီငြား၊ သက်လတ်ပါသော်၊ တပ်မှာမြီခေါင်းများ၌၊ ရှာတုံငြားမို့၍သာ၊ သတ်လတ်ငြားသည်၊ လူ၏ဟန်ပမာသို့၊ ဂူရာသာရဲမက်ကား၊ ဇေရာဝတီ၊ ခေါ်သည်ထိုမြစ်ဖျားကို၊ ကူးလားငြားလိုက်၍ပေ၊ အောက်သားတပ်ကို၊ ဝင်လျက်ခွတ်သတ်လီ၏။ ညီတော်သည်မင်းမြတ်ဖူး၊ ကျီဝန်ကြီးသာ၊ ထိုခါတောမှာပုန်း၍၊ တပ်ပြတ်လုံးအောက်သားမှာ၊ ကိုးကွယ်မရ၊ လွန်ကြောက်လှ၍၊ လျှင်စောပြီးလီပါက၊ တိုက်ကြရာတခဏ၊ သုံးတပ်စုံကို၊ လွယ်ကူချက်ချင်းရ၏။ ချီတက်လားကြလီခါ၊ မကွေးမြို့တွင်၊ လျှင်ပြင်းရောက်လီသော်ကား၊ နောက်တော်ပါဖွဲ့ဒါကြီး၊ အသောင်းဒုလာ၊ ထိုမှာရောဂါစီး၍၊ မချီယင်းမြို့တွင်၊ မရဏသည်၊ နိစ္စရောက်လီကျင်၏။

လားလီလျှင်ဝက်မစွတ်၊ ရေနံချောင်းကို၊ ပါယ်ခွာချီတက်လတ်မှ၊ လက်ယာမှာစလေမြို့၊
လက်ဝဲဖက်ကမ်း၊ ဆင်ဖြူကျွန်းနှင့်၊ ကျားဗင်းဆိပ်ကမ်းရို့က၊ တသောင်းလောက်အောက်သားလျှင်၊
စလင်းမြို့တွင်၊ တပ်နှင့်စောင့်နီကျင်လျက်၊ ယင်းရပ်တွင်ဗိုလ်ချုပ်မူ၊ မိဖုရားမှာ၊
မောင်ရင်းတော်သည်ဟူ၏။ ဇာတိမူထောင်မှူးသား၊ ယောက်ဖတော်ကို၊ သခင်ကြီးဘုရားဟု၊
နာမည်ကားမောင်အိုသာ၊ အောက်သားမိုက်သည်၊ မိမ္မဟန်ပမာသို့၊ သတင်းသာကြားကာမူ၊
စစ်မရောက်ခင်၊ အလျှင်ထွက်ပြီးကြ၏။ နှမနှင့်ယောက်ဖသာ၊ ထံရင်းတော်ပါး၊
ရောက်လီငြားသော်၊ ကြောင်းလျားလျှောက်ခြင်းရာကား၊ အယှိတ်တက်ကာငို၍ပေ၊
ပြူးတူးကြက်တက်၊ အောင့်လျှက်ထိုသည်နှယ်သို့၊ တုန်လှုပ်ကာစီးယိုကျ၊ ရှုံ့တွမ့်ကန်၊
ပြောလတ်ပါသည်၊ လျှင်စွာပြီးလီတော့လား၊ တိုက်သတ်ကြဆိုင်သောခါ၊ ပြီးမလွတ်ဘဲ၊
မချွတ်သီမည်သာဟု၊ တိုးတိုးသာချပ်ချပ်ပြော၊ ချီးယိုပါသည်၊ အောက်ပေါ်ဒေါလျားများ၏။
လူးလဲငြားဝမ်းခဲကွန်၊ ခုချက်ချင်းသည်၊ ကာလနာလိုက်သည့်ဟန်သို့၊ ပြုလုပ်ပြန်ဥပါယ်သာ၊
ကြောက်ဝှန်ကြီး၍၊ ယင်းမှာနီလျှင်းပါသည်၊ နှမထံမှာတည့်လေး။

နှမထံမှာ၊ နီလီပါသည်ယင်းခါလျှင်၊ ချီတက်ကျင်လားလီငြား၊ လက်ယာဖက်မှာ၊
အနန္ဒဘုရားတည်း။ လက်ဝဲနားကမ်းစမှာ၊ တင်းကျိတောင်ဟု၊ ခေါ်ဆောင်ဘုရားသာတည်း၊
လက်ယာမှာပုဂံမြို့၊ ဆိုက်ရောက်သောခါ၊ ယင်းမှာအောက်သားရို့က၊ ဘုန်းတော်တိုးအာမခံ၊
ငွေခွက်စွဲ၍၊ တပ်စွဲလျက်နီပြန်၏။ ဂူရာပျံရဲမက်တော်၊ မြင်းစီးများသည်၊ လိုက်၍တိုက်ကြပါက၊
တသောင်းကျော်လူမက၊ သီပျက်ပါသည်၊ မြန်မာအောက်သားကတည်း။ ထွက်ပြီးကြလီသောခါ၊
ညောင်ဦးမြို့တွင်၊ လျှင်စောရောက်လီပါက၊ လက်ဝဲမှာမြစ်ဆိပ်ကမ်း၊ ပုခန်းကြီးခေါ်၊
မြို့ကိုသာလျှင်၊ ပါယ်ကာချီလားဘိက၊ အောက်သားလျှင်သီလဝ၊ ကူး၍လာကာ၊
ပြောဆိုလာသည်၊ မြင်းသာပြိုင်ကတ်စွဟု၊ အရိုကမြင်းကိုသာ၊ စိုင်း၍ပြီးသော်၊
ငှက်သွင်လျှင်လှပါ၏။ အနောက်မှာမြင်းတို့ဝယ်၊ ပြီးမလျှင်သည်၊ နောက်ဖင်ကားရားနီ၏။
ထိုခါထွေတုံပေက၊ မျက်မှန်ဗိုလ်သည်၊ ယင်းတွင်မာန်ကြီးထလျက်၊ ခုလျှင်စောမြင်းယူခီ၊
ပြိုင်၍ယှီးသော်၊ မြင်းကိုယူကြမည်ဟု၊ လက်ဝါးသည်ရိုက်ပြီးမှ၊ ငါးစီးမြင်းကို၊
အောက်သားမှာယူကြလျက်၊ သူရို့ကမြင်းစီးသာ၊ ကသည်းမျိုးကို၊ အစီးအပ်လျှင်ပါ၏။
ယင်းသောခါမျက်မှန်ဗိုလ်၊ အိမ်ရာဇီသည်၊ ကတ်တင်ဖလောင်းပျိုကို၊ ခေါ်၍ဆိုမြင်းအပ်ကာ၊
နှစ်ပါးစုံသည်၊ အတူရပ်ကြပါက၊ သိန်းဗိုလ်ပါလူသူများ၊ ရှုကြည့်ရာသည်၊ သဘင်ပွဲအလားတည်း။
မြင်းနှစ်ပါးစိုင်းကြခါ၊ အိမ်ရာဇီသည်၊ အသျှင်မြင်းတုံသော်ကား၊ ထက်အာကာငှက်ပျံဟန်၊
အောက်သားမြင်းသည်၊ နွားလား၏သဏ္ဍန်သို့၊ ပြောင်းကာပြန်နောက်ကသာ၊ သုံးခါစိုင်းသော်၊
တချက်မမှီပါတည်း။ တစီးသာယှီးတုံက၊ နောက်ထပ်ပါသည်၊ ထိုခါတစီးပြ၏။
စိုင်းပြန်ကြလီသောခါ၊ သုံးခေါက်လုံးကို၊ တချက်မနိုင်ပါတည်း။
သောင်းသောင်းကြော်လက်ခုပ်ခတ်၊ ယှီးသည့်မြင်းကို၊ သိမ်း၍ယူတုံလတ်က၊
အောက်သားသွတ်အရူးသာ၊ သီလဝသည်၊ ရှက်၍ပြန်လားပါလျက်၊ စာချုပ်ရာကတိရက်၊
စိရောက်သောခါ၊ ငွေတော်မပီးဆက်၍၊ ကြန့်ကြာလျက်ကျူးလွန်ခါ၊ ရာပသိန်သတ်၊
မင်းမြတ်ရွှီနှုတ်ဝါနှင့်၊ အောက်သားသာသျှမ်းမိုက်များ၊ ကတိမမှန်၊ လင်းပြန်လူပျက်သားကို၊
တပ်ဦးကမျက်မှန်ဗိုလ်၊ (-----)၊ အောင်ကျော်ရွှီလည်း၊ ယင်းမှာလားခီဆိုလျက်၊
ကိုးသောင်းဗိုလ်ကြက်တောင်ဖံ၊ ရဲမက်များနှင့်၊ အသင့်စောင့်နီပြန်ဟု၊ ချလတ်ဟန်တုံသောခါ။

မျက်မှန်ဗိုလ်နှင့်၊ အကျွန်ရဲ့အလုံးသော်ကား၊ လားကြရာတုံကပေ၊ မလွန်တပ်မှာ၊
လျှင်စောရောက်လီသည်တည်း။ အောက်သားဝယ်ကျီဝန်ကြီး၊ ကောလင်းမင်းကို၊
အယင်စကားမီး၏။ ထက်ကတိစာချုပ်မှာ၊ ပါသရိကို၊ အခုပီးအပ်ပါလော့။ မပီးသော်နက်ဖန်ဝယ်၊
နီတပိုတွင်၊ အမှန်တိုက်လာမည်တည်း။ ပြောဆိုပေတုံသောခါ၊ ကျီဝန်မင်းသည်၊
ချက်ချင်းတုန်လှုပ်ပါ၍၊ ကြောက်ဝှန်ကာမခံချို၊ ငါးရက်ဆီကို၊ ငုံတော်ပြုပါဖိလော့။
ထက်ကတိဟိတိုင်းကို၊ ပြည့်စုံအောင်သည်၊ ကျွန်တို့ပီးမည်ဆိုကာ၊ မနာလိုငြင်း၍သာ၊
မျက်မှန်ဗိုလ်နှင့်၊ အကျွန်ရဲ့ပြန်လာလျက်၊ လျှောက်ကြလာသောခါဝယ်၊ နက်ဖန်ရက်မှာ၊
လျှင်စောတိုက်ကြမည်ဟု၊ လက်နက်ဝယ်ဗုံးစကြာ၊ မီးကျည်တန်းနှင့်၊ ရဲမက်များဗိုလ်ပါကို၊
အသင့်သာစီမံ၍၊ ထားလျှင်းပါသည်၊ တိုက်မည်အမှန်တည့်လေး။

တိုက်မည်မှန်စွာ၊ မိုးသောက်ပါ၍ယင်းခါတွင်၊ တပိုလျှင်နီတက်ခါ၊ ဗုံးလက်နက်ကို၊
တချက်လွှတ်လိုက်ပါက၊ ထက်အာကာဝတိန်၌၊ ဝရဇိန်အဟိန်၊ မိုးကြိုးထစ်သို့၊
ကျတုံလစ်ယင်းတပ်မှာ၊ လယ်စပါးကို၊ ကြ၍ပစ်ခြင်းရာသို့၊ (ပီပျောက်)

(ရန်တပိုစာချုပ်အကြောင်း)

ချင်းတွင်းမြစ်တို့ခါ၊ လက်ယာနားမှာ၊ တရုတ်မြို့ဟိပါ၏။ ချီတက်သော်တုံကပေ၊ ရန်တပိုမှာ၊
လျှင်စွာဆိုက်ရောက်လီက၊ ယင်းတွင်သာတပ်မချ၊ မျက်မှန်ဗိုလ်မှာ၊ လျှင်စွာချီတက်ကြွလျက်၊
နီကြပေတုံသောခါ၊ သျှင်ဘုရင်မှာ၊ ကျွန်ရင်းအမတ်သော်ကား၊ လယ်ကိုင်းသားမြို့စားပေ၊
မင်းကြီးမဟာ၊ မင်းလှသာလျှင်၊ ကျော်ထင်ဘွဲ့နာမည်တည်း။ အတွင်းဝယ်ဝန်ကြီးသာ၊
ရွှေခွန်ဝန်မှာ၊ နာမည်ဘွဲ့တုံသော်လည်း၊ မင်းမဟာမင်းလှပေ၊ သီဟသူဟု၊
ယင်းမှာခေါ်ကြသည်တည်း။ နန်းတော်ဝယ်မောင်ရွှင်သာ၊ သံတော်ဆင့်လည်း၊
ယင်းခါပါလျှင်းပါ၏။ ဆရာတော်ပါဒလီ၊ ဇိန်သတ်ကိုပေ၊ ရှိနီပြုလုပ်ပြီးလျက်၊
ခေါ်ယူပြီးလာ၍သာ၊ မလွန်တပ်ဝယ်၊ အထက်စာချုပ်ပါကို၊ ခုယူပါပြော၍ပေ၊ ရွှီငွေဒီဂါး၊
အများလက်ဆောင်ဝယ်နှင့်၊ ဖမ်းလီသည်ဆာဖာအိပ်၊ အမိရိကာ၊ မှန်စွာအင်္ဂလိပ်ကို၊
အပ်ဆက်ပြီးပီးမှသာ၊ နှစ်ဖက်သားသည်၊ လက်ဝါးရိုက်ပြီးခါမှ၊ စာချုပ်ပါကြလတ်သည်။
အတ္တဗတ်ထို့၊ ဝေသာလီနှင့်၊ အာသံမြို့လျှင်ပေတည်း။ မဏိပူရမှာ၊ ရှိမင်းဟောင်းသည်၊
ဂဘိရသျှိန်သော်လည်း၊ ပြန်လျက်သာမင်းပြုက၊ သျှင်ဘုရင်မှာ၊ ခိုက်ရန်မရှာရတည်း။
ထားဝယ်နှင့်ရဲမြို့ဝယ်၊ တနင်္သာရီ၊ ခေါ်သည်ဗိတ်မြို့ဝယ်နှင့်၊ သံရှင်ဝယ်မြစ်ကိုမှ၊ နယ်ခြား၍သာ၊
ပိုင်လျက်ယူကြတုံအံ့။ ရခိုင်ဟူမြို့စည်၊ ဒွါရာဝတီ၊ ခေါ်သည်သံတွဲစသား၊
ရမ်းပြည့်နှင့်မာန်အောင်သာ၊ ဆယ့်နှစ်မြို့ကို၊ ပိုင်ခြားသိမ်းယူပါအံ့။ ကျန်ကြွင်းရာမြို့ကိုပေ၊
သျှင်ဘုရင်ကို၊ ငါရို့ပီးခမည်တည်း။ စရစ်ငွေအတွက်မှာ၊ တကုဋီကို၊ အမှန်ပီးရပါအံ့။
လေးပုံသာတပုံကား၊ ရန်တပိုဝယ်၊ ခုပင်ပီးအပ်လော့ဟု၊ တပုံကားရန်ငွမ်မှာ၊ အခုနီက၊
ရက်ပေါင်းရွှီတရာတွင်၊ ပီးတုံကျင်သောခါဝယ်၊ တနှစ်တွင်းမှာ၊ တပုံသွင်းရမည်တည်း။
တပုံငွေနောက်ပီးက၊ ရန်ပုစ္ဆာကို၊ နောင်မရှာရဟု၊ နှစ်ဖက်ကမင်းရို့သာ၊ ကတိထား၍၊
ယင်းမှာပြောကြပါသည်၊ တပ်မဟိရာတည့်လေ။

တပ်မဟာရာ၊ ပြောကြပါသည်။ ယင်းခါတွင်၊ ခွဲဝီကျင်လီကြခါ၊ ရခိုင်တိုင်းပြည်၊ သံတွဲနယ်ကို၊
ခေါ်ထွေလူတကာရို့၊ တောင်ခွင်သာမော်ရုံထိ၊ ရခိုင်မင်းသာ၊ တည်လုပ်ပါသည်။
မဟာစေတီကြီးကို၊ မသိမကြားကွန်၊ လယ်ကိုင်စားနှင့်၊ ကျီဝန်ရို့ပြောကြပြန်၏။ ပုသိမ်ဝန်စီရင်စု၊
သံတွဲနယ်သည်၊ အကယ်ပင်မဟုတ်တည်း။ မပီးအပ်ပါ။ ငြင်းခုံလတ်သော်၊ ကျွန်ုပ်ပြောလျှင်းပါ၏။
လေးဆယ်သာခြောက်ခုက၊ ရခိုင်ပြည်ကို၊ အောက်သားပိုင်လာလည်း၊ ပုသိမ်ကမရပါ။
စေတီကြီးလည်း၊ ရခိုင်မင်းရာဇာက၊ တည်လုပ်ပါသည်။ နယ်နမိတ်ဖြစ်ခြင်းဟန်ကို၊
အကျွန်ပြောလတ်ပါ၏။ စေတီထိနယ်ကိုပေ၊ ရခိုင်ပြည်က၊ အပိုင်ရလျှင်းစီတည်း။
အရို့ပြည်အင်းဝမှာ၊ စဖာအိပ်သည်၊ သူရဲငါးကျိတ်ကျော်နှင့်၊ ကတ်တင်သာအိမ်ရာဇီ၊
ဗိုလ်တယောက်လည်း၊ စောင့်၍နီအံ့။ ကုမ္မဏီမြို့တော်မှာ၊ ထားလိုက်ငြားသော်၊
အောက်သားငါးကျိတ်ကျော်ကို၊ မပြတ်သာစောင့်နီလီ၊ စစ်ရန်များကို၊ မပြုလုပ်စီဟု၊
သက္ကရာဇ်သည်တထောင်ဖြစ်၊ တရာသျှစ်ဆယ်၊ ခုနှစ်ကယ်က၊ တပေါင်းလပြည့်ကျော် (၄)
ရက်နိသည်၊ တပို့အချိန်မှာဝယ်၊ နှစ်ဖက်ကားမင်းများပေ၊ စာချုပ်ထား၍၊
လက်မှတ်ချကြသည်တည်း။ ဘာသာဝယ်သူစရိုက်၊ ပြောင်းဖဝါကို၊ ထိုခါသံဆင့်ပစ်လျှက်၊
လက်နက်၌ဗုံးစကြာ၊ မီးကျည့်တန်းကို၊ အာကာမြောက်လိုက်ပါ၍၊ ကျူးရစ်ကာပစ်တုံငြား၊
ထိန်းထိန်းဆူသည်၊ ဇမ္ဗူကျွန်းလုံးကြားမျှ၊ ပျော်ရွှင်ငြားအောင်ပွဲသာ၊ ဗင်တုတ်ရုတ်မှာ၊
ကတ်တင်ဗိုလ်မင်းသော်ကား၊ ခေါ်တွင်ကာသူနာမ၊ လောဗောသျှိန်တိန် အိမ်ရာဇီကို၊
ယင်းခါစီလွတ်ကလည်း၊ ကတ်တင်နှင့် နှစ်ယောက်သာ၊ အင်းဝမြို့မှာ၊ လျှင်စောရောက်လီပါ၏။
နန်းတော်သာရောက်လီက၊ သျှင်ဘုရင်မှာ၊ နီရာတိုင်းကြီးမ၌၊ တံဆိပ်နှင့်ခတ်နှိပ်ပြီးခါ၊ အပိုင်ခံ၍၊
လျှင်စွာပြန်လျှက်လာသည်။ တပ်မဟာရာသို့လေ။

တပ်မဟာရာ၊ ပြန်လျှက်လာ၍ရောက်ခါလျှင်၊ ဝမ်းသာရွှင်ပျော်ပါးကာ၊ ရာပသိမ်သတ်၊
မင်းမြတ်နှုတ်ရွှီဝါနှင့်၊ များဗိုလ်ပါရဲမက်ကား၊ ခုလျှင်စွာသည်၊ ပြန်ကာဆုတ်၍လားလော့၊
ချဆိုငြားတုံသောခါ၊ ဗိုလ်လုံးသားသည်၊ ပြန်လျှက်ဆုတ်လီပါ၍၊ ပုဂံသာရောက်ပြီးက၊
ရွှေစည်းခုံသည်၊ သျှင်ပင်စေတီမကို၊ ပူဇော်ကြလီသောခါ၊ အောက်သားမသည်၊
ရှုကြကြည့်တုံလာ၏။ မြင်ခိသော်ရွံ့ဖွယ်တိ၊ အခြံစင်းစင်း၊ လက်ကျင်းကျင်းသည်၊
ဝတ်ခြင်းပင်ရင်မစိတည်း။ မွီးသည်မိအသရီ၊ ပြင်ကိုထုတ်လျက်၊ မရှက်ပြန်၏။
လက်ယာခြံဒူးဆစ်မှာ၊ ခြည်မျှင်မဲကို၊ ပတ်၍ချိုင်ထားပါလျက်၊ သားမြတ်မှာချက်ရိုထိ၊ အသားမဲမဲ၊
သွားကြကြသည်၊ ဂေါင်းလည်းခပိပိနှင့်၊ မျက်စိလည်းပြူးတူးသာ၊ ဆံကိုဖြတ်၍၊
မျက်နှာဖုံးထားပါလျက်၊ ရူးခြင်းရာဟန်မပြား၊ တချက်မြင်သော်၊ ကြောက်ချင်ဖွယ်များ၏၊
မောင့်သက်ထားမျိုးအိမ်သူ၊ နို့သျှင်ချွေးမ၊ သက်လုံးမျှကို၊ နှိုင်းယှဉ်သော်ဖက်မမျှ၊ မြော်မြင်သသူ၊
စိတ်ဝမ်းပူသည်၊ နတ်ဘုံသူမကတည်း။ ယင်းဌာနသူရပ်မှာ၊ တပေါင်းမင်းလွင်၊
ရွက်ကျင်တောင်လီလာက၊ ဥဩသာဖိုးခေါင်ကျူး၊ နို့ပေါက်သံဝါ၊ ငှက်တကာသည်၊
မြူးပျော်ကဇာတ်ပြုက၊ ထက်အောက်ချုပ်မိုင်းဝီကာ၊ မြုံဆောင်းဆောင်းသည်၊ (-----)၊
လွင့်လွတ်ပါတုံပေက၊ သားဦးမိခင်၊ ငယ်ကျွမ်းဝင်ကို၊ ကျွန်လျှင်အောက်မိလှ၍၊
တမ်းတရမကြံသာ၊ ဟာလာအသက်၊ ပြင်ထွက်ဟန်ပမာသို့၊ ဖိုမောကာသွယ်ပြိုက်ကျ၊
စိတ်ပူဆာသည်၊ မေတော်သျှင်ချွေးမကြောင့်၊ ဆွတ်မျှတ၍သာ၊ တဆတ်ဆတ်သည်၊
ပြန်လျှက်ချီကြွလာလျက်၊ ပြည်မြို့သာဆိုက်ရောက်က၊ များဗိုလ်ပါသည်၊ ယင်းမှာတပ်ကြီးချလျက်၊

ဆိုင်းငံ့ကြနီခါဝယ်၊ စိုးတန်းပြင်မှာ၊ ကျွန်လျှင်မြင်ခီသည်ကား၊ သားသူငယ်မိထံမှာ၊ မပီတူတွ၊
ပီတူတွသည်၊ အဘကိုသာခေါ်လျက်၊ လူးလဲကာငို၍ပေ၊ ငါ့ဘခင်ကို၊ ခုပင်ပီးရမည်ဟု၊
တွလျက်ပေတောင်းလတ်ခါ၊ မွီးဘခင်သည်၊ လျှင်လျှင်ပြီး၍လာလျက်၊ ဖက်နမ်းကာသားကိုရွက်၊
မွီးမိခင်လည်း၊ ယင်းတွင်တစဖက်၏။ ရယ်နှုတ်ဆက်အလှယ်လှယ်၊ လင်မယားသား၊
နှစ်ပါးပျော်ကြသည်ကို၊ မျှော်ခီပေတုံသောခါ၊ ကျွန်သဲအူကို၊ နှုတ်ယူဟန်ပမာသို့၊
ဟမြွက်ကာမျက်ရည်ကျ၊ သားမောင်ငယ်ကြောင့်၊ ဘခင်လွမ်းရတ၍၊ လွန်ပျောင်းပျမကြိသာ၊
ကြာပဒုံကို၊ နီပူလှမ်းပမာသို့၊ မွီးမယ်တော်မင်းချွေးမ၊ ချီ၍လာခါ၊ ဂမ္ဘသာလျှင်၊
ဝမ်းမှာသန္ဓေနှင့်တည်း။ စွဲရင်းလှဟိလိုက်သည်၊ ဖွားမြင်ကြောင်းကို၊ ကျွန်လျှင်မမြင်ပေ၍၊
သားမောင်ငယ်ကြီးခြင်းရာ၊ သည်ကိုတွက်၍၊ အကျွန်သဲအူဆာလျက်၊ စိတ်မှာသာမျှော်နှိုင်းနှိုင်း၊
စားသောက်မဝင်၊ ပူပင်လွမ်းဝှမ်းသဲ၍၊ ခွဲပျောင်းချီတလျက်သာ၊ ရန်ငုမ်မြို့ရွာ၊
ကြွချီလားလီပါသည်၊ မကြာရောက်လာ၏လေ။

ရန်ငုမ်မြို့ရွာ၊ ရောက်လတ်ပါသည်ယင်းခါလျှင်၊ ဆိုင်းငံ့ကျင်နီသောခါ၊ ရာပသိမ်သတ်၊
မင်းမြတ်ရွှီနှုတ်ဝါနှင့်၊ ဟမြွက်ကာပြောလတ်သည်၊ ကုလိကုတ္တာ၊ ကိုယ့်ပြည်ရွာမှာ၊
ငါသာချီလားနှင့်ပြီ၊ ရန်ငုမ်ဝယ်နီလိုက်ကြ၊ ဇောသျှိန်သတ်ဆို၊ မျက်မှန်ဗိုလ်သည်၊
လျှင်စွာပို့တုံကြအံ့။ ရောက်လီရရခိုင်မှာ၊ ကျွန်းချောင်းများသည်၊ ငါကပီးအပ်ရာကို၊
သားစိုင့်မှာမြီးဆက်ပေ၊ မျှင်မပြတ်သည်၊ မပျက်စားရလီအံ့။ အရာဝယ်အထူးသာ၊ ကြီးမားစွာကို၊
ယင်းမှာရတုံပါ၏။ ဟမြွက်ကာပြောလျက်ပေ၊ ကိုးသောင်းဗိုလ်နှင့်၊ အကုန်ချီလီသည်တည်း။
ရန်ငုမ်ဝယ်မြို့တွင်းသာ၊ ကျွန်ပရိသည်၊ ယင်းမှာကျန်လိုက်ပါက၊ တန်းခူးသာဆန်းလတ်မှ၊
တာသကြိန်သည်၊ ကျပြန်တုံလတ်ကလည်း၊ ယင်းဌာနသူရိမှာ၊ ပေါက်ပေါက်ပန်းမှန်၊
တင်းခွန်ဆီမီးဝါနှင့်၊ ဆင်ယင်ကာအသွယ်သွယ်၊ လင်နှင့်မယား၊ သမီးသားသည်၊
ပျော်ပါးလားကြပေ၍၊ ရောက်ပါလီတုံပြီးခါ၊ ရွှေတိဂုံသည်၊ သျှင်ပင်စေတီတော်၌၊
ပန်းမှန်သာပေါက်ပေါက်များ၊ ဆီမီးဝါကို၊ လျှင်စွာညှိတင်ငြားကာ၊ လင်မယားမောင်နှံပေ၊
တူစုံထိုင်လျက်၊ သျှင်ပင်ရီတော်ဝယ်၌၊ အတူသည်ဖြစ်ရအောင်၊ မယားဝတ်သည့်၊
ကိုယ်တွင်တံဘက်စောင်ကို၊ လင်ယူဆောင်ကိုင်ထားကာ၊ လင်ဝတ်ပါသည်၊
ကိုယ်မှာအင်းကျီပါးကို၊ မယားကဆွဲကိုင်ကာ၊ အသားချင်းသာ၊ ဟပ်၍ဆုတောင်းပါ၏။
ဖြစ်လီရာဘဝကို၊ ခုအဟန်သာ၊ တူစုံဖြစ်ရလို၏။ သားမောင်ကိုနံပါးထား၊ ဖူးကြပါသည်၊
သျှင်တော်မြတ်ဘုရားကို၊ တခြားကပွဲများဖျင်၊ လှီကဇာတ်သည်၊ မြစ်၏ပြည့်မွန်းဖျင်မျှ၊
လက်ပွဲလျှင်သတ်ကြရာ၊ ပတ်ဆိုင်းတီး၍၊ ထလျက်ကကြပါ၏။ ရှုကြည့်ရာလင်မယား၊
လာကြပါသည်၊ ယင်းမှာတသောသောတည်း၊ ထိုင်တုံငြားလာခါပေ၊ လင်နံပါးမှာ၊
မယားဝန်းရံနီလျက်၊ တယောက်သည်မယားမှာ၊ ရီဖလားကို၊ ကမ်းလျက်ပီးနီပါ၏။
တယောက်သာမယားက၊ ကွမ်းနုယာကို၊ ယူကာကိုင်၍ထားလျက်၊ တယောက်ကားဆီးလိပ်သာ၊
ညှိ၍ပီးသော်၊ ယူလျက်သောက်ကာကာတည်း။ တယောက်မှာယပ်နှင့်ဝယ်၊ ပူသည်မြင်သော်၊
ခတ်ကာနီ၏။ ချွေးယိုထွေစီးကျကာ၊ မယားကြီးမှာ၊ ကိုယ်ဝတ်ပိုးခါသာနှင့်၊ တို့ကာတို့ကာ၊
တံဘက်စွန်ကို၊ ရင်တွင်အသာအုပ်၍၊ သားမောင်ပုမိထံမှာ၊ အဘပေါင်တွင်လာလျက်၊
လဲလျောင်းကာကဇာတ်သည်၊ တခါထ၍၊ မိထံပါလားလီ၏။ လက်ညှိုးငယ်ပြကာကာ၊ ထိုမှာကိုမီး၊
မှာကိုမီးသည်၊ ရင်သွီးဘမျက်ဖျော်တည်း။ ပြုံးရယ်ကာပျော်ကဇာတ်၊ ပွဲသဘင်ဝယ်၊

တူစုံရွှေခင်းများကို၊ မျှော်ချေငြားတုံသောခါ၊ ကိုယ့်သားရွှီရောင်၊ ခြောက်ယောက်မောင်သည်၊
ပူလောင်မခံသာ၍၊ သလွန်တော်မို့ရာထဲဝယ်၊ စီးမြိုက်သွယ်သည်၊ မျက်ရည်တရွဲရွဲနှင့်၊
အသဲကွဲလှဖွယ်၊ ကြိမတတ်သည်၊ ဆီးသတ်ငါးအနှယ်သို့၊ ဟိ၍ပေလွန်မိမော၊ ရွှီနို့သျှင်သည်၊
မိခင်ချွေးမများကြောင့်၊ ဖြစ်ခြင်းရာအဟန်ကို၊ သူဇာလင်ရင်း၊ သိကြားမင်းသည်၊
လျှင်ပြင်းမပါဆိုလျက်၊ နတ်များကိုတိုင်၍သာ၊ ကိုယ့်ဌာနသို့၊ လျှင်စောပြန်ချင်ပါသည်၊
ရန်ငှမ်မြို့မှာတည့်လေ။

(နောက်ဆုံးပိုင်း)

ရန်ငှမ်မြို့က၊ ပြန်ချင်လှ၍နီကြခါ၊ သားနိုးသာကံ့ကော်ပန်း၊ အဝေယာသည်၊ ကြိုင်စွာပင်လုံးမွမ်းမျှ၊
မလေးပန်းနှင့်ပွင့်သာ၊ စပါယ်စံကား၊ ချရားဇီသဝါကို၊ ယင်းပြည်ရွာဌာနသား၊ ခူး၍ဆွတ်ကာ၊
လှရာရာကို၊ ထိုခါရွှီးချယ်ငြားလျက်၊ ထွားပြာညက်လှဆင်းဝါ၊ ကိုယ့်မယားကို၊
လက်ဖြင့်ဆင်ကြပါ၍၊ အရှုသာကြည့်လျက်ပေ၊ ကွမ်းနုယာကို၊ လှမ်းကာပီးကြသည်တည်း။
အသွယ်သွယ်ပျော်ခြင်းရာ၊ သည်ကိုမြင်သော်၊ ကျွန်လျှင်သဲအူဆာ၍၊ ညှိုးဝီကာထပ်ဆင့်ပွား၊
မိုးမိခင်သည်၊ နို့သျှင်ချွေးမများကြောင့်၊ တရုငြားနီသောခါ၊ ပြိုးတခုသည်၊ လှမ်းမူပြုပြန်လာကာ၊
ငှက်ရွှီဝါသံဆင့်ခတ်၊ ရောက်ပျာရောက်ပျာ၊ တြင်းဆော်သည်၊ သံဝါတတွတ်တွတ်နှင့်၊
မြည်တုံလတ်သောခါဝယ်၊ သားဦးမိခင်၊ ငယ်ကျွမ်းဝင်နှင့်၊ နို့သျှင်ချွေးမငယ်ကို၊
စီးပြိုက်ထွေယိုရွဲကာ၊ မောင်ကြောင့်တရူ၊ မွီးသူမအိပ်ပါဘဲ၊ ပန်းဘုံသာမို့ရာထဲ၊ စက်မပျော်သည်၊
ဗျာပါလွန်ကြိုကွဲနှင့်၊ အသဲပြိုလုကာ၊ ပြန်လာနည်းနည်း၊ မျက်စိထဲတွင်၊
ပြန်လျက်တမ်းရှာကြလိမ့်မည်။ သည်ကိုတွက်၍၊ သဲဖျားလှမ်းဝှန်ကဲနှင့်၊
သားမောင်ငယ်ထွန်းဦးကား၊ မျှော်သည်သူ့ကို၊ 'အဘာ' ရောက်ပျာလားဟု၊ မီးတုံငြားမူသောခါ၊
ငါ့ဘခင်ကို၊ ခုပင်ပြပါလတ်ဟု၊ ငိုကျိုးကျော်တောင်း၍ပေ၊ ဘရင်၌သည်၊ သားချစ်ဟိလိမ့်မည်ကို၊
စိတ်တွင်ဝယ်တွက်၍သာ၊ အသဲလောင်သည်၊ ယာတောင်မီးတိုက်ပါသို့၊ ငှက်ပမာဟန်မပြား၊
ပျံရောက်ချင်သည်၊ မေတော်ထံရင်းပါး၌၊ ကြာမြင့်ငြားတနှစ်ကျော်၊ သူ့ဌာနမှာ၊
ဝန်းလျားစိတ်ဗျာပါနှင့်၊ နီကြရာတုံခါဝယ်၊ မြန်မာများသည်၊ လျှင်စောလာပေလျက်၊
တပုံငွေဘဏ္ဍာတော်၊ မြို့ရန်ငှမ်မှာ၊ ယင်စွာဆက်သွင်းပါက၊ ခေါ်ကြကာမျက်မှန်ဗိုလ်၊
ဇော်သျှိန်သတ်သည်၊ ပြန်၍လားမည်ဆိုလျက်၊ ငါးရာဗိုလ်လူထဲတွင်၊ ကျန်သည်သူ့ကို၊
ယင်းခါခေါ်ငြားပါက၊ ကျွန်ုပ်မှာတဌာန၊ ပါသည်သူ့ကို၊ ကြည့်ဆောင်ခေါ်ယူကြလျက်၊
စုပေါင်းကြ၍ပေ၊ လှိုသဘောတွင်၊ လျှင်စောစီးတက်လီ၍၊ မေဇော်သည်ဇော်သျှိန်သတ်၊
တပ်ဦးဗိုလ်နှင့်အတူ၊ ပြန်လာကြလျက်၊ တဆတ်ဆတ်လွင့်လတ်ခါ၊ မာန်အောင်မြို့တွင်၊
လျှင်စောဆိုက်ရောက်ပါက၊ ဝမ်းကြီးသာလွန်အားရ၊ ဥပမာသည်၊ ရီတွင်ငါးကိုချသို့၊
ထားလတ်ခ၍ပေ၊ မျက်မှန်ဗိုလ်လည်း၊ လွင့်ချီလားလီသည်၊ မြို့ဝယ်ဌာနသို့လေး။

ဌာနမြို့မှာ၊ သူ့ပြည်ရွာသို့လားခါပေ၊ ကျွန်ုပ်ရို့သည်ယင်းခါက၊ ပျော်ပါးရွှင်ကာ၊ ချီ၍လာသည်၊
ထိုမှာတန်းချောင်းဝ၌၊ ဆိုက်ရောက်လီသောခါ၊ ရမ်းငြိသားသည်၊ သောသောရုရုဆာလျက်၊
လာ၍ပါမီးတုံက၊ ကြောင်းခြင်းရာကို၊ ယင်းမှာပြောပေလျက်၊ ရယ်နှုတ်ဆက်လားလီခါ၊
ကိုယ့်ဌာနသည်၊ ရခိုင်ပြည်ကြီးမှာ၌၊ သက္ကရာဇ်မှာတထောင်ဖြစ်၊ တရာသျှစ်ဆယ်၊

စွန်းဝယ်ခုနှစ်နှစ်တည်း။ မာယဖြစ်လဆန်းသာ၊ ငါးရက်နိသည်၊ နီထွက်တဗိုလ်ကျော်တွင်၊
မြို့ဝန်လျှင်ပတ်တင်သတ်၊ ကတ်တင်ဟူမှတ်၊ ဒေသျှိန်သတ်နှင့်၊ တိုင်ပင်ကြည့်ရှုလတ်၍၊
စစ်တွေရပ်မြစ်နားမှာ၊ ကောင်းသည်ခါဝယ်၊ မြို့ရွာတည်လုပ်ပါလျက်၊ ရခိုင်သာမူးမတ်များ၊
ကျွန်းအုပ်ကြီးသူ၊ အောက်ကျိမူလည်း၊ ဆောင်ယူသားမယားနှင့်၊ တသောသောလာကြခါ၊
ပုလိစောင်းညှင်း၊ ကြီးနင်းမောင်းခရာတည်း။ နတ်မနော်အာသာခ၊ ကိန္နရာသည်၊ ဝဲကာပုံ၍ကျသို့၊
စင်ထက်ကကခြင်းဟန်၊ ယိုးဒယားနှင့်၊ သဘင်ဇာတ်ကြီးခံလျက်၊ မြူးပျော်စံနီ၍သာ၊ မြို့ချာတိုင်ကို၊
သခင်တည်ခြင်းရာကား၊ လေးမျက်နှာသံကြိုးခတ်၊ မြင့်ခြင်းရာသည်၊ သုံးပုံ၏အဆင့်တည်း။
မိုးထက်သားအချိန်ခါ၊ ထက်ကြိုးသွယ်မျှင်၊ ဆွဲကာငင်၍၊ တိုင်တွင်အထွတ်ချာ၌၊
တင်းခွန်သာလွင့်ကာထား၊ ကာသရီဟု၊ ယုံးတော်ဆောက်လုပ်ငြားလျက်၊
လှိုင်းအိမ်များသုတ်သလာ၊ သူရဲတန်းနှင့်၊ ကြောင်းလမ်းမြို့ဇင်းခါဝယ်၊ ဆင်မြင်းသာရထား၊
ကျွန်းအိမ်ရာစီသည်၊ ကတ်တင်မင်းအများရို့၊ စီးလားငြားအသွယ်သွယ်၊ ဖြူနုထွတ်သည်၊
နတ်ဘုံသူအနွယ်တည်း။ မိုးထက်ဝယ်ညဉ့်မပြတ်၊ စည်ကြီးတီးခါ၊ ဗောဓုတ်ပါသည်၊
သံဝါတတွတ်တွတ်နှင့်၊ ပြောင်းသေနတ်အခြင်းသာ၊ နှဲမပြတ်သည်၊ ကဇာတ်ပျော်ကြပါ၏။
အင်းဖက်သာတန်းခါးမ၊ ရွက်ကြီးပြိုင်ပြိုင်၊ သုံးပင်တိုင်သည်၊ လှီယာဉ်သင်္ဘောလှနှင့်၊
ဗောက်တီကင်္ဂေါတူသာ၊ မီးငူမြစ်မှာ၊ ပြည့်မျှဝင်းလင်းပါ၏။ ရောင်းဝယ်ရာတသောသော၊
နီကြပါသည်၊ မြို့ရွာဆိပ်ကမ်းနား၌၊ ရခိုင်များမြန်မာပေ၊ ဟိန္ဒူတ်သာနီ၊ ဗရင်ဂျီနှင့်၊
ပသီကုလားသည်တည်း၊ ကသည်းနွယ်သျှမ်းရို့များ၊ စရိုက်ဘာသာ၊ နီကြပါသည်၊
မြို့ရွာထူထပ်ပေါ၏။ ထက်မြင့်ဖျားနတ်ဘုံသွင်၊ မြို့ချမ်းသာကို၊ သခင်တည်လုပ်ပါ၏။
လာလတ်လျှင်ထံရင်းတော်၊ ဖူးမျှော်ချင်၍၊ ခဏသွင်းလီခါဝယ်၊ မင်းကြီးသာဟိန္ဒူတ်သတ်၊
ဆိုက်ရောက်ဟိခါ၊ ကျွန်သာခရိုညွတ်၍၊ လျှောက်တင်မှတ်ပြောပြီးခါ၊ တဆတ်ဆတ်သည်၊
မပြတ်လားလီပါက၊ မင်းကန်ခေါ်ပလီဝ၊ သျှင်ပင်စေတီမကို၊ ရိုညွတ်ခပူဇော်ခါ၊ စိုးမင်းမြတ်သာ၊
ချီတက်လားလီပါက၊ လက်ဝဲမှာယိုးငုံဝ၊ အုန်းကျွန်းလက်ယာ၊ ဖွဲဒါရွာကို၊ မျှောင်ကာချီလားကြက၊
ကျောက်တော်မစေတီသာ၊ မြတ်သျှင်ချစ်ကို၊ ယင်းတွင်ပူဇော်ပါလျက်၊ နာမသာကုလားတန်၊
မြစ်ကိုစောင့်၍၊ ကူးလျက်လားလီပြန်သော်၊ နတ်ဗိမ္မာန်ဘုံအလား၊ ပီကျွန်းမြို့ကို၊
အညာဟုတွင်ငြား၏။ ချိုဆိမ့်ခါးအရသာ၊ လိုသမျှသည်၊ တခုမကျန်ပါတည်း။
ချမ်းအီးစွာဝပြောငြား၊ ကုလားမရမာ၊ နီကြပါသည်၊ ကျွန်းရွာထူထပ်ပေါ၏။
ကျောင်းဘုရားစေတီသာ၊ မသိတ်ဗလီ၊ ပြည့်လျက်နီသည်၊ ဖောက်ကျီခေါင်းတကာရို့၊
နော်မာသာဖတ်တုံငြား၊ သူ့ဘာသာသည်၊ ကုသိုလ်ကောင်းမှုများနှင့်၊ ရပ်တခြားသူရို့မှာ၊
ကုန်စည်လာလား၊ ရောင်းဝယ်များ၍၊ မယားသားကိုသော်မျှ၊ မိလျော့ကာပျော်၍ပေ၊
နီတုံငြားသည်၊ ဌာနမြို့ရွာနယ်သို့၊ ယင်းရပ်မြို့ရောက်လီက၊ ရှိနို့သျှင်သည်၊ မိခင်ထံရင်းစ၌၊
ရိုတုတ်ကွပူဇော်ကာ၊ ခရိုညွတ်၍၊ မပြတ်နီလျှင်းပါသည်၊ ပီကျွန်းရပ်မှာတည့်လေး။

ပီကျွန်းရပ်မှာ၊ နီလျှင်းပါသည်ယင်းခါတွင်၊ သားမောင်ပင်မိသဲချာ၊ ဘရင်၌သည်၊
သားချစ်ပြီး၍လာလျက်၊ ကျွန်ထံမှာပျော်ကဇာတ်၊ နတ်ဒေဝါသည်၊ ယင်းခါသင်ငြားလတ်သို့၊
ရင်ခွင်ထက်ထိုင်၍သာ၊ လိုင်ကိုဆွဲ၍၊ တွလျက်နီတုံလာ၏။ မွီးမည်တော်မင်းချွေးမ၊ သားဦးမိခင်၊
ငယ်ကျွမ်းဝင်သည်၊ သက်လျှင်မောင့်ချစ်စနှင့်၊ မိချွေးမအလုံးပေ၊ ခြောက်ပြစ်လွတ်သည်၊
မိုးနတ်သူဇာနယ်သို့၊ ရိုညွတ်ထွေဦးလျှင်ချ၊ ရှင်ဝမ်းသာသည်၊ ဒေဝါနတ်မမျှတည်း။

ချမ်းငြိမ်းလှသာယာစွာ၊ ပျော်ပွဲဆင်၍၊ ကဇာတ်နိကြရာဝယ်၊ ရခိုင်မှာမြို့ဝန်မင်း၊ ဟိန္ဒူတ်သတ်သာ၊
လျှင်စွာခေါ်လတ်လျှင်က၊ မယွင်းလားခါပေ၊ မင်းချွေးမကို၊ တချက်မျှော်ခီသော်က၊
ထက်အာကာဝတိန်ဖျား၊ သူဇတာသည်၊ ဟင်္သာဟန်မပြားတည်း။ နွဲ့သည်ခါးနှစ်ညိုကျော်၊
မျက်မှောင်ကွရုံ၊ နားဖန်စမုံမှာလည်း၊ ဝင်းပေါ်သည်မထင်လှ၊ ဆိုက်မရံပေ၊
ကျောက်မှန်မာခလျှနှင့်၊ ညှာစိမ်းမြပန်းနှယ်ပင်၊ မိုးကောင်းခင်ဝယ်၊ ရောင်ထင်လျှပ်နီပြက်သို့၊
ဖြူညွှသက်တကိုယ်လုံး၊ မွှီးမျိုးစုံသည်၊ ပန်းပုံကတိုးထုံးသို့၊ သျှောင်ဦးလုံးဆံကေသာ၊
နတ်မေကျော့သည်၊ အာပေါ၏ခံတွင်းက၊ ကြာညိုဆင်းပန်းရောင်သာ၊ သန္တာချောညက်၊
ဆယ်ဖြာလက်မှာ၊ စွဲလျှက်ဒန်းနီလာနှင့်၊ နှုတ်သီးသာကျီးအဆင်း၊ အကြောစိမ်းရှင်၊
မှန်သွင်အရောင်ချင်း၏။ တောက်ချင်းလင်းသည်ဝင်းဝါလတ်၊ ရွှိပန်းခက်ရံ၊ ပန်းတံဦးထိပ်ချပ်၍၊
ခြောက်ပြစ်လွတ်နတ်ဆင်းဝါ၊ မောင့်ချစ်စကို၊ မျှော်သူအံ့မောဟ၏။ ယူဆောင်လားလီငြားခါ၊
မင်းနီရာသည်၊ စစ်တွေမြို့ရောက်ငြားလည်း၊ အထက်ကလုပ်ဆောင်သူ၊ ရခိုင်ပြည်ကို၊
ထိမ်းသိမ်းသူဟု၊ မြို့ဝန်မူပတ်တင်သတ်၊ မင်းနှစ်ပါးသည်၊ တိုင်ပင်ပြုလုပ်ကြပ်လျက်၊
တိုင်းပြည်ရပ်ရခိုင်မှာ၊ ရီမြီစသည်၊ ရှိကထုံးဟိရာကို၊ သက္ကရာဇ်မှာတထောင်ဖြစ်၊ တရာ့သျှစ်ဆယ်၊
စွန်းသည်ကိုးခုနှစ်ဝယ်၊ ကိုယ့်ပြည်၏ဘဏ္ဍာတော်၊ ငွေနှစ်သိန်းကို၊ ယင်းခါစည်းကြပ်ပါလျက်၊
တိုင်းပြည်ရွာအလုံးဝယ်၊ မေ့ချစ်စကို၊ ‘ဒေးဝန်း’ ခန့်အပ်သည်တည်း။ တလစီမင်းမေးနာ၊
ငွေတရာကို၊ မပြတ်ပီးတုံပါလျက်၊ အသျှင်သာဟိန္ဒူသတ်၊ သားပမာသည်၊ မှန်စွာချစ်လေးမြတ်၍၊
(ပီပျောက်)

မှတ်ချက်။ ။ ဆရာမှာ ပီမူမှတဆင့်စက္ကူပြုထားသည်။ ပီမူ၏အံ့ဂါစိုင်းအက္ခရာတိကို
ကြွက်ကိုက်ထားသဖြင့် အစီအစဉ်ချရသည်။ စက္ကူမူလက်ရွှီးမှာ ထွန်းကျော်စိန်၏
လက်ရွှီးဖြစ်ပါသည်။ မစုံသိမ့်။ ၎င်းစက္ကူမှတဆင့်ရွှီးကူးယူသည်။

စံကျော်ထွန်း
(9/5/63)

မိုးထက် (၉) နာရီ၊ (၃၈) မိနိ။
၁၃၂၅ - ခု၊ ကဆုန်လပြည့်ကျော် (၂) ရက်
ကြသားပတီးနီ။

ခေတ္တ - မြင်းစိုင်းပြင်၊ တောင်ရပ်ရွာ
မြောက်ဦးမြို့ဟောင်း။
(29/10/93) နိတွင် လက်နှိပ်စက်ဖြင့် ထပ်မံကူးရိုက်ပြီးသည်။

(ဆရာဟူသည် ပဏ္ဍိတ်ဆရာကြီးဦးသာထွန်းဖြစ်ပါသည်။ စံကျော်ထွန်းဆိုသည်မှာ (AIO)
အတွင်းရေးမှူး ချင်းတောင်တန်း၌ကျဆုံးလားသော ဆရာစံကျော်ထွန်းဖြစ်ပါသည်။)

(ပထမမူကြမ်း)

နောက်ထပ်မူပွားများနှင့်ညှိနှိုင်း၍ အမှန်ဆုံးဖြစ်အောင် တည်းဖြတ်သုတ်သင်ကြပါကုန်။

(နောက်ဆက်တွဲ)

ဇေယန္တုသဗ္ဗမင်္ဂလံ

(၁) ဝံသဟိန္ဒူ၊ မျိုးမမှန်သည်၊ လင်းပြန်မသား၊ သင်ရိုးမှာတရုရ၊ မစားတတ်ကာ၊ ခိုက်ရန်ရှာသည်၊
ခွီးမှာသားရိုးလှသို့၊ တိုင်ပင်မှုစားသောက်ကာ၊ ကုသလယျား၊ ပါပပွားသည်၊ မိုက်မှားလူမိစ္ဆာတည်း။
ကျောင်းတကာရံဖော်သည်၊ မြို့ထဲခဲပစ်၊ ဆန္ဒညစ်နှင့်၊ စင်စစ်လင်းတငယ်သို့၊
သတ်စားမည်ကြောင်းအလား၊ လင်းနို့ပမာ၊ တူလှပါသည်၊ မှန်စွာမထူးပြားတည်း၊ (----)၊
နှုတ်မှာချိုပျား၊ ဝမ်းမှာမျှားတည်း၊ ဟုတ်ငြားမို့နှောက်ကာ၊ ရဟန်းသင်္ဃာ၊ မျိုးလေးဖြာရို့၊
မှန်စွာမလွတ်ပါတည်း။ ထောင်းသတ်ကာချုပ်၍ထား၊ ဒဂိုးရွှီငွေ၊ ပီးနိုင်ပေမ၊
ငြိမ်းထွေချမ်းသာရ၏။ စိတ်ဒုက္ခများသျှင်လူ၊ ဆာပူထပ်ထပ်၊ ကြိမတတ်သည်၊
ဆီးသတ်ငါးနယ်တူလိမ့်။ စွဲလမ်းယူမို့နှောက်စား၊ သူမိုက်ရို့မှာ၊ လွန်ဝမ်းသာလျက်၊
များစွာအားကြီးရ၍၊ စားသောက်ကြလူဗာလာ၊ တိုင်းမြတ်ရက္ခ၊ မြို့ဓညတွင်၊
ရပ်ရွာချောက်ချားပါ၏။ လူမိစ္ဆာတကျိပ်ခြောက်၊ ပေါင်းမြောက်ညီညာ၊ လူတကာရို့၊
များစွာစွဲလမ်းနှောက်၍၊ တယောက်တလုံးဆိုကာ၊ ကျန်ကြွင်းသောသူ၊ ထိုမျှလူရို့၊
ပြုမူသက်သိပါတည်း။ ကျမ်းစွဲကာမုသားပြော၊ မဟုတ်မမှန်၊ သက်သိခံသည်၊ ဧကန်တံစိုးစား၍၊
ပြောဆိုငြားတုံ့သောခါ၊ ဓမ္မာယွင်းချွတ်၊ ဒေးချိန်သတ်နှင့်၊ ဝါသတ်မင်းရို့မှာလည်း၊
ရွှင်ဝမ်းသာလွန်အားရ၊ သုံးလူထွတ်ချာ၊ မြတ်ဓမ္မာကို၊ မျှော်ကာမရှုကြဘဲ၊ မတွေးဆမစာနာ၊
အငြိုးဒေါသ၊ မာန်မာနကို၊ များလှသိုထားပါလျက်၊ စိတ်ဟိရာထိုမင်းများ၊ မဟုတ်မမှန်၊
မုသာလျံကို၊ လုပ်ကြံပြုရွှီးသားလျက်၊ ထိုယုံးမှာစီရင်ငှား၊ ဝန်ကြီးမှန်စွာ၊ မင်းလေးဖြာရို့၊
မှန်စွာမရှုငြားဘဲ၊ စာမုသားရို့ကိုသာ၊ ဟုတ်စွာမှန်လှ၊ အယူရ၍၊ ဖြစ်ထကေကောင်းသာဟု၊
မှတ်ခြင်းရာထင်မိမှား၊ ပညာနှင့်ညာဏ်၊ မြတ်ကျမ်းကန်ကို၊ တတ်ပွန်မကျွမ်းငြားဘဲ၊
တဖက်နားမုသားသာ၊ ပြုကာလုပ်မှတ်၊ ဒေးသျှိန်သတ်နှင့်၊ ဝါသတ်ရွှီးသောစာကို၊
ယူပြီးခါစာတရား၊ စီရင်သောခါ၊ ကျွန်ုပ်မှာကာ၊ ကြင်ရာသားမယားနှင့်၊ ဆွဲသားမျိုးတကာ၊
ဥစ္စာကျွဲနွား၊ စိုးပိုင်ငြားလည်း၊ လေကားကျွန်းရပ်ရွာကို၊ စွန့်၍သာရို့ကမ္မ၊ လားရတုံသည်၊
မိစ္ဆိမေဟု၊ သူပြည်နှောက်ဒေသ၊ ကိုယ့်မိဘအစိုင်လာ၊ ရံခါဆန်းထူး၊ မရောက်ဘူးသည်၊
ဝီးကျူးကုလားရွာသို့၊ ရှိကမ္မာထိုဘဝ၊ ဒါနပီးလျှူ၊ တောင်းဆုယူခါ၊ စိတ်မူမသန်ခ၍၊
ဤလောကပုညမှာ၊ ကြံရကြိုးစား၊ ရန်သူများရို့၊ တင်ငြားဖျက်ဆီးလာလျက်၊ ဘော်မပါတကာယ၊
ဒုက္ခပူဆာ၊ မင်းအာဏာကြောင့်၊ နာဝါခေါ်သဘောမ၌၊ စီးတက်ကြရွက်ဖြန့်ကာ၊ လီသာပြန်ပြော၊
တဟောဟောနှင့်၊ မြစ်ကြောယမုံနာကို၊ ရွှင်လာခါသမုဒ္ဒရာ၊ လျှိုင်းယက်လည်းဆူ၊ တအူအူသည်၊
ဥဖြူလျှိုင်းယက်ထ၍၊ မှိုင်းပျပျကြောက်ဖွယ်သာ၊ သီတာဟူကျင်၊ ကမ်းမမြင်သည်၊
မြစ်ခွင်သမုဒ္ဒာကို၊ ကူးသန်းကာတိုက်လာကြ၊ အလှရွှီတူ၊ သဲအူသားနှစ်ဝကို၊
လွန်ရုတပျောင်းစိတ်ဆာ၊ ကျွန်ကိုယ်သာချည်း၊ တယောက်တည်းသည်၊ ဖော်ကွဲငှက်ပမာသို့၊
မူးမှိုင်ကာကျမတတ်၊ ကြာပဒုမ္မာ၊ ပန်းခတ္တာကို၊ ပြင်းစွာနီပူခတ်သို့၊ အူသဲပြတ်လွန်လောင်ဆာ၊

တောင်ကျွတ်ငှက်လား၊ ရီမဲ့ငါးသို့၊ ညှိုးငြားစိတ်ဗျာပါနှင့်၊ သူ့ရပ်ရွာလူတချို့၊ ကုလိကတ္တာ၊ ဆိုက်ရောက်လာသည်၊ မိစ္ဆာကုလားမြို့လေး။

(၂) ကုလားမြို့ရွာ၊ မိစ္ဆာသို့ရောက်လာသည်၊ နောက်ရပ်မြို့သူဌာန၊ ပုပ္ပုပုည၊ ရှိမမှန်သည်၊ ကမ္မိမကောင်းလှ၍၊ စိတ်ဒုက္ခညှိုးပူဆာ၊ မယားကိုလွမ်း၊ သားကိုတမ်းလျက်၊ ညှိုးနွမ်းစိတ်ဗျာပါနှင့်၊ မျက်စိရွာလွန်ဆက်၊ နှမသူဇာ၊ မောင့်ကြင်ရာကို၊ ငိုကာမျက်ရည်ရွဲနှင့်၊ ဗိမာန်ထဲဟိလိမ္မည်၊ တမ်းကာမျော်လျက်၊ သည်ကိုတွက်၍၊ မောင်လှသဲကျက်သည်တည်း။ စိတ်မတည်လွန်ရုတ၊ နီကြသောခါ၊ ငြိုးလင်းပြာသည်၊ သံသာတမြမြနှင့်၊ ဘိုမနှစ်ကောင်လျှင်၊ သစ်ပင်မြင့်ဖျား၊ တူစုံနား၍၊ တွန်ငြားမြည်လာကျင်လျက်၊ လူအသွင်ဟန်မပြား၊ ငှက်ရို့ဘာသာ၊ ချစ်ကြင်နာသည်၊ မာယာပျူတများ၍၊ ဝဲပုံလားတူမကွာ၊ လင်းပြာငြိုးလှ၊ စာခွန်ကြသည်၊ ရုတထိုခြင်းရာကို၊ ကျွန်ုပ်သာမြင်လတ်က၊ အလှနတ်တူ၊ မျိုးအိမ်သူသည်၊ အဖြူမောင်နှမနှင့်၊ သားပုတ္တစိတရာ၊ သဲချာနှစ်ပါး၊ နောင်ကြီးအားနှင့်၊ ဆွဲသားမျိုးတကာကို၊ လွန်တရွာမြင်ချင်ငြား၊ ပုံလားရောက်ချင်၊ စားမဝင်သည်၊ ပုပင်ယိုစီးကျလျက်၊ သူဌာနတိုင်းရပ်ခွင်၊ သံသရာဟောင်း၊ ရှိုကံကြောင်းနှင့်၊ မကောင်းဖြစ်ရပါဟု၊ တွက်၍သာလွန်ပျောင်းပျ၊ သားလှသဲအူ၊ ရဲဘော်သူကြောင့်၊ ဆယ်ယူကြံမရဘဲ၊ လွန်ရုတနီသောခါ၊ ဥဩဖိုးခေါင်၊ ကုက္ကလောင်ရို့၊ မြောက်တောင်ပုံဝဲကာနှင့်၊ ကျူးသံဝါညံမစဲ၊ ပွင့်သစ်ပန်းမှာန်၊ ကျွန်ုပ်ကျွန်လည်း၊ ထပ်ပြန်လွန်ဆက်၍၊ အူအသဲကြီလှဘွယ်၊ ခြောက်ပါးလွတ်စင်၊ မျိုးအိမ်သျှင်နှင့်၊ ဆွဲလျှင်သားနှစ်သွယ်ကို၊ ရင်ခွင်ဝယ်ထားချင်ငြား၊ အောင့်မိတမ်းကာ၊ မျက်စိရွာသည်၊ ခန္ဓာလွန်ချောက်ချား၍၊ နတ်ရို့အားတိုင်တန်းကာ၊ ရက္ခပူရ၊ မြို့ခေတုကို၊ လျှင်စွရောက်အံ့သာတည်း။ ဘသဲချာသားပုတ္တ၊ သုံးပါးအခေါင်၊ (----)၊ ကုန်အောင်ပင်မရဟု၊ ပတ္တိတရိုဆရာ၊ မိန့်မှာမြွက်ကြား၊ ထိုစကားကို၊ ချစ်သားမြိမှတ်ပါလော့။ လူတကာထံရင်းပါး၊ ဝတ်တွားကျိုးနွံ၊ ထိုပုံစံကို၊ နားခံမှတ်ယူထား၍၊ လေးပါးမျိုးရို့ကိုသာ၊ ရို့သေတုတ်ကွ၊ ဦးနှိမ်ချ၍၊ မာနဝမ်းထဲမသို့နှင့်။ ရန်မလိုလူအများ၊ သနားချစ်အောင်၊ ကျင့်လုပ်ဆောင်လျက်၊ သားမောင်နီနှင့်ငြားလော့။ သဲမခြားနောင်ရင်းမှာ၊ သဲချာနှစ်ပါး၊ ကျွန်ုပ်သားကို၊ ပါယ်ယှားမပစ်ပါနှင့်။ နောင်ကြီးမှာဝမ်းထက်ဖွား၊ မပြားထိုတူ၊ ကျွန်ုပ်အူကို၊ ရှာယူကျွေးမွီးထားလော့။ ကျွန်ုပ်သက်ထားမျိုးအိမ်သူ၊ အဖြူအလှ၊ မေနှမလည်း၊ ဒါနမပြတ်လှူလျက်၊ သင်းပုံးမူရီချမ်းလောင်း၊ နတ်ပေါင်းရို့ထံ၊ သနားခံ၍၊ မညံ့ဆုယူတောင်းလော့။ ကောင်းကောင်းနီနှင့်ပါ၊ သစ္စာမပြား၊ ကျင့်တရားကို၊ မမှားထိမ်းသိမ်းပါလော့။ ကျွန်ုပ်မှာသစ္စာအား၊ ထက်များနတ်ရွာ၊ ဝတ္တိသာက၊ သူဇာမိုးသိကြားလျှင်၊ မလာငြားကန်တော့ခါ၊ နှစ်သက္ကသည်၊ ကုန်တမဟိချာဘဲ၊ များမကြာစောလျှင်လျား၊ ယောက်ျားလုံလ၊ ဝီရိယနှင့်၊ ညာဏပညာအားဖြင့်၊ လွန်ကြီးစားကြံစည်ခါ၊ ကောဇာမကူး၊ တာမကျူးခင်၊ စုံဖူးရမည်သာတည်း။ မေရို့မှာဆံခြည်မျှ၊ ကြောင်းကြစိုးရိမ်၊ အူနာလိမ်၍၊ ညှိုးပိန်မဟိကြနှင့်။ မြတ်သီလစောင့်သုံးကာ၊ မိတ္တာကမ္မဋ္ဌာန်း၊ နိဗ္ဗာန်လမ်းကို၊ မယွန်းဆောက်တည်ပါဟု၊ မျိုးကြင်ရာထံပါးသို့၊ ရှိုးသားလက်ာ၊ သိကုံးမှာသည်၊ လျှင်စွာရောက်လာဖို့လေး။

(၃) ရောက်တုံဟေမန်၊ ရာသီပြန်၍အချမ်းဝှမ်းသည်၊ စိတ်မတည်လွမ်းလောင်မှု၊ မောင်ကြောင့်တရူ၊ မျိုးအိမ်သူလည်း၊ အဖြူမအိပ်မူးတည်း။ လဲလျောင်းအုံးမိရာ၊ မေတော်တူမ၊

မောင့်သက်မျှရို့၊ ညံ့သက်ညောင်စောင်းသာ၌၊ စက်မိရာထိုခန၊ ကစ္ဆပနဒီ၊ ခေါ်တွင်ညီသည်၊
မြောက်ဆီဟေဝန္တာက၊ သွန်ကျလာသည်စုံလီပြင်း၊ စိမ့်စိမ့်ချမ်းကာ၊ အီးလှပါသည်၊
မိရာသလွန်တွင်းက၊ မေလုံးချင်းစက်မပျော်၊ ကြင်ရာသက်ထား၊ လင်ယောက်ျားလည်း၊
နံပါးဟိလာသွင်သို့၊ ထင်မိကာစိတ်ယောင်ယမ်း၊ ပန်းပုံမိရာ၊ သလွန်သာဝယ်၊ ထကာမို့၍စမ်းက၊
ငယ်ကြင်ကျမ်းမောင့်ကိုသာ၊ စက်ရာတူစုံ၊ ပျော်ကြတုံသည်၊ စက်ဘုံညောင်စောင်းသာ၌၊
စမ်း၍ရှာသော်မောင့်ကိုယ်ငို၊ မတို့သောခါ၊ မေရို့မှာလည်း၊ ထိုခါတချဲချဲနှင့်၊ တနွဲ့နွဲ့ကြက်သီးဝှမ်း၊
ပူပန်ပျောင်းပျ၊ မောင့်ကိုတ၍၊ အလှရာသက်နံ့ရို့၊ မိုးသောက်ပြန်ထတုံသောခါ၊ ဗိမာန်အိမ်နား၊
ပန်းစံကားသည်၊ သစ်ဖျားပင်ထက်မှာတည်း၊ ငှက်ရွှီဝါကေတတွတ်တွတ်၊ မပြားအသံ၊
လူသဏ္ဍာန်သို့၊ နှောင်းစွန်ကြားလီပါက၊ အကောင့်သာဟုတ်စနို့၊ ချစ်မျိုးစုံလင်၊ ရာသက်ကြင်သည်၊
ငယ်လင်ရောက်ပါဖို့ဟု၊ လွန်နှလုံးဝမ်းသာရွှင်၊ အလျင်အဆွ၊ မေအလှရို့၊ ချီကြွပျင်ထကျင်က၊
ပြုပြီလျှင်ဒက္ခိဏ၊ ဥတ္တရဒိပေ၊ မိစ္ဆိမေဟု၊ လေးထွေရပ်ဒေသကို၊ ရှုမျှော်ကြကြည့်သောခါ၊
မေ့မှာထိပ်ထား၊ လင်ဘုရားကို၊ ထွေပြားမမြင်ပါက၊ မျက်စိရှာတမ်းရွှီရွတ်၊ လှထွတ်ဝင်းပြောင်၊
နတ်ဆင်းယောင်ရို့၊ အိမ်မျှောင်မြီးတူးပြတ်သို့၊ ကြိမတတ်စိတ်ဖြစ်ကာ၊ ဒီပါမြင့်၊ သောင်းဇမ္ဗူတွင်၊
သျှင်လူများတကာရို့၊ ပျော်ကြရာခါရတု၊ ဝါကျွတ်သကြီန်၊ သဘင်ခံသည်၊ ရောင်လျှံမီးပွဲမှုကို၊
မကြည့်ရှုဝံ့ကြပါ။ ဖြူပြာနုထွတ်၊ ခြောက်ပြစ်လွတ်သည်၊ နီဝပ်ပန်းပမာသို့၊ ဆံကေသာကျောမထုံး၊
ပန်းကုံးမဆင်၊ ဟိသောသွင်သို့၊ မရွှင်စိတ်နှလုံးကား၊ ကြိမ်မီးအုံးထို့ပမာ၊ ကွမ်းယာထမင်း၊
ရီဆီဟင်းကို၊ စားခြင်းမဟိပါတည်း။ အုံးမိရာသလွန်ထက်၊ စက်လည်းမပျော်၊ မောင့်ကိုမျှော်လျက်၊
စစ်ခေါ်တသက်သက်နှင့်၊ ညဉ့်လုံးပြတ်အိပ်မပျော်၊ ငယ်လင်လူလှ၊ သားဦးဘကို၊
ရုတလွမ်းရို့ပင်တည်း။ မေရို့လျှင်လွန်ပျောင်းအိ၊ မောင်ကြောင့်လွမ်းဆောင်၊ အသဲလောင်သည်၊
ယာတောင်မီးတိုက်ဘိသို့၊ ကိုယ်မချိညှိုးစိတ်ဆာ၊ ရှိဦးဖွားမြော်၊ သားရဲဘော်လည်း၊
အဘနိတိုင်းခေါ်လျက်၊ ရှာတမ်းမျှော်သားပုလဲ၊ လက်ဝဲလက်ယာ၊ သျှစ်မျက်နှာကို၊
ပတ်ကာဝန်း၍ကြည့်က၊ ဘကိုလည်းမမြင်ခါ၊ ဟစ်အော်လူးလဲ၊ မိရင်ထဲဝယ်၊ ငိုကြွေးတစာစာနှင့်၊
မိကိုသာတတွတ်တွတ်၊ ကျွန်ကိုများကြင်၊ မိုးဘခင်ကို၊ ခုပင်ပြပါလတ်ဟု၊ တမ်းရွှီရွတ်သားသဲချာ၊
မပီတခွန်း၊ ပီတခွန်းနှင့်၊ ဖက်ရမ်းမီးပြန်လတ်က၊ ပြောစရာဆိုမတတ်၊ ခြောက်ပြစ်လွတ်စင်၊
မိနတ်သျှင်မှာ၊ ရင်ကိုထထောင်းသတ်၍၊ သက်လုံးပြတ်မောင့်ကိုရှာ၊ မျှော်ကာယောင်ယမ်း၊
တရုလွမ်းလျက်၊ ညှိုးနွမ်းစိတ်ဗျာပါနှင့်၊ ဆင်းကလျာမေအလှ၊ ယိုကျမျက်ရည်၊ စီးထွေထွေနှင့်၊
ပင်လယ်သမုဒ္ဒရာသို့၊ သွန်ကျလာသည်ဆယ်မနိုင်၊ ကယိုင်ကပါး၊ ဖြူညက်ထွားသည်၊
လျှောက်ကြားနတ်ကိုတိုင်၍၊ လေးကျွန်းပိုင်အိုသိကြား၊ နဂါးဗြဟ္မာ၊ အသူရာသည်၊
ဒေဝါသျှင်နတ်များနှင့်၊ မြတ်ဘုရားကူမပါ၊ ကျွမ်းဝင်ငယ်လင်၊ မေ့ထိပ်တင်ကို၊ ခုပင်နှင်းအပ်ပါဟု၊
ဆယ်လက်ဖြာဂေါင်းမှာထား၊ တိုင်ငြားလျှောက်ကာ၊ နတ်တကာလည်း၊ ကြင်နာလွန်သနား၍၊
လွန်ကြိုးစားညီညာကာ၊ အလျင်တဆွ၊ မေနုမကြောင့်၊ အလှမောင့်ကိုသာလျှင်၊
ဆောင်ယူကာသျှင်နတ်ရို့၊ ယခုမကြာ၊ ပို့ရောက်လာသည်၊ နီရာမေ့ထံသို့လေး။

(၄) သုံးဆယ်တဘုံ၊ အလုံးစုံသည်အကုန်သာ၊ အနိစ္စသည်သင်္ခါရ၊ ကမ္မဝိညာဉ်၊ လောကဓံကို၊
နိဗ္ဗာန်မမှတ်ရဟု၊ စိန္တေယသုံးလှချာ၊ ဓမ္မတရား၊ ဟိလျှက်သားကို၊ တွက်စားမပြုပါဘဲ၊
စိတ်ဟိရာကျင့်တုံငြား၊ ဒေါသရန်ငြို၊ ဝမ်းထဲသို့၍၊ ငွေကိုတန်စိုးစားလျက်၊ လူမိုက်မှားယခုသာ၊
ကြိရာအမှုတ်၊ အကျွန်ုပ်ကို၊ မဟုတ်ပြစ်မဲ့သာလျှင်၊ ဖျက်ဆီးရာလူဆယ်ခြောက်၊

ဦးစောက်လင်းပြန်၊ မျိုးမမှန်သည်၊ သူ့ကျွန်စားပိုးလောက်ရို့၊ ပြုမိနှောက်တုံပြီးခါ၊ သျှင်လူအများ၊
ဆင်းရဲသားကို၊ စွဲငြားနှိပ်စက်ပါ၏။ လူမိစ္ဆာအယူမှား၊ မဟုတ်မမှန်၊ မုသားကံကို၊
လုပ်ကြံကျမ်းစွဲငြားက၊ မတရားပြုသောခါ၊ ကုန္ဒာသတ္တ၊ ပုရိန္ဒသည်၊ ဌာနကိုယ့်နီရာက၊
ကြည့်ခီသော်လွန်ဆန်းပြား၊ မကောင်းသောသူ၊ မတော်လူရို့၊ အယူအကျင့်မှား၍၊
တရား၌မတည်ကြည်၊ ပြုကျင့်ရာကို၊ သူဇာသိကြားပြည်က၊ မြင်တုံလီထိုသောခါ၊ ရှိဆက်ကျူးလွန်၊
ပစ္စုပ္ပန်သည်၊ အမှန်မကောင်းပါတည်း။ နတ်တကာမနာလို၊ ဓမ္မာချင်းယွတ်၊ ဒေးသျှိန်သတ်နှင့်၊
ဝါသတ်မင်းရို့ကိုကား၊ နှင်လွတ်ဖြိုရာထူးချ၊ ဒုက္ခပူပန်၊ တိုင်ရောက်မှန်သည်၊ နိုင်ငံမိစ္ဆာမာ၌၊
မနီရပြောင်းရွှံ့ဆို၊ ကုသိုလ်ကယား၊ ပါပပွားသည်၊ မင်းများသူမိုက်ကိုလျှင်၊ ဖြိုထုတ်နှင်ဘိလပ်သို့၊
လျှင်စွာမကြာ၊ ပို့လီပါသည်၊ မှန်စွာနီရာမြို့လည်း။ မနှစ်လိုလူတကာ၊ တုပ္ပါနှင့်ပစ်၊
သူ့အပြစ်ကြောင့်၊ လူမိုက်လားရပါ၏။ သင်းပေါင်းဖော်လူဗာလ၊ ဝံသဟိန္ဒာ၊ လွန်ယုတ်မာသည်၊
မိစ္ဆာလူဗာလရို့၊ မည်နာမစံရွှံ့ဖွေ၊ လျှောက်ဖွေဟူငြား၊ အောင်ကုလားနှင့်၊ ဟယားငပုဝေရို့၊
မြီကြီးမျိုတွင်းဆုံးကျ၊ ခုမျက်မှောက်ပင်၊ လောကတွင်၌၊ ကျွန်လျှင်မြင်လိုရ၏။ တာပန္နသိမ်းစိုးယူ၊
မဟာတာပန္န၊ ရောရဝရို့၊ စိုးကြပိုင်တော်မူသား၊ ငရဲသားသူရို့အသျှင်၊ သီရိကုတ္တ၊ ယမလဟု၊
ခေါ်ကြနာမည်တွင်လျက်၊ စိုးအုပ်ကျင်နတ်အများ၊ ကျွန်မှာရန်သူ၊ ထိုသည်သူကို၊
သတ်မူလက်နက်ခါးနှင့်၊ ခုတ်သတ်ငြားချက်ပြုတ်ကာ၊ ကမ္ဘာရှည်လျား၊ ကြိမ်ဖန်များ၌၊
မပြားထားကြပါလော့။ တိုင်တန်းကာသက်သီပြု၊ လူမိုက်လင်းပြန်၊ မျိုးမမှန်သည်၊ ဟိန္ဒူထိုလူစုကို၊
ကိုင်ထောင်းထုချိုင်နှောင်ကာ၊ ခါးလှံသံလျက်၊ ဒုတ်လက်နက်နှင့်၊ ခွဲဖျက်ရင်ဖွင့်ပါဟု၊
ကျွန်ုပ်သာများဘဝ၊ သတ်ရပါလို့၊ သင်ရို့ကိုလည်း၊ ယွင်းယိုမဟိရတည်း။ ဘုမ္မိယကြီးမြင့်သူ၊
ပထဝီအာပေါ၊ မီးတေဇောဟု၊ ဝါယောခါတ်လေးဆူရို့၊ စောင့်ထိမ်းသူသျှင်နတ်မင်း၊ သိကြစီလို၊
နတ်ရို့ကိုလျှင်၊ ကျိမ်ဆိုထိပ်ပန်လျှင်း၍၊ အောက်ဟင်းလင်းဝီစိရွာ၊ ဒုက္ခမျိုးစုံ၊ ငရဲဘုံကို၊
လုံးချုံစိုးပိုင်ပါသား၊ နတ်တကာယမမင်း၊ မိန့်သတ်ခေါ်ဆို၊ ဒိဋ္ဌိကိုလည်း၊
နင်းဖြိုဖျက်ဆီးလျှင်းလော့။ သင့်သဲတွင်းချစ်သောသူ၊ သဲအူမယား၊ သမီးသားကို၊
သံဖက်စုန်းနတ်မူလည်း၊ သတ်နှင့်ယူလတ္တံ့လော့။ တပါးရပ်ရွာ၊ မြစ်များစွာသည်၊
သီတာပင်လယ်ခြား၍၊ ဆုံးပျက်ငြားဟိလီစီ။ လက်စုံဦးထား၊ နတ်အများကို၊
တိုင်းကြားလျှောက်ဆိုချီ၍၊ ရီတွင်နီစိုးပိုင်ခြင်း၊ ဒဋ္ဌရဋ္ဌ၊ ကုဝေရဟု၊ နာမခေါ်တွင်လျှင်းသား၊
နဂါးမင်းနတ်တကာ၊ ကုလားမိစ္ဆာ၊ ငပုသာကို၊ မှန်စွာဖျက်ဆီးပါလော့။ သင်ရို့မှာဖီးသျှစ်ပါး၊
ဆယ်ပါးသောဒါဏ်၊ ကြွင်းမကျန်သည်၊ ရန်မျိုးငါးပါးလည်း၊ ခုရောက်ငြားတို့ကြိုစီ၊
ချိုင်နှောင်တရပ်၊ ခြံချင်းခတ်၍၊ မပြတ်ထောင်ထဲနီ၍၊ ချုပ်အင်ထိုအဆက်ဆက်၊
သင်၌အိမ်ထောင်၊ များကုန်အောင်ကို၊ ယူဆောင်မင်းကဖျက်၍၊ ကြီဆုံးပျက်ဟိလီစီ။ ကိုးကွယ်မရ၊
ဝဋ်ဒုက္ခနှင့်၊ နိစ္စပြောင်းလီစီတည်း။ နီရိယေဝီစိလား၊ ကြိမ်များဖန်ဖန်၊ ဆင်းရဲခံ၍၊
သီပြန်ပျက်စီးငြားလျက်၊ သင့်မယားသက်နှံဝီ၊ တော်ရာစပ်ထ၊ ဟူသမျှလည်း၊
ကြီမ္မပြုန်းတီးစီလော့။ ကျိမ်ဆိုသည်နိမပြတ်၊ မြကျွန်းသပြီ၊ လေးရပ်မြီကို၊ စောင့်နီသျှင်နတ်မြတ်ရို့၊
ကြားသိမှတ်တိုင်သက်သီ၊ ကျွန်ကိုတခါ၊ ခုဖျက်လာသည်၊ ဆယ်ခါပျက်လီစီတည်း။
သက်နှံဝီသင့်သဲပွတ်၊ ကျားရဲခုတ်ငင်၊ တောင်တိုင်းတင်၍၊ နတ်လျှင်သံဖက်ခတ်လော့။
ပေါက်ပေါက်ခွတ်တန်းကျင်လျှို့၊ အရှင်လတ်လတ်၊ ဖမ်းငင်သတ်၍၊ တရပ်မြီကြီးမျိုလျက်၊
မြင်ရလိုကျွန်မျက်မှောက်၊ အမြောက်ခါးလှံ၊ လှဲကမံနှင့်၊ ဝါးချွန်သေခပ်ကျောက်လည်း၊
ခုရောက်ငြားသင့်ကိုယ်တွင်၊ ထိပါးသီဆုံး၊ မျိုးစိုင်တုန်းအောင်၊ ပျက်ပြုန်းနတ်စီရင်လော့။

အောက်ရပ်ခွင်ဘုမ္မစိုး၊ သူမိုက်ဟိန္ဒီ၊ ဦးဂါရီကို၊ စုံစီလက်နက်မျိုးဖြင့်၊ ခွတ်ထစ်ထိုးသတ်ကြပါ။
ရိုသေဝပ်တွား၊ နတ်ရို့အားကို၊ တိုင်ကြားလျှောက်ပန်ထွာ၍၊ ဝိဒေဟာကျွန်းဇေမ္မူ၊ ဦးတင်ဂုရု၊
ပညတ်ပြုသည်၊ နောက်စုဂေါယန်ဟူကား၊ လေးကျွန်းမူအမိသ်မှတ်၊ လေးရပ်ရကွာ၊
သစ်လေးဖြာကို၊ စောင့်ကာသျှင်နတ်မြတ်ရို့၊ သောင်းလေးရပ်ကျွန်းကမ္ဘာ၊ ဒီပါယူကျိုး၊
လေးပါးလုံးကို၊ သိမ်းရုံးစောင့်ထိမ်းပါသား၊ နတ်တကာသျှင်ဒေဝ၊ သူယုတ်လင်းပြန်၊ ရင်ရန်ရို့၊
တဖန်တိုးအောင်စသား၊ လူဗာလသင်ရို့မှာ၊ နှာခေါင်းနားရွက်၊ ကိုယ်ခြံလက်ဟု၊
တချက်ပျက်စီးစိသာတည်း။ ကျိုးပဲ့ကာတိုနာစား၊ များပြားရောဂါ၊ သင်ရို့မှာလျှင်၊
မှန်စွာစွဲရောက်ငြား၍၊ ထလာလားမတတ်နိုင်၊ မထိုင်မထ၊ စိတ်ဒုက္ခနှင့်၊ မြင်လှဆင်းရဲတိုင်၍၊
စမ်းလက်ကိုင်ရှာမရ၊ ကြိမ္မခန္ဓာ၊ သင်ရို့မှာလည်း၊ များစွာဖီးကြီးကျလျက်၊ သီဆုံးကြဟိလီစီ။
ရိုသေဝပ်တွား၊ နတ်အများကို၊ တိုင်းကြားလျှောက်ဆိုချီ၏။ ချစ်သက်ဝိသားမယား၊
ကျွဲနွားကျေးကျွန်၊ စပါးဆန်နှင့်၊ ဓနံရွှီဒဂီးလည်း၊ ဆုံးပျောက်ငြားများခိုးသူ၊ ဗဟုတန္တ၊ ဓါးမြရို့၊
သတ်ကြထောင်းထုယူ၍၊ ဖွဲပြာမူထိုအလား၊ ထိပါးခန္ဓာ၊ သင့်ကာယာလည်း၊
ရိမှာပျောက်ဆုံးငြားလျက်၊ မျိုးပါလားလီသောခါ၊ မီးကျောင်းလိပ်ငါး၊ မြို့ဟောက်ဖားရို့၊
ကိုက်စားသတ်ဖြတ်ပါလော့။ သင်ရို့မှာကြံမမြောက်၊ ချောင်းကြီးသီတာ၊ ယမုန္တာတွင်၊
နာဝါလှိုသားမှောက်သို့၊ သီဆုံးပျောက်ဟိလီစီ။ ကမ္မအသစ်၊ တဖန်ဖြစ်လည်း၊ (-----)။
ငါးရာဝဲလျှင်းလက်နှင့်၊ (-----)။ သင့်ခန္ဓာကို၊ မှန်စွာပေါက်ကာခွတ်လျက်၊ ခုတ်ထစ်သတ်ပါရစီ။
ကြိမ်များဖန်ဖန်၊ သင်ရို့ကံလည်း၊ အကျွန်လက်ဆုံးစိဟု၊ ကျိမ်ဆိုအလီလီနတ်ရို့အား၊
တိုင်ကြားဦးတင်၊ လျှောက်ဆိုကျင်သည်၊ အောက်ခွင်ဘုံတလွှားလေး။

(၅) အောက်ခွင်တလွှား၊ စောင့်နီငြားသည့်၊ နတ်များရို့ကိုတိုင်တန်းကား၊ ဤရပ်ရွာဘုံတလွှား၊
စိုးချုပ်ပိုင်ကာ၊ စောင့်ထိမ်းပါသည်၊ ဒေဝါနတ်ရို့အားလည်း၊ ထိပ်တင်ကြားလျှောက်ပါမည်။
လူရွာစိုးငြား၊ သျှင်နတ်များရို့၊ မှတ်သားရွှီနားတည်လော့။ ကျွန်ုပ်သည်ပြစ်ဆံရို့၊ မဟိမှန်စွာ၊
ခုသံသာတွင်၊ တင်ကာဖျက်လာဘိသား၊ လူဒိဋ္ဌိငပုသာ၊ ဟိန္ဒူသွီးသား၊ အောင်ကုလားနှင့်၊
ကုလားရွှီလုံးသာတည်း။ စံရဲဘော်တလင်းသား၊ ဟယားမျိုးနွယ်၊ ငပုဝေကား၊
ရှောက်ဖွေခိုးကုလားနှင့်၊ သီချီသားခိုးအောင်ချေ၊ လူလောင်ဟူဘိ၊ ပါတလီသည်၊ ဒိဋ္ဌိငဘိယေနှင့်၊
သက်နံဝေကျွန်မသား၊ ကုလားလင်းပြန်၊ ရင်ရန်ဟု၊ လူလွန်သျှမ်းအောက်သားနှင့်၊
တို့စကားပြောမကျီ၊ ဟိန္ဒူစင်စစ်၊ သီအောင်မိုက်သည်၊ လူညစ်ဥဂါရီတည်း။ တိုင်ပင်ညီတန်စိုးစား၊
ဆယ့်ခြောက်ယောက်လူ၊ ကျွန်ရန်သူသည်၊ စွဲယူကျမ်းမုသားတည်း။ မတရားသင်ရို့မှာ၊
မဟုတ်မလျှား၊ ကျွန်ုပ်အားဝယ်၊ ဖျက်ငြားပြုခြင်းရာကို၊ စီရင်ပါမြတ်ဘုရား။ နဂါးဂဠု၊
တန်းခိုးစုံသည်၊ အကုန်ရန်ခိုက်များနှင့်၊ ခုနှစ်အိုင်မဟာ၊ ကြီးစွာမည်မှတ်၊ နဝဒတ်ဟု၊
အရပ်ဆယ်မျက်နှာကို၊ စောင့်ထိမ်းရာသျှင်နတ်မင်း၊ အစီရဝတီ၊ ပညတ်ညီသည်၊
မဟိမြစ်ငါးစင်းကို၊ စောင့်နီငြားမြဲမကွာ၊ ဒေဝါပူရီ၊ ခေါ်တွင်ဘိသည်၊ မဏိမေခလာနှင့်၊
မြစ်သီတာပင်လယ်ချောင်း၊ စောင့်ကြပ်ပြုပျင်၊ အုပ်ထိမ်းကျင်သည်၊ သခင်နတ်အပေါင်းရို့၊
ကျွန်ရန်သူဟောင်းရို့ကို၊ နှင်းဖြိုခတ်သတ်၊ ရင်ကိုခွတ်၍၊ လိုင်ဖြတ်တန်းကျင်လျှိုလျက်၊
များထိုထိုဆက်မပြတ်၊ သင်ရို့သဲအူ၊ ချစ်သောသူကို၊ ငင်ယူခွဲခွဲသတ်လော့။
ဖီးသျှစ်ပါးရန်သူသာ၊ ဆိုက်ရောက်လာသင်ရို့အား၊ တို့ကြကြုံစီ၊ ဆုံးပျက်လီဟု၊
နတ်ဆီတိုင်တန်းကြား၏။ မီးကျောင်းကျားသစ်ဝံမြို့၊ ရောဂန္တရ၊ ဒုဗ္ဗိက္ခဟု။

ရောက်ထကပ်သုံးလီလည်း၊ သင်ရို့ဆီဆက်မပြတ်၊ ရောက်ငြားလာပုံ၊ ဖျားနာအံ့၍၊
အကုန်ဝန်းရံကပ်လျက်၊ ထိုးခွတ်သတ်ဖြတ်ပါစီ။ သုံးမည်လူ့ဘာ၊ မုနိန္ဒကို၊ ရှိခလျှောက်တင်ချီ၏။
ဤလူ့မြီခေါ်တွင်၍၊ တန်းခိုးမည်ကေ၊ သူရကယ်ဟု၊ ဆိုသည်နတ်တမျိုးတည်း။
ရုက္ခစိုးနတ်များသာ၊ သူရဿတိ၊ ကြေးစန္ဒီဟု၊ ဒေဝီနတ်မဟာနှင့်၊ လူ့ခန္ဓာကိုယ်ကာယ၊
စောင့်ကြပါသည်၊ ဒေဝီနတ်ဒွါဒရို့၊ ရှုမျှော်သကြည့်ပြီးခါ၊ လက်ကိုင်ထိမ်းမြား၊ ငယ်မယားသည်၊
သဘောသင်ရို့မှာလည်း၊ လက်ကိုင်ပင်ရှာမရ၊ ရာဇမင်းမူ၊ သိမ်းဖျက်ယူသော်၊
ပြည်သူအားကြီးရလျက်၊ ဟိလီကြလူများစွာ၊ မြိုင်လှောင်ငှက်လား၊ ရီမဲ့ငါးသို့၊ ညှိုးပါးစိတ်ဝိဆာနှင့်၊
ဝီစိရွာမှောင်တိုက်ထဲ၊ သင်ရို့ကမ္မံ၊ ဆက်မကျန်သည်၊ ပူပန်မပြတ်စွဲ၍၊ မြင့်ကြာမြတ်လီစီ။
သက်သီပြုထား၊ စာရွီးသားလျက်၊ နတ်အားတိုင်ကြားချီ၏။ ကျိန်ဆိုသည်နိမပြတ်၊ သတ္တရဘန်၊
မေယုဂန်ဟု၊ တောင်ရံခုနှစ်ထပ်ကို၊ စောင့်တုံမှတ်နတ်သက်သီ၊ ကျွန်ကပူပန်၊ ခုတဖန်မှာ၊
ဆယ်ပြန်ကုန်လီစီတည်း။ သုံးလုဆွဲမြတ်ဘုရား၊ ရုပ်ပွားသျှင်တော်၊ ဆင်းထုတော်ဟု၊
မြတ်ရာစေတီများကို၊ စောင့်ထိမ်းငြားနတ်တကာ၊ ကျွန်မှာပြစ်မဲ့၊ မဟုတ်ပဲကို၊
တည့်တည့်ဖျက်ဆီးလာသား၊ လုမိစ္ဆာသင်ရို့အား၊ သေနပ်ကားမှန်၊ ဝါးသစ်ချွန်ဟု၊
ဒါးလုံလက်နက်အားဖြင့်၊ စွဲကိုင်ငြားတုံပြီးခါ၊ မှန်စွာမပျက်၊ အဆက်ဆက်ကို၊
ကျွန်လက်နှင့်ပင်သာလျှင်၊ ဖန်ငါးရာသတ်ရကြောင်း၊ နတ်ပေါင်းရို့ထံ၊ နိမကျန်အောင်၊
အကျွန်ဆုယူတောင်း၏။ သျှင်နတ်ပေါင်းဖျက်ကြပါ၊ မဟာဗောဓိ၊ တုမဟိသည်၊ မုနိပလ္လင်တော်၌၊
မြဲမကွာဘေးရင်းဟပ်၊ စောင့်ကြပ်ရံကာ၊ ထိမ်းကြပါသည်၊ ဒေဝီသျှင်နတ်မြတ်ရို့၊
ကြားသိမှတ်တိုင်ဆိုကာ၊ (-----)၊ အလှမောင့်ကြင်ရာနှင့်၊ ခနသာကွဲရမည်ပါ။ ခုဆိုသည်လူ၊
ကျွန်ရန်သူမှာ၊ ချစ်သူဟူသမျှနှင့်၊ ကင်းရလိမ္မည်သာတည့်။ သုံးလုမြတ်မွန်၊ ဟောကြားညွှန်သည်၊
ခမ္မံမယွင်းပါတည်း၊ မြောက်ဟေမာရဂုံနတ်ရို့၊ တို့မှတ်ဖျက်ဆီးကာ၊ ထီးနန်းပြည်သာ၊
မင်းရာဇာနှင့်၊ ရပ်ရွာမြို့များစွာကို၊ စောင့်တုံပါနတ်ခပင်း၊ ဟေမဝန်တောင်၊ များသုံးထောင်ကို၊
ကုန်အောင်စိုးပိုင်လျှင်းသား၊ သျှင်နတ်မင်းသိပါလီစီ။ ဟိန္ဒီမျိုးဟူ၊ ကျွန်ရန်သူကို၊
လုဘုံကျွန်းရပ်မြီကာ၊ နှင်ထုတ်လီရပ်တခြား၊ မယားသားညီ၊ သင့်မျိုးဆွီကာ၊
တော်သည်အားလုံးများလည်း၊ သီဆုံးငြားပြုန်းတီးကာ၊ လက်ကိုင်မရ၊ ခုခနတွင်၊ ကြိမ္မုဖွဲ့နှင့်ပြာသို့၊
ပြုကာပင်မှန်မချွတ်၊ သုံးလုထွတ်ချာ၊ သာသနာကို၊ မြီစွာထံပါးကပ်၍၊ စောင့်နီလတ်နတ်များစွာ၊
စွယ်တော်လေးချောင်း၊ ဆံတော်တွက်ရို့၊ ကိုးကုဋီနှင့်၊ ကိုးလီသွားတော်ပေါင်းကို၊
စောင့်တုံလျောင်းနတ်တကာ၊ ကျွန်တော့ရန်သူ၊ ထိုသည်သူကို၊ ရှာယူဖမ်းသတ်ပါလော့။
သင်ရို့မှာစုံတခု၊ ကောင်းမှုကုသိုလ်၊ နောင်ဖို့ဆို၍၊ လိုစီအကြောင်းပြုလည်း၊ မြီထုရွီသချာ၊
နှစ်သိန်းသျှစ်သောင်း၊ မြီအပေါင်းကို၊ ထိမ်းကျောင်းစိုးအုပ်ပါသား၊ နတ်ဒေဝီသူနို့၊ အညီအညွတ်၊
သင့်လျှူဝတ်ကို၊ မချွတ်စောင့်ပစ်လီလော့။ များစုံစီသျှစ်စရွတ်၊ သုံးလုထွတ်ချာ၊ သမ္မုဒ္ဓာ၏၊
မြတ်စွာဘုရားခါတ်ကို၊ စောင့်ရံမှတ်နတ်ဒေဝီ၊ ဝိဇ္ဇာထိုရ်ရ၊ တောအောင်းကြသည်၊
မြတ်လှရသေ့ကျော်ရို့၊ စောင့်တုံပါနတ်ဒေဝီ၊ ကျွန်၏ရန်သူ၊ ထိုမျှလူကို၊ ရှာယူဖျက်ကြပါလော့။
နှစ်ရက်လဗီဇနာ၊ သျှစ်သောင်းလေးထောင်၊ အစောက်ဆောင်သည်၊ များမြောင်ကျမ်းပိစာနှင့်၊
သုံးပုံစာပိဋကတ်၊ လေးရပ်ဗေဒင်၊ စောင့်ထိမ်းကျင်သည်၊ များဖျင်ထိုနတ်မြတ်ကို၊
ကျိမ်ဆိုမှတ်တိုင်တန်းကာ၊ ဗုဒ္ဓေပစ္စ၊ စိန္တေယျသည်၊ လုဘရို့မြတ်စွာနှင့်၊ ရီစံပျော်ဥပဂုတ်၊ မဂ္ဂဖလံ၊
သင်္ဃာမွန်ကို၊ အကျွန်ရို့ခတုတ်၍၊ သက်သီလုပ်ရို့ခိုးကာ၊ ဟတ္တာစုပေါင်း၊ လက်ဆယ်ချောင်းကို၊

ပေါင်း၍လျှောက်ပန်ထွာ၏။ နတ်တကာမြတ်ရို့အား၊ ကြောင်းလျှားစိစုံ၊ တိုင်ကြားကုန်သည်၊ လှဘုံရပ်မြဲသားလေး။

(၆) သုံးခွင်ပိုင်စိုး၊ နတ်မျိုးရို့ကိုရိုခိုးကာ၊ နတ်ဒေဝါများသိန်းသောင်း၊ ရက္ခသာစည်၊ ရခိုင်ပြည်သို့ ပြန်လည်လားရကြောင်းကို၊ နတ်အပေါင်းကယ်မပါ။ သုံးဆွီလုဘာ၊ မုနိန္ဒကို၊ ရှိခလျှောက်ပန်ထွာ၏။ သမ္မုဒ္ဓါသုံးလုထွတ်၊ ညှပ်ရိုးနှစ်ဖြာ၊ သွားစွယ်တော်ကို၊ စောင့်ကာသျှင်နတ်မြတ်နှင့်၊ သျှစ်စရွတ်သည် သွားတော်ပေါင်း၊ ဆံမြတ်တွက်ရွှါ၊ ကိုးကုဋီကို၊ ရောက်စီဆုပန်တောင်း၏။ သျှစ်သောင်းမွှီးရင်တော်၊ သုံးပုံမည်မှတ်၊ ပိဋကတ်ဟု၊ လေးရပ်ပေဒင်စာနှင့်၊ (-----)၊ သျှစ်သောင်းလေးထောင်၊ အမြင့်ဆောင်သည်၊ မြင့်ခေါင်စေတီများကို၊ စောင့်တုံငြားနတ်တကာ၊ ရက္ခပူရ၊ မြို့ဓညဟု၊ ဌာနကိုယုံမြို့ရွာသို့၊ ဆောင်ပို့ပါလျှင်တဆွ။ သတ္တရဏန်၊ တောင်ယုဂံဟု၊ တောင်ရံခနှစ်ထပ်ကို၊ စောင့်တုံလတ်နတ်ဒေဝါ၊ မဟေသာရ၊ ဝရုဏနှင့်၊ ဗြဟ္မာအသူရာရို့၊ လက်ဆယ်ဖြာစုံစွာပေါင်း၊ သားဦးဘခင်၊ မျိုးအိမ်သျှင်နှင့်၊ တူပင်စံရကြောင်းကို၊ နတ်အပေါင်းကယ်မပါ။ အဋ္ဌဝီသတိ၊ တုမဟိသည်၊ မုနိမြတ်ငါးဖြာနှင့်၊ ပစ္စေကာသျှင်ဗုဒ္ဓ၊ နက္ခတ္တဂြိုဟ်သတာ၊ စန္ဒရာသည်ကြယ်နီလကို၊ ဦးနှိမ်ချလျှောက်ဆိုတင်၊ နတ်သွင်ရုပ်တူ၊ ကျွန်ကြင်သူသည်၊ အဖြူမျိုးအိမ်သျှင်နှင့်၊ စံပျော်ရွှင်တူတကွ၊ ပုတ္တစီတာ၊ သားချစ်စွာသည်၊ သဲချာရင်သွိုးလှကို၊ ယုယကာနီရစီ၊ လူ့ဆွီဘုရား၊ ရင့်ဆယ်ပါးနှင့်၊ နုဖွားငါးရာလီကို၊ တိုင်တည်သည်နိမမြတ်၊ မိုးထက်အာကာ၊ ဝတ္တိသာဝယ်၊ စူဠာမုနိခါတ်နှင့်၊ ရသေ့မြတ်ထိုရိဝိဇ္ဇာ၊ တောကြီးကိုမို့၊ တပသီဟု၊ ယောဂီမြတ်ရို့ကိုလည်း၊ တောင်းပန်ဆိုတုပ်ဝပ်စင်း၊ နိရိယေဟုတုံ၊ ငရဲဘုံကို၊ လုံးချိုပိုင်နှိပ်နင်းသား၊ ယမမင်းဖုတ်ပြိတ္တာ၊ ယက္ခာဘီလူး၊ မျှောင်ခြောက်ပူးသည်၊ နတ်ရူးဖုတ်မိစ္ဆာနှင့်၊ တထေ့အိမ်စောင့်နတ်ရို့၊ ညီညွတ်ကြတုံပြီးခါ၊ တသကြိုးကုတ်၊ အကျွန်ုပ်ကို၊ ချွတ်နှုတ်ကယ်မပါလော့။ တိုင်တန်းကာလျှောက်ပန်ကြား၊ သျှစ်သောင်းလေးထောင်၊ နှစ်ပြန်ဆောင်သည်၊ မြင့်ခေါင်မြင့်မိုရ်ဖျား၌၊ စောင့်နီငြားနတ်တကာ၊ သီတာလေးစင်း၊ ကြီးကျယ်ခြင်းသည်၊ အိုင်မင်းခုနှစ်ဖြာနှင့်၊ မြစ်ကြီးသာသွယ်ငါးပါး၊ မြစ်ငယ်ငါးရာ၊ ချောင်းလဟာဟု၊ ဖြာဖြာမြစ်ငယ်များနှင့်၊ ကျွန်းလေးပါးကြီးမဟာ၊ ငယ်စွာဒီပ၊ နှစ်ထောင်မျှကို၊ စောင့်ကြနတ်တကာရို့၊ ကျွန်ကိုသာလျှင်၊ ခုပင်လျှင်ဆွ၊ မိဘဌာနီ၊ ဓညမြို့၌၊ မျိုးဆွီထံရင်းစသို့၊ ဆောင်ယူကြပို့ကြပါ၊ ဆယ်ဖြာလက်ဖျား၊ ဂေါင်းထက်ထား၍၊ တိုင်ကြားလျှောက်ဆိုပါ၏။ ရီစံပျော်နဂါးမင်း၊ အစီရဝတီ၊ ခေါ်တွင်ညီသည်၊ မဟီမြစ်ခပင်းကို၊ စောင့်နီခြင်းမေခလာ၊ ပမာတူပြီး၊ နတ်သမီးသည်၊ ပြောင်ညီးသုဇတာနှင့်၊ သုနန္ဒာနတ်မေယ၊ သူရသတီ၊ သုန္ဒရီဟု၊ ဒေဝီနတ်မိဗ္ဗရို့၊ မိတ္တမျှကူမပါ။ ထီးနန်းပြည်တော်၊ များရပ်ရွာကို၊ စိုးတုံပါသျှင်နတ်မင်း၊ အပြင်းယူဆောင်၊ ကျွန်ုပ်မောင်ကို၊ ရောက်အောင်မေထံရင်းသို့၊ ပို့ပါလျှင်လျှောက်ပန်ထွာ၊ နောင်လာသျှစ်သောင်း၊ ဘုရားလောင်းနှင့်၊ ရီကြောင်းကိန်းအောင်းပါသား၊ ရဟန္တာဥပဂုတ်၊ မဂ္ဂဖလံ၊ သံဃာမွန်ကို၊ အကျွန်ရို့တုတ်ခ၍၊ လက်ဦးချဂေါင်းတင်ချီ၊ စန္ဒီမာသာ၊ နှစ်ကောဇာသည်၊ ဒိဏ္ဍာရက်တီထီကို၊ စောင့်ထိမ်းပြီးနတ်ဒေဝါ၊ ဟေဝန်သုံးဆောင်၊ လွန်များမြှောင်သည်၊ မြင့်ခေါင်ပဗ္ဗတကို၊ စောင့်တုံကြနတ်တကာ၊ သက်လုံးမျှကြင်၊ ခြောက်ပြစ်စင်သည်၊ နတ်သွင်ထံရင်းမှာသို့၊ ခုပို့ပါကူညီကြ၊ အဆင်းရွှီတူ၊ မျိုးအိမ်သူသည်၊ အဖြူမောင်နှမနှင့်၊ တူတကွစံလျှက်သာ၊ သဲချာနှစ်ပါး၊ သမီးသားကို၊ နံပါးထားပြီးခါမှ၊ တိုင်းရက္ခာကိုယုံဌာန၊ နှမနှင့်မောင်၊ ပြည်တည်ထောင်၍၊ အိုအောင်မယွင်းခွဘဲ၊ နီထိုင်ကြရပါစီ။ လက်ရွှီဦးထား၊

ကျွန်လျှောက်ငြား၍၊ နတ်အားတိုင်ကြားချီ၏။ အောက်ရပ်မြို့ဘုမ္မစိုး၊ တန်ခိုးပြင်းထန်၊
ကြီးမားသန်သည်၊ နတ်မွန်ပိဿနိုးနှင့်၊ ရုက္ခစိုးနတ်များစွာ၊ သဒ္ဓါကြိုးကုတ်၊ အကျွန်ုပ်ကို၊
ချွတ်နှုတ်ကယ်မပါလော့။ နတ်ခြောက်ရာတုဘက်ကင်း၊ တန်ခိုးပြင်းထိန်၊ အသူရိန်ဟု၊
ဒေဝိန်ထိုနတ်မင်းနှင့်၊ မာန်နတ်မင်းကိန္နရာ၊ ပရမီသွာရ၊ နတ်ဒေဝဟု၊ ဝဿဝရောသာတည်း။
ချစ်သဒ္ဓါမိတ္တာ၊ ရှိဝတ်လည်းဆူ၊ ဤအပူကို၊ ကယ်ယူချွတ်နှုတ်ကြ၍၊ ကျွန်ဌာနကိုယ့်ရပ်ရွာ၊
ကြင်ရာသက်ထား၊ သားမယားနှင့်၊ နိငြားတိုင်းရက္ခာသို့၊ ပို့ဆောင်ပါကျွန်ကိုတည်း။
မြင့်မိုရ်ထိပ်ချာ၊ ဝတ္တိသာကာ၊ ဣန္ဒာသိကြားကြည့်လော့။ ပတ်ကာလှည့်ဖလ်စကြာ၊
လေးကျွန်းရောင်ချင်း၊ စက်ဟိန်ပြင်းသည်၊ နီမင်းသူရိယာနှင့်၊ လီဝေါယောမိုးနတ်သား၊ ပဉ္စခန္ဓာ၊
လူတကာကို၊ စောင့်ရာသျှင်နတ်များရှိ၊ ချစ်သနားကယ်မပါ။ အာကာသစိုး၊ ကျော်ဟိန်ကြီးသည်၊
နတ်မျိုးရှိတကာနှင့်၊ နတ်မဟာခြောက်ဘုံထွတ်၊ ဗြဟ္မာနှစ်ဆယ်၊ မဂ်လေးသွယ်ကို၊
စောင့်ပေသျှင်နတ်မြတ်ရှိ၊ ညီညာကြတုံပြီးခါ၊ ပူဆာဆင်းရဲ၊ ဤဝဋ်ဖီးက၊
ချွတ်၍ကယ်တင်ပါလော့။ သားပုတ္တစိတရံ၊ အလှနတ်သွင်၊ ရာသက်ကြင်သည်၊
မျိုးသျှင်ထံရင်းစသို့၊ ပို့ကြပါလျှောက်ဦးတင်၊ ပလ္လင်ရက္ခိ၊ တုမဟိသည်၊ ဗောဓိပြိုင်ညောင်ပင်၌၊
စောင့်ထိမ်းကျင်ရံပဝင်း၊ ရက္ခဂုဗ္ဗာန်၊ တန်ခိုးသန်သည်၊ နတ်မွန်ဂဠုန်မင်းနှင့်၊ တိုင်းရက္ခာမြို့စည်၊
စောင့်ကြတုံပါ။ (----)၊ ဒေဝါမြောက်ဦးစသား၊ နတ်ဆယ်ဝရင်ရဲကန်၊ လက်ပံဝသဲ၊ တန်ခိုးကဲသည်၊
ရီထဲနတ်မြတ်မွန်နှင့်၊ တဖန်နတ်မယူသျှင်၊ ယောငုံမုံကျား၊ ကျော်ထင်ရှားသည်၊ ဗုဒ္ဓေါဇိနဟူသား၊
ရာထောင်မူနတ်ပေါင်းသား၊ တခြားနတ်တကာ၊ သုံးဆယ့်တဘုံ၊ စောင့်ကြပ်တုံသည်၊
အကုန်နတ်များစွာနှင့်၊ သုံးလူချာမြတ်ဘုရား၊ ကိုယ်စားတူပြီး၊ မဟာထီးကို၊
ဦးနှိမ်ထိပ်ထက်ထား၍၊ ရှိထံပါးလက်ဆယ်ဖြာ၊ ပူဇော်ရုံညွတ်၊ နိမပြတ်လျှင်၊
တိုင်မှတ်လျှောက်ဆိုကျင်သည်၊ သုံးခွင်ရပ်ဆီအားလေး။

(၇) သုံးခွင်နတ်အား၊ ဦးထိပ်ထား၍တိုင်ကြားကာ၊ နတ်ဒေဝါများသိန်းသောင်း၊ နတ်ပေါင်းတကာ၊
သားပမာသို့၊ မိတ္တာဝီဌလောင်းလျှက်၊ နတ်အပေါင်းမင်းရာဇာ၊ စစ်မီးရာထိုခန၊ ဆံ့မျှင်တမ္မာ၊
ကျွန်ုပ်မှာလည်း၊ ပြစ်သာမဟိကြ၍၊ မိန့်တော်ဟလွတ်ပြီးခါ၊ လွန်စွာတဆွ၊ မကြာရဘဲ၊
ဌာနတိုင်းရပ်ရွာသို့၊ ပြန်လားခါအကြောင်းရင်း၊ အမိန့်တော်စာ၊ ကျွန်ုပ်မှာသို့၊ အာဏာရွီး၍ပီးက၊
မြတ်လေးဦးတင်ကာ၊ ရက္ခသာစည်၊ ရခိုင်ပြည်သို့၊ ပြန်လည်လားကြခါလျှင်၊
လွန်ဝမ်းသာရွှင်အားရ၊ အလှမောင်သာ၊ လှီနာဝါ၌၊ လျှင်စွာစီးတက်ကြ၍၊ ကျူးသံမြမောင်းခရာ၊
ဗုံသာလင်းခွင်း၊ စည်မောင်းညှင်းသည်၊ သာခြင်းဧကဗျာနှင့်၊ တီးမှုတ်ကာတသောသော၊
ကျယ်လှကြီးစွာ၊ မြစ်ဂင်္ဂါကို၊ နောက်မှာပါယ်လှုပ်ထား၍၊ ရွှင်ပျော်ပါးစားသောက်ကာ၊
ကြော်ငြာဟစ်ဟဲ၊ တသဲသဲသည်၊ အောင်ပွဲခံကာကာနှင့်၊ ဖြားသင့်ရာလီသင့်လိုက်၊ သမုဒ္ဒရာ၊
ယုမုန္တာဟု၊ သီတာပင်လယ်မြစ်ကို၊ ရွက်ဖြူတိုက်ကူးခတ်ကာ၊ လှိုင်းယက်လည်းဟူ၊ ရီများဆူ၍၊
ဦးဖြူဆောင်းကာကာတည်း။ တောင်ပမာလှိုင်းကြီးထ၊ ကမ်းကိုမမြင်၊ ကျယ်ဝန်းကျင်သည်၊
မြစ်ခွင်ပင်လယ်မ၌၊ (-----)၊ မဲနယ်ဟုဆို၊ စိမ်းစိမ်းညိုသည်၊ မြစ်ကိုမဲနက်ပါ၏။
ကြည့်ဒီသော်ကြောက်ဖွယ်တည်း။ ငါးကြီးငါးဆင်၊ ငါးမန်းကျင်လည်း၊ များဖျင်အပုံဟိနှင့်၊
ရွှင့်တုံပြီးလာကြခါ၊ ရက္ခပူရ၊ မြို့စည်၏၊ ဒေသနယ်ဝင်လာကာ၊ ရီရိုးမှာဖြူဆွဆွ၊ ဆီးနှင်းစုံစီ၊
မှိုင်းမှိုင်းဝီသည်၊ တောင်ခြံကမ်းနားစကို၊ မြင်လတ်ကြတုံသောခါ၊ ဝမ်းသာအားရ၊
စားသောက်ကြ၍၊ လျှင်ဆွခတ်လာပါက၊ မြေငုံမှာဆံတော်ခါတ်၊ အဝီးကပင်၊ မှိုင်းမှိုင်းမြင်သော်၊

ကျွန်လျှင်ရိုခညွတ်၍၊ ပူဇော်မှတ်တုံသောခါ၊ သောင်းသောင်းထိမ့်ဆူ၊ ဖွေးဖွေးဖြူသည်၊
နတ်လူသာထုခေါ်၏။ ဖြားရီပေါ် ရွက်ဖြန့်တိုက်၊ မြေငုံဟုခေါ်၊ ထိုကျွန်းမော်ကို၊
ဟစ်ကြော်လီသင့်လိုက်၍၊ ပတ်ခါရစ်ခတ်ကြခါ၊ အင်းဝဟူတုံ၊ ထိုသဲခုံကို၊ ဖြားဆုံဝင်ကြပါ၍၊
ခုံဝမှာကျွန်းအလွတ်၊ နာမခေါ်ဆောင်၊ လီသျှိုင်းတောင်ကို၊ နံမျှောင်ဖယ်ခလွတ်လျက်၊
ကြော်ငြာကြခတ်လာခါ၊ ရှုကာမျှော်လျက်၊ လက်ဝဲဖက်ကို၊ တချက်ကြည့်ဒီပါက၊
မြို့စစ်တွေမှာအမိသ်မှတ်၊ အာကျိပ်တော်လျှင်၊ ငါးမည်စင်သည်၊ သျှင်ပင်ဘုရားခါတ်နှင့်၊
ဗုဒ္ဓေါနတ်ရို့ကိုသာ၊ အဆင်းရွှီရောင်၊ ဝင်းဝင်းပြောင်သည်၊ မေ့မောင်မြင်ပါလတ်က၊
ဦးနှိမ်ချရို့ညွတ်ခါ၊ ဖြီးချပ်ခေါ်ဆောင်၊ ပွဲကြည့်တောင်ဟု၊ မြင့်ခေါင်ပဗ္ဗတ၏၊
ဗေထိပ်မအလယ်ပေါ်၊ မှတ်ဆိတ်တော်ခါတ်၊ သျှင်တော်မြတ်ကို၊ တန်ရပ်ရို့ဝယ်မျှော်က၊
ရို့ပူဇော်ရိုညွတ်တွား၊ လက်ဝဲဖက်မှာ၊ မြို့ချမ်းသာကို၊ မျှော်ကာကြည့်လတ်ငြားက၊
ဘုရားကျောင်းစေတီသာ၊ ဇင်းခါယူမှန်း၊ စိုးကြောင်းလမ်းနှင့်၊ ဆိပ်ကမ်းတန်းထားမှာလည်း၊
အံ့ဖွယ်သာရွှီမရ၊ ဆိုင်နှင့်ဒုက္ကံ၊ အိမ်ဗိမှာန်လည်း၊ ကြက်ပျံပင်မကျတည်း။
ရောင်းဝယ်ကြများလူသျှင်၊ (-----)၊ ဖွေးဖွေးဖြူသည်၊ ပြည်သူများဗိုလ်ပါနှင့်၊
ကျွန်ုပ်သာစိုက်ပျိုးငြား၊ ကွမ်းသီးအုံးပင်၊ ပိန္နဲပင်ဟု၊ ထန်းပင်သရက်များနှင့်၊
လွန်ဆန်းပြားသစ်တကာ၊ ဗိမှာန်သာမော၊ ဥယျာဉ်တောကို၊ ထင်ရှားမြင်လတ်ပါက၊
ရွှင်ဝမ်းသာလွန်အားရ၊ ဌာနရပ်ရွာ၊ မြို့ချမ်းသာသည်၊ အိမ်မှာဆိုက်ရောက်ကြ၏။
ကျောက်ချကြတုံပြီးခါ၊ အလျှင်တဆွ၊ မောင်အလှကား၊ ချီကြွတတ်လတ်ပါလျက်၊
မေ့ထံမှာရောက်လတ်က၊ နှမချစ်စွာ၊ မောင့်ကြင်ရာသည်၊ သူဇာမနော်မသို့၊ ရိုတုတ်ကွမောင့်ထံမှာ၊
ထိုင်ကြဝန်းရုံ၊ ဒြိတော်ခုံကို၊ ယူတုံကိုင်မပါလျက်၊ ဂေါင်းထက်မှာယုတ်တင်ထား၊ ဝတ်တွားရိုသေ၊
ကန်တော့ပေသည်၊ ရှုဖွယ်နတ်မပြားတည်း။ ဖြူညွတ်တွားဆင်းကလျာ၊ ဆီးလိပ်ကွမ်းယာ၊
အဖြာဖြာကို၊ ထိုခါပီးကမ်းလာ၍၊ ကျွန်ုပ်မှာလူချစ်ရိုး၊ နှမသူဇာ၊ လှကလျာက၊ ရှိရင်ကျူး၍မိုးသား၊
ချစ်သားကြီးမောင်ရဲဘော်၊ ကြာဇံသမီး၊ ရှုမငြီးရို့၊ လျှင်ပြီးခုန်ကာလာ၍၊ မိုးဘသာထံရင်းပါး၊
ချစ်သဲဟူသည်၊ သားနှစ်ထွေရို့၊ ဖက်လိုင်ဆွဲလာငြား၏။ မျိုးဆွိုသားညာတိကာ၊ ပြည်သားရွာသူ၊
ဖွေးဖွေးဖြူမျှ၊ သျှင်လူများတကာလည်း၊ ရောက်ပေလာမောင်ကစ၊ ပုတီးမိတ္တာ၊ ဘာဝနာကို၊
များစွာသွန်းလောင်းကြ၍၊ ဦးလျှင်ချကန်တော့ခါ၊ အဖူးလက်ဆောင်၊ သိန်းသောင်းထောင်ဟု၊
များမြှောင်ပီးဆက်လာ၏။ နတ်ဩဇာချိုမယွင်း၊ မွီးခြင်းကြိုင်စွာ၊ အရသာသည်၊ ဂဏ္ဍာနို့ထမင်းဟု၊
ငါးဟင်းများတကာ၊ များစွာချက်ပြီး၊ သားသမီးနှင့်၊ မညီးဝန်းရံကာလျက်၊
စားသောက်ခါတသောသော၊ ဖော်များခြံရံ၊ ပျော်မြူးစံသည်၊ မေ့ထံတော်ရင်းပါးလေး။

(၈) သုဝဏ္ဏပူရ၊ အယုဇ္ဇသည်ရမ္မာသာ၊ တိုင်းရက္ခာမြို့စည်၊ ဗုဒ္ဓလေးဆူ၊ ပွင့်တော်မူသည်၊
လွယ်ကူဗျာဒိတ်ရသား၊ ဂစ္ဆပနဒီ၊ ရှိဆီအနောက်ဖက်၌၊ ထီးနန်းဆက်သည်၊ မပျက်အလီလီတည်း။
ပြည်ပူရီမည်သမုဒ်၊ ဒွေးဒသဟာ၊ မြို့နှစ်ရာတွင်၊ မှန်စွာနှစ်မျိုးဟုတ်သား၊
တည်ထောင်လုပ်ထိုစိုင်ခါ၊ စစ်တွေဒေသ၊ နဂရဟု၊ ရက္ခတိုင်းရပ်ရွာ၌၊ လူများစွာရွှင်ပျော်ပါး၊
မြို့ကစစ်တွေ၊ တိုင်းရပ်ပြည်တွင်၊ ကြင်သွယ်ငယ်မျောက်သားနှင့်၊ တူပျော်ပါးမောင်နှံစုံ၊
ရင်သွီးသဲကြား၊ သမီးသားကို၊ ရွက်ငြားချိုမိုးရုံ၍၊ သလွန်ဘုံညောင်စောင်းထက်၊ နီလျှက်သာရွှင်၊
ဆွဲရစ်ကြင်သည်၊ ပုံသွင်ငှက်ဟင်္သာသို့၊ လွန်နှစ်သက်ချစ်နှစ်ဖြာ၊ သဲချာဟူပြီး၊ သားအကြီးကို၊
ရည်မိုးနိဗ္ဗာန်ငှာလျှင်၊ သံသရာဖို့အကြောင်း၊ သျှင်သာမဏေ၊ ပြုတုံပေသည်။

များထွေလူသိန်းသောင်းနှင့်။ သယံပေါင်းလူများဖျင်၊ ကြည်လင်ရွှင်လန်း၊ ရီစင်ဖြန်း၍၊ ထူးဆန်းသဘင်ဆင်လျက်၊ တီးမှုတ်ကျင်တသောင်းသောင်း၊ စည်မောင်းခရာ၊ ဗောဇ္ဇာဗုဒ္ဓာသည်၊ သံသာတညောင်းညောင်းနှင့်၊ ဆွမ်းလောင်းလှူဒါန်းကာ၊ ကျွန်မှာသက်စု၊ သားမောင်ပုကို၊ သျှင်ပြုပီးလှူပါက၊ နတ်တကာသျှင်လူများ၊ ကောင်းချီးပျော်ပျော်၊ သာထုခေါ်သည်၊ နှမ့်ကျော်တိုင်းလုံးကြား၏။ ရွှင်ပျော်ပါးလွန်ဝမ်းသာ၊ မိတ္တာဆပွား၊ ရပ်လုံးသားရို့၊ သနားဂရုဏာနှင့်၊ ရိညွတ်ခါ ကိုယ်နှစ်ပါး၊ ချီကြွလက်ကိုင်၊ နံချင်းယှဉ်၍၊ တူပြိုင်မပြတ်လားလျက်၊ ဥယျာဉ်တောလှည့်လည်ကာ၊ ရာမချရား၊ ပန်းစံကားသည်၊ ဆပ်သွားဇီသဝါနှင့်၊ ကြွက်နားသာပန်းထင်ရှား၊ ဒေါနအီးလိုင်၊ မွီးယုံကြိုင်သည်၊ သီးခိုင်ပန်းများစွာကို၊ ရှိုးချယ်ငြားကြိုက်ရာရာ၊ မောင်သာကိုင်ညွတ်၊ မေကဆွတ်၍၊ မပြတ်နိတိုင်းသာလျှင်၊ ကုံးသီကာတူတကွ၊ နှမနှင့်မောင်၊ ချစ်ပန်းဆောင်၍၊ ဦးသျှောင်ဂေါင်းပြည့်မျှလျက်၊ ဖလဲကာဆောင်းလျက်သား၊ ဘုံညိုညောင်းစောင်း၊ သလွန်ကောင်းမှာ၊ လဲလျောင်းတူစုံသာလျှင်၊ ဖော်များစွာခြံရံကြ၊ ဇေယျမင်္ဂလံ၊ အောင်ပွဲခံသည်၊ ဗုံသံတမြေနှင့်၊ ဆင်ဝတ်ကြတူတန်းဆာ၊ ကြင်ရာသက်ထား၊ သားမယားနှင့်၊ ပျော်ပါးနီခြင်းရာကို၊ မြို့ရမ္မာကျွန်းမေခ၊ ဒွါရဝတီ၊ ငါးအင်ညီသည်၊ ပူရိမြို့ခညဟု၊ တိုင်းရက္ခကိုယ့်ရပ်ရွာ၊ ကြော်ငြာသတင်း၊ ပြည်လုံးချင်းသည်၊ မကြွင်းကြားနှမ့်ပါ၏။ မြို့ချမ်းသာနဂါရ၊ နီကြပါသည်၊ လှူဒါရိပုညလေး။

(၉) ပုညလှူဆောင်၊ မေနှင့်မောင်သည်အိုအောင်သာ၊ ဆံတမ္မာမယွင်းခွ၊ သားလှသဲချာ၊ ချစ်လှစွာကို၊ ရှိကသံသရာတည်း။ ချီလားကြကြံစည်ကာ၊ ရထားဆင်မြင်း၊ ယာဉ်ခပင်းကို၊ စီးနင်းဆောင်ယူပါ၍၊ မောင့်ကြင်ရာသက်လုံးမျှ၊ ခြောက်ပြစ်လွတ်စင်၊ နတ်အသွင်သို့၊ ငါးအင်ညီညွတ်လှသား၊ အသခနတ်မနော်၊ သူဇာမပြား၊ ပမာလားသို့၊ နုထွားဆင်းရုပ်ဝါတည်း။ မေသဲချာငယ်မျောက်သား၊ လက်ဖျားကိုင်ယူ၊ ချီကြွထူ၍၊ အတူနံပါးထားလျက်၊ သမီးသားပွားများစွာ၊ ဝန်းကာခြံရံ၊ ဖောင်လှိုပုံနှင့်၊ လျှင်မြန်စီးတက်ပါ၍၊ တူရိယာစည်စောင်းညှင်း၊ သာခြင်းကဗျာ၊ မောင်းဒုပ္ပါနှင့်၊ ခရာဗုံလင်းခွင်းကို၊ ညံမကင်းတီးမှုတ်ကာ၊ နဒီမည်ရ၊ ဂစ္ဆပကို၊ ဆန်ကြွခတ်လားပါက၊ လက်ဝဲမှာဆတ်ရိုးကျ၊ မင်းကန်ပလီ၊ ကျွန်းငပြီကို၊ နောက်ဆိပါယ်လွန်ခ၍၊ သုံးလှဘမြတ်မို့တော်၊ ဦးရစ်တော်ခါတ်၊ စေတီမြတ်ကို၊ တရပ်ရိုဝယ်မျှော်ကာ၊ ရိပူဇော်ရိညွတ်ခ၊ ဖြားလည်းတက်ထွေ၊ လီသင့်ပေ၍၊ ခတ်လေတုံပြီးမှလျှင်၊ ရပ်ဒေသပြားကျွန်းသာ၊ လက်ပံပြားမော်၊ ကျွန်းခရော်ဟု၊ ဟစ်အော်သောင်းသောင်းငြာ၍၊ မောင်းခရာဗုံလင်းခွင်း၊ သာခြင်းဆံ၊ တီးမှုတ်ပြန်သည်၊ ရှိကုံလိုဝင်းဝင်းနှင့်၊ လှိုတက်ခြင်းဆိုကာကာ၊ ဝမ်းသာပျော်ပါး၊ ခြံရံများနှင့်၊ သောက်စားတက်လားပါက၊ လက်ဝဲမှာကုလားပုန်း၊ ကျွန်းလုံးပတ်လွန်၊ ရွာဆင်ခြံကို၊ ကျူးလွန်ပါယ်လတ်တုံမှ၊ တအုံးအုံးခတ်ကြခါ၊ သူငယ်တော်ကျွန်း၊ ကျွဲခြံကမ်းကို၊ ဖြောင့်တန်းခတ်လားပါလျက်၊ မင်းကန်သာဝင်လီမြောက်၊ စိမ်းမြညိုရောင်၊ ငါးခူးတောင်ကို၊ မေမောင်နီချင်းရောက်ကာ၊ ပန်းပေါက်ပေါက်စွဲကိုင်ကာ၊ ကြင်ရာမျောက်သား၊ ငယ်မယားနှင့်၊ ချီကြွတက်လားပါက၊ မြတ်သျှင်တော်ငါးခူခါတ်၊ များများမကွာ၊ တတိုင်သာတွင်၊ ပါးတော်စေတီမြတ်ကို၊ ပူဇော်ညွတ်တုံပြီးခါ၊ သေလာတလျှောက်၊ ဖြားရီရောက်သော်၊ ဝမ်းမြောက်ရွှင်မြူးကာနှင့်၊ ရီထဲသာနဒီမြစ်၊ ကူးလိုက်ခတ်ကာ၊ ရှိပြုပွဲဝယ်၊ ကျွန်းမှာဌာနဖြစ်သား၊ ဟုတ်စင်စစ်ယုဂ်ချောင်၊ ကျိန်းတောင်ညိုညို၊ ရွန်းစိုစိုသည်၊ မိုမိုထွတ်မြင့်ခေါင်၍၊

သုံးလှဘောင်နှိုင်းတုလွတ်၊ ဓမ္မသဘင်၊ ကျိန်းတော်ရှင်သည်၊ သျှင်ပင်စေတီမြတ်ကို၊
မျှော်မြင်လတ်တုံသောခါ၊ သဒ္ဓါပီတိ၊ ဝှမ်းဆီထိသို့၊ ပီတိမြင်ကြခါမှ၊ ချစ်နှစ်ဖြာမောင်နှမ၊
ဟတ္ထဆယ်ဖြာ၊ ပဒုကြာကို၊ ဂေါင်းမှာတင်ထားကြလျက်၊ ဦးနှိမ်ချရိညွတ်ကာ၊ ကျွန်းသာလီထက်၊
မြစ်တဖက်က၊ နှစ်သက်ရိပူဇော်၍၊ တီးမှုတ်ကာဦးရံပေါင်း၊ ဒေသဌာနီ၊ ကျက်သရီဟု၊
ရွာမြီထိုသည်ချောင်းကို၊ တသောင်းသောင်းဟစ်ကြော်ငြာ၊ လျှင်စွာခတ်မြောက်၊
အိမ်တော်ရောက်ကာ၊ ချောက်ချောက်ကျွန်းလုံးကျော်၏။ ရွှင်ဝမ်းသာသျှင်လူများ၊
ဆွဲသားညာတကာ၊ မောင့်ထံမှာ၌၊ များစွာရောက်လာငြား၍၊ သွန်းလောင်းချဘာဝနာ၊
မိတ္တာဖြောင့်မှတ်၊ ရှိခညွတ်လျက်၊ လုပ်ဝပ်ရိုးခိုးလာ၏။ ဖူးဘဏ္ဍာဆက်သွင်းကြ၊ ဒါနဒီနံ၊
နိမကျန်အောင်၊ ညံညံအောင်ပွဲပြုလျက်၊ ပြည့်စုံထင်းအင်ညီ၊ ဝတ္တိမည်မှန်း၊ ကျိန်းမြို့ကျွန်းဝယ်၊
မီးပန်းများစုံစီကို၊ ကြည့်တုံပြီမောင်နှမ၊ နီကြပါသည်၊ ကျိန်းသာနာဂရလေး။

(၁၀) နဂရပူရုံ၊ တောင်ယုဂန်သည်နောက်မှန်သာ၊ ထိုရပ်ရွာကျိန်းဒေသ၊ စိမ်းမြည့်ရောင်၊
ကျိန်းမြင့်တောင်သည်၊ မြင့်ခေါင်ပဗ္ဗတကို၊ ကြည့်ခီကြတုံသောခါ၊ ဩဇာနရဲ့၊ ပင်ပိန္နဲနှင့်၊
ခမောင်းထောက်ကြာ၊ တောဗလာသည်၊ ဖာလာသစ်မှင်တောင်းနှင့်၊ ကြသောင်းဝါးကြခတ်သာ၊
မည်းမှင်းကျ၊ သီးပွင့်ဟူသည်၊ ထန်းမူပိတ္တကာတည်း။ နန္ဒြာပင်မျောက်လှုပ်၊ သစ်ပုတ်နွယ်ချို၊
ဇာတိဖိုဟု၊ ရှောက်ချိုချင်သပြုတ်နှင့်၊ သစ်ခလုတ်လက်ပံသာ၊ တမာရင်ခတ်၊ သစ်ကဝတ်သည်၊
သပွတ်သံဖရာတည်း။ မကျည်းသားအုံးလေညှင်း၊ ခူးရင်းသပြီ၊ ပင်ညောင်ရီနှင့်၊
များထို့သစ်အည်းတည်း။ သစ်ပင်ချင်းစိုင်ကာကာ၊ သစ်ကနစိုး၊ သစ်ကတိုးဟု၊
ရဲရိုးပိတောက်မှာလည်း၊ ပွင့်ငုံအာလွန်ဆန်းပြား၊ သျှသျှားပြိုင်းစင်၊ ပြိုင်းကန်းကျင်ဟု၊
ပီပင်သဖန်းများနှင့်၊ ပင်ဆောင်းရှား၊ သီးချိုချင်၊ ညောင်ချင်ဗောထီး၊ ချိုလှအီးသည်၊
ဓနိရီအုံးစသား။ အသီးခိုင်အလွန်လှ၊ ဝရစ်လွန်ပင်၊ နပျိုးပင်ဟု၊ ခေါ်တွင်ခံချိုစသား၊
ချိုအီးမြသီးတကာ၊ သီးကပွားပုံ၊ ပင်မျိုးစုံသည်၊ ရဂုံပဗ္ဗတတည်း။ ရှုခီသော်စားဖွယ်တည်း၊
ပွင့်သီးတကာ၊ ပင်ရိုးမှာလည်း၊ ယှဉ်ကာအကုန်ညှိသို့၊ သီးပွင့်ဖြာဖြာ၊ ရာသီဥတု၊ ချိန်ကိုလှ၍၊
မျှော်ရှုမငုံပါတည်း။ သုံးလှချာမြတ်ဘုရား၊ ကိုယ်စားခါတ်လျှင်၊ ကျိန်းတော်ရှင်သည်၊
သျှင်ပင်တန်းခိုးအားကြောင့်၊ သီးပွင့်ငြားပင်တကာ၊ သူတော်အလောင်း၊ နိဖွယ်ကောင်းသည်၊
ချမ်းဆောင်းရိပ်သာယာနှင့်၊ မျိုးလေးဖြာသျှင်လူများ၊ ရောက်ငြားပျော်ရွှင်၊ ကိုယ့်ရပ်ခွင်ကို၊
ပြန်ချင်ပင်မဟိငြားတည်း။ လွန်ဆန်းပြားများသျှင်လှ၊ ရီမူသောက်ချိုး၊ အီးမြနိုးသည်၊
သွီးရိုးနို့နှင့်တူ၏။ နှိုင်းခိုင်းယူဂန္ဓဗ္ဗ၊ စိတ္တရကေလာ၊ ကုသိန္နာဟု၊ ပမာယွင်းခွတည်း။
ရွှင်လန်းကြလူတကာ၊ ပန်းနံသာလိမ်းကျံငြား၊ ဝတ်စားတန်းဆာ၊ ကြိုက်သည့်ငှာကို၊
ယူကာဆင်ဝတ်စား၍၊ လင်မယားမောင်နှံစုံ၊ သားနှင့်သမီး၊ ချစ်မည်းကို၊ ပွေ့ပြီးချီရွက်တုံလျက်၊
များဗိုလ်ပုံတသောသော၊ လှီပွဲကျင်ကျင်၊ ပျော်မှုဆင်သည်၊ သဘင်လက်ပွဲများကို၊
ရှုကြည့်ငြားတုံသောခါ၊ ပိတောက်ပန်းမှာန်၊ ထီးတင်းခွန်နှင့်၊ ကျောင်းကန်လားကြပါလျက်၊
လူများဖျင်ရီကစား၊ သောင်းကျွန်းဇမ္ဗူ၊ မြရိပင်ဝယ်၊ ထိမ့်ဆူကျော်နမ့်ကြား၏။
ဖျိုးကြယ်ပွားရတနာ၊ လိုရာသမျှ၊ ချင်တိုင်းရသည်၊ မာယဝတ္တိသာသို့၊ ပြည့်စုံစွာလွန်ဆန်းပြား၊
မြောက်ခွင်ရင်မှာ၊ ပဒေသာတွင်၊ ဆွတ်ကာယူ၍စားသို့၊ ရွှင်ပျော်ပါးကျိန်းမြို့မြီ၊ ဘုမ္မိနက်သန်၊
မြီမျိုးမှန်သည်၊ ဂါမိကျက်သရီနှင့်၊ မျိုးကြင်ဆွဲမေအလှ၊ နှမချစ်စွာ၊ ဆင်းကလျာနှင့်၊
လျှုဒါပီးစွန့်ငှလျက်၊ နောက်ပညာနောင်သံသာ၊ ဆံမ္မာမပြား၊ တူနှစ်ပါးသည်၊ ဖြစ်ငြားရလိုပါဟု၊

သမ္မုဒ္ဓါစိန္တေယျ၊ လူ့ဘုရားသျှင်၊ ကျိန်းတော်ရှင်သည်၊ ဓါတ်လျှင်ရှိမုဒ်ဝဉ္ဇ၊ ဦးနှိမ်ချပန်းပွင့်တင်၊
ကြည်လင်ရွှင်လန်း၊ ရွှိသက်န်းကို၊ ရက်ကန်းကပ်လျှင်ကျင်လျက်၊ နိတိုင်းပင်ရက်မပြတ်၊ ဒါနကုသိုလ်၊
မဂ်ဖိုလ်လို၍၊ ကြည်ညိုအလှူဝတ်ကို၊ ပီးစောင့်မှတ်မောင်နှံစုံ၊ ရပ်ဘုံနဂရ၊ ကျိန်းဒေသဝယ်၊
သုခလွန်ပွားပုံနှင့်၊ ပျော်ရွှင်တုံ့မောင်နှမ၊ နီကြပါသည်၊ ရပ်ရွာကိုယ့်ဌာနလေး။

(၁၁) ဌာနကျက်သရီ၊ ကျိန်းမြို့မြီသည်အံ့ဘွယ်သာ၊ ညာတိကာမိနှင့်ဘ၊ အလှနတ်သွင်၊
ရာသက်ကြင်သည်၊ ယင်းတွင်ဖွားမြော်ကြ၏။ ထိုဒေသတောင်ကိုပေ၊ ကျွန်မှာသက်ထား၊
ငယ်မျောက်သားနှင့်၊ ချီလားကြည့်လည်ပါက၊ အံ့ဩဖွယ်လွန်ဆန်းပြား၊ သီးကားပွားပုံ၊
ပန်းမျိုးစုံသည်၊ ရင်ထိုတောင်ဖျား၌၊ ဆပ်သွားဖူးအဝေယာ၊ ကြိုင်စွာကျက်ရုံး၊ သီးမျှော်ကုံးသည်၊
ဂမုံးကြိုင်အီးစွာနှင့်၊ ပန်းနော်နာပန်းထင်ရှား၊ ကွမ်းဖဲဆင်းဝီ၊ ငုံးရွှိပန်းချရာနှင့်၊
ပန်းဒေါနချပ်တရာ၊ ခဝါထိုပန်း၊ ပွင့်နီလွန်းသည်၊ ခေါက်ရမ်းဇီသဝါနှင့်၊ ပန်းရွှိကြာမိုးစိပန်း၊
နှင်းပန်းသရဖီ၊ ဇော်ဂျီသည်ပန်းစံကား၊ ပန်းဒေါနသည်၊ ထူးစွကောက်စရီနှင့်၊ ပန်းနှင်းဇီအင်္ဂရင်း၊
ပုန်းညှင်းရွှိတူ၊ မညူပန်းခပင်းရို့၊ အပင်ချင်းမှီကာကာ၊ ရမာငုံးပန်း၊ ကြိုင်အီးချမ်းသည်၊
မိုးလွန်းစလတ္တာနှင့်၊ ပင်မြင့်မှာသဇင်ပန်း၊ မြိုင်ပန်းလည်းဟူ၊ မအူညာစိမ်းပန်းတည်း။
ပေါက်ပန်းပွင့်ဖြူအနီ၊ စုံစိမရိုး၊ ပန်းတမျိုးသည်၊ မညှိုးပွင့်ဝီဝီနှင့်၊ ကြာနီသည်ပန်းမြစ်ကိုင်း၊
ပင်တိုင်းသာကြည်၊ ပန်းစပယ်ဟူ၊ ပွင့်သည်ဖြူမိုင်းမိုင်းတည်း။ ပန်းမြင်တိုင်းရှုဖွယ်သာ၊
မဟာလောက၊ မြတ်လေးစသည်၊ ဖြူဆွပဒုံကြာနှင့်၊ ကြွက်နားသာပန်းခဝဲ၊ ပန်းရင်းများဟူ၊
မိုးယုံကြူသည်၊ ကြာဖြူစွယ်တော်ပန်းတည်း၊ ပွင့်လန်းလန်းပင်တကာ၊ သဲတော်ရင်ခတ်၊
သစ်ကဝတ်နှင့်၊ ပန်းမြတ်ပုန်းညှက်သာတည်း။ သင်းပုန်းခေါ်ကြိုင်အီးအီး၊ မုဂ္ဂါသနီ၊
လှမျိုးညီသည်၊ ဒန်းညီပင်ချင်းစီး၍၊ ပွင့်တုံ့ပြီးရှုဖွယ်သာ၊ ကြာပုဏ္ဏရိတ်၊ ကြာတံဆိတ်သည်၊
လျှံမြတ်ရောင်ဝင်းဝါနှင့်၊ ဆူးပန်းသာကြာခေါင်းလောင်း၊ ပန်းကောင်းခေါ်ဆို၊ အောက်မဲညိုဟူ၊
ခေါ်ဆိုထိုပန်းပေါင်းရို့၊ ပွင့်တုံ့သျှောင်းစိမ်းညိုပြာ၊ ရွမ်းရွမ်းစိုသည်၊ နှစ်လိုရှုဖွယ်သာတည်း။
ရဲနီစွာတောင်ကြက်မောက်၊ ပွင့်မြောက်တုံ့ပါ၊ ပန်းတကာသည်၊ ချိန်ခါဥတုရောက်က၊
ပြည်ရွာများအီးကြိုင်ကြိုင်၊ ဂဇိုင်သာမော၊ ကျိန်းတောင်တောဝယ်၊ ဖျင်ပွားခက်ချင်းဆိုင်၍၊
ပင်ချင်းရိုင်ရွှိမရ၊ ပွင့်ကြများစွာ၊ တောင်မြတ်သာ၌၊ သင်္ချာအနန္တတည်း။ ကုံးသီထားနည်းအတူ၊
ရာသီပြောင်းကြွ၊ ချိန်ကာလဟူ၊ မာသအားကိုယူ၍၊ ပွင့်ကြမူထိုတောင်ပါး၊ မကွာတူပြိုင်၊
နံချင်းယှဉ်လျက်၊ ညွတ်ကိုင်ဆွတ်ယူငြား၍၊ မြတ်ဘုရားကျိန်းတော်သျှင်၊ သျှင်ပင်ဗုဒ္ဓ၊
ထံရင်းခသည်၊ ဂူဝထဲသို့ဝင်လျက်၊ ဂေါင်းထက်တင်ရိုတုတ်ကွ၊ ပုညကမ္ဘာ၊ နောင်သံသာဝယ်၊
ကျင်လည်ရာရာဘဝ၌၊ တူတကွမောင်နှံစုံ လူ့ဘုံနတ်ရွာ၊ ဆက်များစွာဝယ်၊ ချမ်းသာသုခဘုံနှင့်၊
စံကြတုံ့မောင်နှမ၊ ဖြစ်ရပါလို၊ စိတ်ကြည်ညိုဖြင့်၊ ပန်ဆိုဆုတောင်းကြ၍၊ ရီစက်ချတုံ့ပြီးခါ၊
သက်သီပြုထား၊ နတ်ရို့အားလျှင်၊ တိုင်ကြားပြုပြီးခါမှ၊ ခြံရံကာဖော်ရွှိများ၊ သန်လျားထမ်းစင်၊
မြင်းနှင့်ဆင်ကို၊ ယာဉ်ရှင်စီးတက်ငြား၍၊ ရွှင်ပျော်ပါးတီးမှုတ်ကာ၊ ဌာနရည်မှန်၊ အိမ်ဗိမ္မာန်သို့၊
လှည့်ပြန်လာလတ်ပါလျက်၊ ဆိုက်ရောက်ခါရွာဂါမ၊ ပျော်ပွဲသဘင်၊ ပွဲကြီးဆင်၍၊
နိပင်မကင်းကြတည်း။ ဝသန္တပစ္စုန်လွန်၊ သီလစောင့်မှတ်၊ ဝါလကျွတ်သည်၊
ဆန်းထရောက်လတ်ပြန်က၊ ထီးတန်းခွန်မုလေးပွား၊ ဘုရားလက်ဆောင်၊ ထမင်းထောင်နှင့်၊
များမြောင်အဖြာဖြာကို၊ ကိုင်ယူငြားလာသောခါ၊ ငယ်လင်မယား၊ သမီးသားနှင့်၊
ဝတ်စားဆင်ယင်ပါ၍၊ တူစုံသာရွှင်ပျော်ပါး၊ တရားကုသိုလ်၊ ဆည်းပူးလို၍၊

ကြည်ညိုလွန်ဆပွားကာ၊ ဆီမီးတန်းဆောင်၊ သုံးလူဘောင်ဝယ်၊ ပြောင်ပြောင်ညိုထွန်းပါလျက်၊
သာထုခေါ်ဝါလည်းကျွတ်၊ ဧသံသီကာ၊ လသာသာတွင်၊ ကြော်ငြာလက်ခုတ်ခတ်၍၊
ညဉ့်လုံးပြတ်မအိပ်ပါ၊ သျှင်လူအများ၊ ကျိန်းမြို့သားရို့၊ သောသောရုရုဆာလျက်၊
တူရိယာအသွယ်သွယ်၊ ဗောဠိလင်းခွင်း၊ စည်မောင်းညှင်းကို၊ တီးခြင်းအံ့ဩဖွယ်တည်း။
ရခိုင်ပြည်အလယ်ဆိပ်၊ စိမ်းမြညိုရောင်၊ ကျိန်းမြင့်တောင်ဝယ်၊ ဓါတ်ရောင်လျှံမြိတ်မြိတ်နှင့်၊
ပြည်မွန်ဆိပ်ရိပ်သာယာ၊ သူတော်သူကောင်း၊ သူမြတ်လောင်းရို့၊ ကိန်းအောင်းမို့ပျော်ပါသား၊
ကျိန်းမြို့ရွာကျိန်းဒေသ၊ နာမဂါမို့၊ ကျက်သရီဟု၊ အောင်မြီတိုင်းရက္ခာတည်း၊ ထိုဌာနများသျှင်လူ၊
ဆာပူကင်းပျောက်၊ ချမ်းသာရောက်သည်၊ စွဲမြောက်သီလယူ၍၊ ကျွန်ုပ်မူမောင်နှမ၊
ပြည့်လှငါးအင်၊ လွန်များဖျင်သည်၊ လိုချင်တတိုင်းရ၍၊ တူတကွမြူးရွှင်စံ၊ သလွန်ဘုံထဲ၊
လိုင်ချင်းတွဲ၍၊ ရစ်နှံရာသက်နှံနှင့်၊ တပွင့်ဆံမယွင်းခွ၊ အလှကြင်ရာ၊ မေချစ်စွာနှင့်၊
ချစ်ခင်ကြတူမကွာ၊ သဲချာနှစ်ပါး၊ သမီးသားနှင့်၊ ပျော်ပါးနီကြပါသည်၊
မြို့ရွာကျိန်းဒေသမှာတည်းလေး။

ကဗျာလက်ဆောင်

ကြက်ဖတွန်ကျော် ယောက်ဖခေါ်

ရဲရဲတောက်
အမောက်နီနီနန့်
တိုက်ကြက်ဖကြီး
အီကရီးမတွန် --။

မာန်ပေါက်ပေါက်
တွန်ဟောက်လိုက်သည်း
အောက်အီးအီးအွတ် --။

(သာလှဦး)